



東林淨土文庫

地藏菩薩本愿经略解

静权法师述




南無本師釋迦牟尼佛



目录

地藏菩萨偈赞·····	1
地藏菩萨本愿经略解卷上·····	2
忉利天宫神通品第一·····	8
分身集会品第二·····	46
观众生业缘品第三·····	57
阎浮众生业感品第四·····	71
地藏菩萨本愿经略解卷中·····	96
地狱名号品第五·····	96
如来赞叹品第六·····	105
利益存亡品第七·····	127
阎罗王众赞叹品第八·····	139
称佛名号品第九·····	161
地藏菩萨本愿经略解卷下·····	171
较量布施功德缘品第十·····	171
地神护法品第十一·····	185
见闻利益品第十二·····	192
嘱累人天品第十三·····	218
附 录·····	229
东林佛号曲谱·····	229
念佛的心态与音声·····	230



地藏菩萨偈赞

地藏大慈悲，誓愿永无了期。
所化成佛数难思，犹秉声闻仪。
直待狱空生度尽，方肯示证菩提。
恳祈冥显施恩资，海会预莲池。



地藏菩薩本願經略解卷上

天台山國清寺靜權法師述

今解此經，總分為三：甲初、總題；二、譯師；三、正文。今初

地藏菩薩本願經

題為一經之綱宗。所謂提其綱。則眾目自張。挈其領。則襟袖畢至。故先釋題。次入文。以天台弘經方軌。必先五玄釋題。然後四意消文。此由智者親証法華三昧。解《法華經》。以五玄釋題。四意消文。故以此法。遍解眾經。所謂五玄者：初、釋名；二、顯體；三、明宗；四、論用；五、判教相。夫名為能詮。若无能詮之名。安有所詮之體。故先名次體。然體非宗莫會。故須明宗。既由宗會體。則有化物之用。故須論用。但體有廣狹。宗有邪正。用有大小。故須判教相也。釋此五玄。有通有別。通則七番共解。別則五章各釋。就通七番共解。一標章、二引証、三生起、四開合、五料簡、六觀心、七會異。標章令易憶持。起念心故。引証引據佛語。起信心故。生起使不雜亂。起定心故。觀心即聞即行。起精進心故。后三起慧心故。五心立。成五根。排五障。成五力。游七覺。登八正。入三解脫門。此則七番共解大略如此。次五章各釋。亦有通別。通則一代。別則此經。就通亦論通別。約

教行理。各论通别。一教论通别者。众生之机不一。佛对机说法亦异。是为教别。同一金口所说。是为教通。二行论通别者。因地修行各异。证果则同。是为行论通别。三理论通别者。一理而应众名。或云实相。或云真如。故理别。众名同显一理。故理通。此约一代所说。而论通别。

次约本经论通别。地藏菩萨本愿为别。经字为通。先释别名。次释通名。众经名目甚多。然立题不出七种。所谓单三复三具足一。此经以人法立题。人有因人果人。法有修法证法。地藏菩萨为因人。积因成果。从性起修。故以不思议人法立题。今先释人。地藏二字为别名。菩萨二字为通名。地藏以喻立名。地喻菩萨心地。依《宝云经》。地有十义。一广大义。以喻菩萨发广大菩提心。二众生依。喻菩萨为众生之所依故。三无好恶。喻菩萨于诸众生。无简择故。四受大雨。喻菩萨能受诸佛大法雨故。五生草木。喻菩萨出生一切诸功德故。六种子所依。喻菩萨为菩提种子所依托故。七生众宝。喻菩萨利益众生法故。八生众药。喻菩萨出生对治众生法故。九风不动。喻菩萨世间八风所不动故。十师子吼不惊。喻菩萨闻说深法不惊疑故。藏者包藏。如世库藏。菩萨以地为库藏。依《胜鬘经》。藏有四义。一无价藏。如如意珠。以喻菩萨乘。二上价藏。如金。喻缘觉乘。三中价藏。如银。喻声闻乘。四下价藏。如铜。喻人天乘。菩萨具此四法。随机演说。故称为藏。菩萨是半梵语。具足应云菩提萨埵。此云觉有情。此有三义。一、虽觉尚有情识。属自利边。二、以此法觉悟有情。属利他边。三、自觉觉他。属兼利



边。菩萨有四教不同。今为圆教菩萨。且发心久远。是大菩萨也。次再释法。本者初也。昔也。菩萨过去世为长者子。及国王等。发菩提心。愿者誓愿。有通有别。通则四弘誓愿。别则观音十二愿。弥陀四十八愿等。今地藏通则无时无处。莫不度生。别则悲心偏切。常作幽冥教主。济度地狱之苦。

次释通名。经者。梵语修多罗。有翻无翻。各有五义。言无翻者。以多含不翻。含有涌泉、出生、绳墨、显示、结鬘之五义故。言有翻者。翻经、翻论、翻法本、翻线、翻善语教。此皆约义而翻也。天台和会二家。翻为契经。此方圣人所作称经。以例佛说为经。契者合也。契理契机也。又训为径。佛说三藏。皆是返妄归真。修行之径路也。初释名竟。

二显体。名为假名。体为实质。名为能诠。体为所诠。种种文字。无非名言。故须寻文达理。如因指见月。故释名后。必须显体。夫至理幽微。不但会之至难。亦复说之不易。兹以三义而为解释。一、体礼义。二、体底义。三、体达义。一、体礼义。礼者，如世间君父为尊。臣子为卑。妙体贵极。诸法中尊。一切万行之所归趣。如众星拱北。群流归东。此约法身德释也。二、体底义。悟此体者。穷万法源。到实相底。此约般若德释也。三、体达义。若达此体。则会万殊不二。遍众法无遗。如风游太虚。无有障碍。此约解脱德释也。然兹三德。举一即三。言三即一。总此三义。以为妙体。一切诸经。皆各有体。

《华严经》以一真法界为体。《法华》以实相为体。《释

论》云。诸大乘经。以一实相印为体。诸小乘经。以无常、无我、寂静涅槃三法印为体。若无此印。即同魔说。今此经以不思議解脱为体。《分身集会品》云。其有未调伏者。随业报应。汝须忆念。吾在忉利。殷勤付嘱。令娑婆世界。至弥勒出世以来众生。悉使解脱。《业感品》云。我今蒙佛付嘱。至阿逸多成佛以来。六道众生。遣令度脱。唯然世尊。愿不有虑。是知一部旨趣。只为未解脱众生。付与地藏。遣令解脱。一解脱一切解脱。即具法身般若。故以不思議解脱为本经之体。有师以不思議性识为体。引经云。一切众生未解脱者。性识无定。为善为恶。逐境而生。以在缠如来藏性。以为经体。然体只是理。乃不变义。安得以无定性识为体。况体为宗家之体。由修道所证。如梁柱之于屋空。若无梁柱。亦无屋空。虽众生本具三德。然素法身。为天龙所忽。必须出缠法身。得为经体。若兹法身。即具般若解脱。所谓举一即三。言三即一。故此三德。皆得为经体也。二显体竟。

三明宗。上来显体。乃属性德。今此明宗。乃属修德。从性起修。则不二而二。全修在性。则二而不二。故体之与宗。不可说一。不可说二。性修原自交成。理事由来不二。若行者不识宗趣。何以领会妙体。故显体后。须明宗也。诸经各有宗趣。今经以不思議行愿为宗。经中文殊问佛云。地藏菩萨。因地作何行。立何愿。而能成就不思议事。又大士于过去不可说劫前。为长者子。为国王。为婆罗门女。为光目女。皆发广大愿行。又如来自结经名。一名地藏本愿。二名地藏本行。故以行愿二法。为一



经之宗要也。三明宗竟。

四论力用者。灭恶名力。生善名用。诸经各有力用。如《法华》以断疑生信为用。今经以不思議神力为用。

《如来赞叹品》云。听吾今日称扬赞叹地藏菩萨。现大不可思議威神慈悲之力。救护一切罪苦之事。又《见闻利益品》云。吾观地藏威神力。恒河沙劫说难尽。《嘱累品》云。汝之神力不可思議。以有不思議神力。故能百千方便。度脱众生。是知无缘慈悲为因。神力度生为用。此之力用。由修道所得。而有成宗之功也。上来名体宗用。皆云不思議者。第十三《嘱累品》云。汝之神力、慈悲、智慧、辩才。一一皆云不可思議故也。四论用竟。

五判教相者。教者，圣人被下之言。相者，分别异同之称。智者大师。灵山亲承。大苏妙悟。照了《法华》。如曦和之临万象。通达法相。如清风之游太虚。以五时八教。判释一代东流圣教。罄无不尽。所谓五时者。一华严时。二阿含时。三方等时。四般若时。五法华时。八教者。化仪四教。化法四教也。如化仪四教。判《华严》为顿。以不落渐次。顿然说大。化法以兼别明圆释之。化仪判阿含为渐初。化法以但三藏教释之。化仪判方等为渐中。化法以对半明满释之。化仪判般若为渐末。化法以带通别明圆释之。秘密不定二教。前四时皆有之。化仪判《法华》为非顿非渐，非秘密非不定。化法以纯圆独妙释之。然五时有通有别。别则别有齐限。通则通于前后。夫佛对机设教。机来即应。本无次第。所谓如来一音演说法。众生随类各得解。今此经在《法华》之后。涅槃之

前。佛升忉利。为母说法竟。说此《地藏经》后。即将唱灭。以未度之众。付地藏于忉利。待弥勒于华林。若论别五时。应在第五法华时。然本经与《法华》有三异。一者《法华》为一化之终。如秋收冬藏。更无所作。今以未度之众。付与地藏。为化道之始。如春初下种。大有事在。二者《法华》所化之机皆已淳熟。今则十有一二。尚恶习在。三者《法华》开方便门。示真实相。今则广设方便。教化众生。况《法华》本门发明如来尘点劫前。已成正觉。从是以来。种熟脱三。度脱众生。更为诸经所无。故藕益大师。阅藏知津。判本经属于方等。则本经别五时当在法华。通五时应归方等时也。五判教竟。

甲二、译师

唐于阗国。三藏沙门。实叉难陀译。

唐，代名。以李渊奋迹晋阳。为陶唐氏故都。故国号曰唐。于阗，北印度国名。正云瞿萨怛那。唐言地乳。以王未有嗣，祷毗沙门像。额上剖出婴儿。不饮人乳。神前之地。忽然隆起。其状如乳。神童饮吮。遂至成立。故以名国。三藏者。经律论三。各含藏义理。别而言之。经诠定学。律诠戒学。论诠慧学。沙门此云勤息。谓勤修戒定慧。息灭贪嗔痴。实叉难陀。此云学喜。法师之讳。译者，译梵成华也。

甲三、正文分三。乙初、序分；二、正宗分；三、流通分。

今初



忉利天宫神通品第一

此经三卷。共十三品。总分三科。序、正、流通。初品序分。次从《分身集会品》。讫《较量布施》等九品。为正宗分。三从《地神护法品》讫经终三品。为流通分。此品亦可云序品。今不云序品而云神通者。因此经由忉利天发起。盖序有三。一者次序。经前五事。次第安立。二序由。如来含笑放光。果因集赞。三序述。问答释疑。昔地藏度母因缘。为此经弄引。皆由如来神通发起。此通在忉利所显。故云《忉利天宫神通品》。今释品题。复分通别。品之一字为通。忉利等六字为别。就别题。先释忉利。次释神通。忉利天宫四字。忉利为别名。天宫为通名。梵云忉利。此云三十三天。在须弥山顶。中间为善法堂天。四方各有八天。合为三十三。今就中间。善法堂天。此天有城。名善见。周围四万十千由旬。纯金所成。城四面有千门楼。中央复有金城。凡五百门。种种宝严。不可具述。是城中央。有宝楼重阁。楼高五百由旬。广二百五十由旬。此重阁最上中央圆室。全是琉璃所成。为帝释所住处。如来升座于此。为圣后说法。天宫是依报。天者胜也。身胜乐胜。宫者穹也。屋见于垣上。穹隆然也。神通由如来所现。因佛为母说法已竟。当时现种种神通。使十方诸佛菩萨。云集天宫。为本经之发起。神通二字。准《璎珞经》云。神名天心。通名慧性。天然之慧。彻照无碍。故名神通。具有六通。今非小乘神通。正明如来不思议慧性妙用。梵云跋渠。此云品。义类同者。叙在一段。故名为品。亦通名也。或佛自唱。或结集所置。或

译人添足。今观分品之法。似乎译师自立。诸品之始。故云第一。

乙初分二。丙初、通序；二、别序。

通者。诸经皆有。亦名证信序。有此五事。人方信故。又名经后序。集家安立故。二别序。别在此经。与诸经异。亦名发起序。发起正宗故。

丙初分二。丁初、举五事证信；二、点三月所为。

丁初分四。戊初、所闻法体乃至第四佛及住处。今初

如是。

如者。不异名如。是者。无非曰是。佛所说法。皆称真如。由此真如。而起修行。超凡入圣。决定无非。故曰是。又云信顺之词。信者。言是事如是。信则所言之理顺。顺则师资之道成。亦指法之词。如是之经。亲从佛闻。

戊二、能闻之人

我闻。

我者主宰之义。凡夫有我见、我慢名字。今阿难已无见慢。何亦言我。须知无我无闻。化道则绝。故随世假名而称我。闻者。耳根发于耳识。声在可闻处。因缘和合故能闻。应云耳闻。何云我闻。以我为六根之主。故云我闻。标闻成就也。

戊三、闻持之时



一时。

时成就说听终竟。总名一时。此应记岁月。今云一时者，盖两土正朔不同。天上人间各异。如人间百年为忉利天一日夜。故但云一时。

戊四、佛及住处

佛在忉利天。

佛为说法之主。梵云佛陀。此云觉者。有三义。自觉、觉他、觉满。自觉异凡夫之不觉。觉他异二乘之自度。觉满异菩萨之分证。三觉圆。万德具。故称佛。佛为通号。今指本师释迦牟尼佛也。在者。佛为能在。天宫为所在。或云暂时曰在。久停名住。一往语耳。《大论》以住释在。本无分别。

丁二、点三月所为

为母说法。

此四字。正点三月所为。文略意广。包括一部。正佛升忉利之宗源。为地藏发愿之张本。实为释门之孝经。大孝释迦尊。累劫报亲恩。佛升忉利。盖有三意。一酬鞠育之恩。二别天人酬其护法之功。三为受苦众生付地藏于忉利。待弥勒于华林也。

丙二别序分三。丁初、果因集赞序；二、现相集众序；三、问答释疑序。

丁初分二。戊初、同来集会；二、共申赞叹。今初

佛为果人。菩萨为因人。同来集会。诸经皆有常随众。此经非无。因佛在忉利。为母说法。已列常随众故。

不复列也。

尔时十方无量世界，不可说不可说一切诸佛，及大菩萨摩訶萨，皆来集会。

尔时者。佛为母说法之时也。若此时诸佛不集。世尊下忉利即将入灭。末法众生付嘱于谁。全仗诸佛云集。发起此大事因缘。看下放光召集天龙众等。可知十方诸佛来会。亦由世尊神力所致。世界是依报。诸佛菩萨是正报。十方虚空不可尽。则世界不可尽。故云十方无量世界。一世界即有一佛化主。则现坐道场诸佛世尊。有不可说不可说之多。诸佛各将一大菩萨为侍者。如《法华》分身云集各有侍者。故云并及诸大菩萨摩訶萨。俱由十方来集忉利法会。而此诸佛。皆由地藏教化成就。则历劫度生岂可思议耶。

戊二共申赞叹分二。己初、同叹释迦难事；二、各遣侍者问讯。今初

赞叹释迦牟尼佛，能于五浊恶世，现不可思议大智慧神通之力，调伏刚强众生，知苦乐法。

赞叹。盖有二意。一者浊世成道难。二者教化恶世众生更难。释迦，姓也。此翻能仁。牟尼，名也。此翻寂默。姓从慈悲利物。故不住涅槃。字取智慧冥理。故不住生死。首叹能字。即此意也。于者，在也。五浊者。譬如清水。投之尘土。容貌汨然。名之为浊。浊相有五。所谓劫浊。见浊。烦恼浊。众生浊。命浊。而此五浊。见与烦恼为因。感众生命浊之果。此四聚在一时。为劫浊。世



者，时世也。当释尊出世。正人寿百年。五浊增盛。造恶者多。故云恶世。若当来弥勒出世。人寿八万岁。地皆七宝。与净土无异。故世界净秽。本无一定。随世迁变也。现者，现三轮不思议化也。智慧，即意轮鉴机。神通，即身轮现通。知苦乐法，即口轮说法也。此之力用。非同权小。故云不可思议。大智慧神通之力。佛为能调伏。刚强众生。为所调伏。对刚强众生。须令知苦乐对治之法。若知三途是苦。则知人天为乐。知世间苦集二谛是苦。知出世道灭二谛是乐。总之三惑二死是苦。菩提涅槃为乐也。

己二、各遣侍者问讯

各遣侍者，问讯世尊。

问者。问其起居。讯者。讯其所事。应有问讯之词。如《法华》分身诸佛。皆遣侍者。问讯世尊。少病少恼。气力安乐。今无者。略耳。

丁二现相集众序分二。戊初、现瑞；二、集众。

戊初分二。己初、放光明云；二、出微妙音。己初分二。庚初、总示；二、别明。今初

瑞只是相。睹相知瑞。如蜘蛛挂。则喜事来。喜鹊噪。则行人至。小尚有征。大焉无瑞。

是时如来含笑，放百千万亿大光明云。

是时。即诸佛问讯之时。含者。将吐未吐。如《法华》一时警歎。笑由喜来。世尊自知唱灭不久。深虑末法众生。如失母孤儿。无所恃怙。今见十方诸佛云集。寻知地藏分身集会不久。则末世众生。付托有在。本怀得畅。

故含笑以表之。佛佛皆有常光、放光之别。本师常光一丈。以众生福薄。不堪其明。故只一丈。今是口中放光。此光明如云。遍覆世界。故云大光明云。不只一种二种。有百千万亿种之多。若约观心释。现前一念。圆具百界千如。如是互具。则有万万亿。大即法身。光即般若。云即解脱。此众生本具。以迷不知。故放光明觉悟之。

庚二、别明

所谓大圆满光明云，大慈悲光明云，大智慧光明云，大般若光明云，大三昧光明云，大吉祥光明云，大福德光明云，大功德光明云，大归依光明云，大赞叹光明云。

云是山川之气。天地之章。色有浓淡卷舒。态具宛转变化。正显如来无分别智。随机应现。知根说法。令众生菩提芽生长也。所谓大圆满光明云者。以总放身光。为诸光之本。此文显总中之用别。所谓指十种光云之发词。此十种云。咸褒如来果位之功能。表众生本具之心因。圆满者。始以圆因行为至果上成万德圆果。佛光超胜日月。无不周遍故圆。恒沙界内行孝道之众。业无善而不增。使至究竟果地。谓之满也。慈悲者。菩萨因行以慈悲为本。果觉亦然。今放无缘之光云。使九界众生。触体咸获适悦之乐也。智慧者。智慧照了。慧能辨别。佛以三智圆明。放此光云。欲令众生。破愚疑之不明。蒙光作引。开发本有慧光也。般若者，文字、观照、实相三般若也。众生根性。不出法行人、义行人。文字般若。俾义行者而得修持。观照般若。使法行者习学禅定。实相之光。则人人本具也。



三昧。此云调直定。凡夫无定。外道邪定。小乘浅定。唯佛那伽正定受。具足二十五王三昧。能放此光。对破二十五有也。吉祥者。《大日经疏》八云。梵语落吃涩弭。此翻吉祥。嘉庆先兆之义。佛放吉祥光。为众生现在闻法。将来证果授记之先兆也。福德者。俗人享诸好报。谓之福气。作仁义事。谓之德。世尊因地修六度万行。果证万德庄严。万德故名福德。证此果。放此光。正表因果同源。希众生见福德之光云。起福德之行为也。功德者。功是因。德是果。如来因修无量数功行。得果成无穷尽慈德。今放功德光云。因修万行。果期万德之摄化也。归依者。归，趋向义。依，赖借义。佛为九界众生之所依止。佛放此光。俾修行者有所把握也。赞叹者。光中所出音声之赞叹也。或赞叹三宝。或赞叹云集法会大众主伴。或赞叹地藏行愿孝誓。俾将来四众亦须孝养父母师僧三宝也。

己二出微妙音分二。庚初、结前起后；二、正明众音。今初

放如是等不可说光明云已，又出种种微妙之音。

放如是等光明云已。此结前。如是二字。指十种云。等者。上云百千万亿。实则有不可说之多。放光明云已竟。又出音。此句起后。再从光明中出音。此音微妙。互相合响曰微。彼此不杂曰妙。种种者。有不可说不可说之多也。皆是说法之音。一时顿出。随众生缘。宜闻顿者闻顿。宜闻渐者闻渐。偏圆大小。比例可知。

庚二、正明众音

所谓檀波罗蜜音，尸波罗蜜音，羼提波罗蜜音，毗离耶波罗蜜音，禅波罗蜜音，般若波罗蜜音，慈悲音，喜舍音，解脱音，无漏音，智慧音，大智慧音，师子吼音，大师子吼音，云雷音，大云雷音。

所谓。指十六种音。先释六波罗蜜音。此须论通别。檀等六名为别。波罗蜜为通。梵云波罗蜜。此云彼岸到。彼岸是涅槃。此岸是生死。烦恼为中流。施等六法如船筏。能修六法。则由生死此岸。度烦恼河。到涅槃彼岸。又云事究竟。即圆满也。必须五住究尽。二死永亡。方称圆满。梵云檀那。此云布施。能度悭贪。施有三种。一财施。二法施。三无畏施也。施为六度之首。故光云首赞。梵云尸罗。此云止得。谓止恶得善。止恶属摄律义戒。得善属摄善法戒。以此利人。即饶益有情戒也。持戒能度毁犯。梵云羼提。此云忍辱。忍是能忍之心。辱是所忍之境。境分有情无情。能忍有情。为生忍。能忍无情寒热等法。为法忍。若达诸法。缘生无性。忍可此理。为无生忍也。忍辱度嗔恚。梵云毗离耶。此云精进。不杂为精。不休为进。身精进。勤修善法。心精进。勤修善道。如念佛一心不乱。即精进也。精进能度懈怠。梵云禅那。此云静虑。静即是止。虑即是观。禅有三种。一世间禅。即四禅八定是。二出世禅。即观练熏修等。三上上禅。如九种大禅等。禅定度散乱。梵云般若。此云智慧。照了诸法不可得。而通达无碍。亦有三种。有文字般若。观照般若。实相般若。般若能度愚疑。此六度。若依四教分别。则有无量。次释四无量心音。即大慈大悲大喜大舍也。慈



能与乐。悲能拔苦。庆他得乐曰喜。心无憎爱曰舍。慈有三种。一生缘慈。观一切众生。如父母亲想。二法缘慈。观一切法。皆从缘生。三无缘慈。不住法相。及众生相。悲亦有三名。同于慈。此四无量心。四教菩萨具修。今是如来四无量心。故一一名大。解脱音。解脱即自在义。三界众生。皆由业缚。不得自在。是以生死相续。无有断时。二乘但离虚妄。名为解脱。惟佛于一切法。而得自在。名大解脱也。无漏音。世间之法。皆称有漏。漏有三。欲漏、有漏、无明漏，有此三故。漏落于生死。出世之法。名无漏法。今是中道无漏。不漏于二边也。自檀波罗蜜音。至无漏音。是自行因果一双。由修六度。四无量心。而得解脱。证无漏果。下六种音。是化他。即三轮不思議化。智慧是意轮鉴机。师子吼是口轮说法。云雷音是身轮现通。智慧音。通七方便。大智慧音。是如来权实二智也。师子音。表无畏。说三乘权小之法。大师子音。说别圆大乘之法。云雷音。大云雷音。《法华》云。譬如大云。遍覆一切。云譬如来现身。雷譬戒德震动。现身有大有小。故以云雷大云雷别之。

戊二集众分二。己初、结前起后；二、正集大众。今初

出如是等不可说不可说音已，娑婆世界，及他方国土，有无量亿天龙鬼神，亦集到忉利天宫。

出如是等不可说不可说音已。此句是结前。如是是指十六种音。等者。等上种种二字。不可说。极显数量之多。出音已竟。娑婆至天宫。此句起后。世界是总称。娑婆为别名。梵云娑婆。此云堪忍。谓此土众生。能忍烦恼

生死之苦。他方国土。此是依报。天龙鬼神是正报。无量亿。显数之多。及者。不但此娑婆世界。天龙鬼神皆来集会。即他方国土。有无量亿天龙鬼神。亦来集会。盖此光音。凡有缘者。虽远能睹。此由地藏分身化人。时时不废。此辈宿世根熟。天性相关。所以睹光闻音。同时来集。然鬼畜之身。能预法会。此则乘急戒缓之流。天人同来。是乘戒俱急之流。皆未出生死。并是轻报泥犁。焉得不求度脱。来临法会耶。

己二正集众分三。庚初、天龙等众；二、一切神众；三、大鬼王众。

庚初分二。辛初、别列三界天众；二、总指八部等众。

辛初分三。壬初、六欲天；二、色界天；三、无色天。今初

所谓四天王天，忉利天，须焰摩天，兜率陀天，化乐天，他化自在天。

所谓二字是总指。自四天王天至他化自在天。同名六欲天。欲即淫欲。一切众生，皆因淫欲而正性命。欲爱故生。欲爱故死。《俱舍颂》云。六受欲交抱。执手笑视淫。谓六受欲。四天形交。忉利以风为事。夜摩抱持。兜率执手。化乐视笑。他化但视。虽取境不同。均之未离情欲。故通名六欲天也。一四天王天。上升之元首。下界之初天。居须弥山腰。离人间四万二千由旬。邻于日月。为帝释外臣。镇于四方。东方持国。南方增长。西方广目。北方多闻。身長七十五丈。寿五百岁。以人间五十岁。为



四天王天一昼夜。彼亦以三十日为一个月。十二月为一岁。约人间九百万岁。此六天身量寿量。皆例此培增。后不繁记。因中由布施持不杀戒。好乐听法。供养善人。得生此天。忉利如前释。居须山顶。离人间八万四千由旬。因中但修上品十善。得生此天。须焰摩天。又云夜摩。此云时分。日月上照忉利。下照地上。地居众生。由日月而分昼夜。天人依报正报。皆有光明。无须日月。今以莲花开合而分昼夜。故云时分。此为空居之首天。由于人间动少静多。命终之后。于虚空中。朗然安住。可知由此以上。至他化自在天。皆须兼修禅定。如未到定等。兜率陀天。此云妙足。于五欲知止足故。此天分内外院。外院是天人所居。还受三灾。内院补处大士所居。则三灾不坏。因中布施持戒。爱乐涅槃。心著功德。得生此天。化乐天。自化五尘娱乐故。因中布施持戒多闻。自力生活。生化乐天。他化自在天。此天不须自化。夺他所化而自娱乐。因中由清净心。布施持戒。好乐多闻。惟不能自苦。从他求乐。得生此天。又云即魔王天。但魔正居六天之上。色界之下。因定力殊胜。可至色界。因未离情欲。故寄居于他化天中。

壬二、色界天，亦称四禅天、梵云禅那、此云定、摄心专注、不流散故。

梵众天，梵辅天，大梵天，少光天，无量光天，光音天，少净天，无量净天，遍净天，福生天，福爱天，广果天，无想天，无烦天，无热天，善见天，善现天，色究竟天，

摩醯首罗天。

初禅三天。梵众天。梵辅天。正报之身。是清净色。非如欲界垢染色也。梵者。净也。无欲染故。十八天皆净无欲。此当其首。偏得净名。梵众是民。梵辅是臣。大梵即王也。主领大千。又初禅有言语号令。能统上冠下故也。诸禅各以报胜为主。无统王义。梵众身半由旬。寿二十小劫。梵辅身一由旬。寿四十小劫。大梵身一由旬半。寿六十小劫。因中修五支林功德。觉支、观支、喜支、乐支、一心支。得生此天。二禅三天。少光天。无量光天。光音天。少光，光明少故。无量光，光明转增。无限量故。光音以光当语音故。少光天寿二大劫。身长二由旬。无量光天寿四大劫。身四由旬。光音天寿八大劫。身八由旬。因中修四支林功德。内净、喜、乐、一心。得生此天。三禅三天。少净。无量净。遍净。少净离喜受乐为净。未及上位为少。无量净胜于前。不可量故。遍净乐受最胜。净周普故。夫求生天。以乐为本。诸禅之乐。无过三禅。《止观》云。三禅乐如泉石。水自中生。因中修五支林功德。一舍支、二念支、三慧支、四乐支、五一心支。少净天身长十六由旬。寿十六大劫。无量净。遍净。以此培增。四禅十天。福生、福爱、广果、无想、无烦、无热、善见、善现、色究竟、摩醯首罗天。诸经多明九天。于色究竟天。别列摩醯首罗天。此云大自在。八臂三眼。骑白牛。居色界顶。熏禅最胜。于定得自在。《宝雨经》云。复有净居天众。摩醯首罗而为上首。可知即色究竟天也。此九天中。三是凡夫居处。无想是外道所居。五



是三果居处。福生者。修胜福力。方生此天。从因得名。

福爱者。前天以舍乐为福。今舍心转胜。爱乐此福。与前福生有浅深之别。于此天中。有二歧路。若于先心。无量净光。福德圆明。修证而住。名广果天。凡夫之果。无胜过故。若于先心。双厌苦乐。身心俱灭。经五百劫。名无想天。外道以此为究竟。不知以石压草。根总未死。劫尽依然轮回。此中复有五不还天。三果圣人所居。已断欲界思尽。故不来欲界。上界思未尽故。不出三界。寄居四禅天中。彼四禅天人。独有钦闻。不能知见。如今世间。旷野深山。圣地道场。皆罗汉所住。世间粗人。所不能见。无烦者。三界见尽。欲界九品思惑亦尽。虽有上地思惑未尽。不为外境所转。故云无烦。无热者。热即是烦。本来不二。无烦绝外境。无热绝内心。浅深异耳。善见者。十方世界。妙见圆澄。更无尘象。见极明彻故。善现者。善能变化也。色究竟者。色界以此为究竟故。摩醯首罗天。在色究竟中。如前料简中明。

壬三、无色天，若灰色笼、修四空定、生四空天、名无色界。

乃至非想非非想处天。

乃至，超略之词。此中应列四天之名。初空处天。从第四禅。欲入空处。必作方便。灭三种色。一、可见可对色。色尘。二、不可见可对色。五根四尘。三、不可见无对色。法入少分无表色也。此之三色。并在色界。故灭此三。初、离三种色心。缘虚空。与空相应。名虚空定。二、识处。又厌空不自在。舍空缘识。以识为处。正从所

缘处受名。故名识处。三、不用处。修此定时。不用一切内外境界。外境名空。内境名识。舍此二境。故云不用处。四、非想非非想处。想是识处。非想是不用处。上两非字。乃双遣之词。谓非识处之有想。非不用处之非想也。寿八万大劫。为三界顶天。三果钝根。游于四空。八万劫后。方超生死。利者。在色究竟天。即得超度。凡夫纵入非非想定。八万大劫。报尽散入诸趣。故虽三界顶天。不足为奇。

辛二、总指八部众

一切天众，龙众，鬼神等众，悉来集会。

前别列三界诸天。今总云一切天众。龙有四种。一守天宫。二行雨。三地龙。四守轮王福藏。各有眷属。鬼神。贵为神。贱为鬼。有三品九类。各有眷属。等者。指八部众也。无论此界他方。诸天神众。凡昔与地藏有缘者。皆睹光闻音。普来集会。

庚二、一切神众

复有他方国土，及娑婆世界，海神，江神，河神，树神，山神，地神，川泽神，苗稼神，昼神，夜神，空神，天神，饮食神，草木神，如是等神，皆来集会。

复有，对前而言。不但天龙八部云集。复有他方国土诸神众。及娑婆世界诸神众。此等诸神。各有攸司。或由业生。或由权现。海神。为官海之神。江河有神可知。树神。依树而住。有树则乐。无树则苦。《僧伽律》云。树大与人等者。皆有神依止。故《四分律》结此丘。不得斫



大树。地神。如坚牢地神。川，穿也。泽，润也。皆各有神。禾之未秀曰苗。未实曰稼。据一苗稼。百谷通收。此方以后稷为神。以教民稼穡也。昼神、夜神，值日夜神也。空神。名舜若多。应是主空神。天神。官天宫。饮食神。如灶君等。草木神。最上如雪山忍草菩提树神。已上所列。皆举总名。细分无量。故云如是等神。咸皆来集忉利法会。

庚三、大鬼王众

复有他方国土，及娑婆世界，诸大鬼王，所谓恶目鬼王，啖血鬼王，啖精气鬼王，啖胎卵鬼王，行病鬼王，摄毒鬼王，慈心鬼王，福利鬼王，大受敬鬼王，如是等鬼王，皆来集会。

复有二字。承上而言。他方国土。及娑婆世界。是所来之处。诸大鬼王。此句总标。所谓下。别列王名。大鬼王。有威德之鬼。此由前身行施。得受威报。心多谄曲。故受鬼道。恶目。心之慈忍。由目而现。啖血。《正法念经》名食血鬼。啖精气。啖人及五谷精气。啖胎卵。生产之后。有无数恶鬼。食啖胎衣。行病。行瘟疫之使者。摄毒。毒者。一切毒害。皆能收摄。不使害人。慈心。常以乐事施人。念念爱护众生。福利鬼王。每以利益之事与人。大受敬。见有修行者。恭敬礼拜。常相爱护。如是等者。立名善恶不同。为行慈忍有异。然皆鬼身。而来闻法。止观谓乘急戒缓者。以三途身见佛闻法。今经无人道众生来会。此由戒急乘缓故。虽生善道。未得闻法也。

丁三问答释疑序分二。戊初、略问答以发起；二、广

问答以发起。戊初分二。

己初、问答所集众数；二、点示能度本尊。

己初分三。庚初、如来以众数问；二、文殊以神力答；三、世尊以佛眼证。今初

尔时释迦牟尼佛，告文殊师利法王子菩萨摩訶萨，汝观是一切诸佛菩萨，及天龙鬼神，此世界，他世界，此国土，他国土，如是今来集会到忉利天者，汝知数不。

此广略二种问答。为正宗之发起。以释大众之疑。众疑有二。一者忉利所集诸佛菩萨为何人化度。佛告文殊。是地藏菩萨之所化度。众又疑。地藏自居因位。何能成就如许诸佛菩萨。佛因对文殊。历述地藏过去世为长者子。为国王。为婆罗门女。为光目女。皆修广大愿行。度脱众生。及至十三《嘱累品》。皆由此发起。故此广略二番问答。实为一经之关键也。尔时至摩訶萨。为结集经家所安。

尔时者。正当诸佛菩萨。天龙鬼神毕集之时。释迦世尊。告示文殊师利。文殊师利，此云妙吉祥。生时现十种祥瑞。一者光明满室。二者甘露盈庭。三者地涌七珍。四者神开伏藏。五者鸡生凤子。六者猪娩龙豚。七者马产麒麟。八者牛生白泽。九者仓变金粟。十者象具六牙。故称妙吉祥。又云妙德。了了见佛性。犹如妙德等。则知文殊久证佛果。若等觉大士见佛性。犹未了了也。法王即佛。

《法华》云。我为法王。于法自在。子指大士。以能辅佛扬化。荷担如来家业故。菩萨摩訶萨。简非权小菩萨也。汝文殊师利。用法眼观此忉利天宫所集。一切诸佛菩萨。



此是为母说法。未放光云之前。由十方无量世界。而来集会者。并及由含笑放光所集。此世界他世界。此国土他国土。无量亿天龙鬼神。此是第二番集会者。如是二次所集。诸佛菩萨。天龙鬼神。具来集到忉利天宫者。汝能知其数不。

庚二、文殊以神力答

文殊师利白佛言，世尊，若以我神力，千劫测度不能得知。

初句经家所叙。白。禀白也。以下对上曰白。世尊今问天宫所集之众。我文殊用神通之力。纵经千劫测量计度。亦不能得知其数。

庚三、世尊以佛眼证

佛告文殊师利，吾以佛眼观故，犹不尽数。

此正抑果扬因。以显地藏度生之众。眼有五种。一肉眼。二天眼。三慧眼。四法眼。五佛眼。力用不同。天眼通非碍。肉眼碍非通。法眼唯观俗。慧眼了知空。佛眼如千日。照异体还同。五眼之中。佛眼最胜。今云吾释迦世尊。用佛眼观故。犹且不能尽数。况其余四眼耶。

己二、点示能度本尊

此皆是地藏菩萨久远劫来，已度，当度，未度，已成就，当成就，未成就。

此是总指忉利所集之众。皆是地藏菩萨之所度脱。须知地藏非仅现世度生。实于过去久远劫来。已度者。已成就佛果。即十方世界不可说诸佛是。当今化度者。当成就

佛果。即十方不可说诸菩萨是。未来化度者。未来须成就佛果。即此世界他世界无量亿天龙鬼神是。所谓种熟脱三。时时不废。机有迟速。度有前后。《大论》云。譬如摇树取果。熟者前堕。若未熟者。更复后摇。必须度尽众生。而后已也。

戊二广问答以发起分二。己初、文殊设疑问因地；二、世尊举因答度人。

己初分二。庚初、设词兴问；二、愿说行愿。

庚初分二。辛初、明己智信；二、举众疑谤。今初

文殊师利白佛言，世尊，我已过去久修善根，证无碍智，闻佛所言，即当信受。

文殊过去世为龙种上尊王佛。以本愿力。现菩萨相。化度众生。故云久修善根。证无碍智。善根犹云德本。实相为众德之本。修则不出定慧。《法华》云。定慧力庄严。则实相为所庄严。定慧为能庄严。所谓从性起修。全修在性。性修不二。方名圆修。如此圆修。不只一劫二劫。已于过去世。久久修习。已证四无碍智。今闻佛所言地藏度生之事。自可信受无疑。

辛二、举众疑谤

小果声闻，天龙八部，及未来世诸众生等，虽闻如来诚实之语，必怀疑惑，设使顶受，未免兴谤。

此正代众疑请。良以菩萨发心。不为自利。己虽无疑。今众中有疑。故须请佛。不但益现。且益未来。先举疑谤之机。一者小果声闻。二者天龙八部。三者未来众



生。闻四谛音声。证小乘果位。故云小果声闻。但断见思。但见真谛。智慧浅狭。不能知大乘菩萨。累劫度生之事。小尚不知。况复天龙群萌之类。在佛世犹多疑谤。况灭后一切众生。故此等众生。虽闻如来金口诚言。语此忉利所集之众。皆由地藏度脱。则内心必怀疑惑。以地藏自未成佛。何能教化众生成佛。设使读诵本经。顶戴受持。以疑怀未遣。不免兴谤。因谤堕苦。为此兴问。

庚二、愿说行愿

唯愿世尊，广说地藏菩萨摩诃萨，因地作何行，立何愿，而能成就不思议事。

文殊正大作家。夫万里程途。不离当初一步。因地不正。果招迂曲。故唯愿世尊。广为宣说。地藏菩萨因地中。最初发心时。作何行。立何愿。盖愿之与行。如鸟两翼。缺一不可。愿是能引。行是起作。是二相合。则有所至。二何字。是疑问之词。以四教菩萨。莫不修行发愿。若前三教。偏权行愿。俱属生灭因缘。若以生灭心为本修因。如何圆成果地不生灭性。故须问地藏最初立何行愿。而能成就如此不思议事。不思议事者。即忉利所集。诸佛菩萨。皆由地藏菩萨之所成就也。

己二世尊举因答度人分二。庚初、略赞功德；二、广说行愿。

庚初分二。辛初、明大小果位功德；二、示闻赞供像功德。

辛初分三。壬初、举喻；二、正明；三、结显。今初

佛告文殊师利，譬如三千大千世界所有草木丛林，稻麻竹苇，山石微尘，一物一数，作一恒河，一恒河沙，一沙之界，一界之内，一尘一劫，一劫之内，所积尘数，尽充为劫。

譬者，比况。如者，同也。三千大千世界。以显世界广阔。《杂阿含》中。分别说。千日、千月、千四大部洲。乃至千大梵天。以初禅天为顶。是名小千世界。如是一小千世界。二小千世界。积至千小千世界。以二禅为顶。为一中千世界。如此一中千世界。二中千世界。积至千中千世界。以三禅为顶。名大千世界。合三种千。为一大千世界也。故云三千大千世界。此世界所有草木丛林。稻麻竹苇。山石微尘。每一对象为一数。宇宙之大。品类之盛。则数已无量矣。以一数作一恒河。数既无量。恒河亦无量矣。一恒河沙。已属无量。况一一恒河中沙。每一粒沙。为一世界。沙既无量。世界亦无量矣。一一世界之内。所有微尘。一尘为一劫。尘既无量。劫亦无量。一一劫内。所积微尘之数。此尘尽充为劫。一尘一劫。是则尘数更复无量。劫数亦更无量矣。

壬二、正明

地藏菩萨证十地果位以来，千倍多于上喻，何况地藏菩萨在声闻，辟支佛地。

先出大乘果位功德。次况小乘果位功德。若论圆教。自初住至等觉。皆真因位。今且从别住行向三。为贤位。十地为圣位。贤位为因。圣位为果。一欢喜地。十回向后心。用中道观智。破一分无明。证一分三德。如此至十法



云地。各破一品无明。证一分三德。而地藏菩萨。证十地果位。迨至今日。其劫数长远。千倍多于上来尘劫之喻。何况在声闻辟支佛地之小果耶。

壬三、结显

文殊师利，此菩萨威神誓愿，不可思议。

文殊师利。汝前问地藏菩萨。因地立何愿。修何行。而此菩萨。威德神通。所有誓愿。皆不可思议。

辛二、示闻赞供像功德

若未来世，有善男子善女人，闻是菩萨名字，或赞叹，或瞻礼，或称名，或供养，乃至彩画刻镂塑漆形像，是人当得百返生于三十三天，永不堕恶道。

此文分四节。初、出时。即未来世。佛灭度后。法弱魔强之时也。二、能修供人。是有善根男子女人。宿植深厚。得闻地藏菩萨威神之名。深信不疑。三、所修供养。而供养不出三业。或口业赞叹。或身业瞻礼。或称念名号。或以四事供养。乃至以五彩画菩萨形像。或以木刻镂菩萨形像。或以泥塑菩萨形像。或用胶漆修饰形像。造像功德。不但自利。兼亦利他。四、出其果报。是人即指如上善人。无论闻名。乃至造像功德。当百返生于三十三天。自此以后。永不堕于三恶道中。常在人天道中受生。此皆地藏菩萨。威神誓愿不可思议故也。或疑本经。但说人天因果。不知《嘱累品》中。明二十八种利益。七种利益。总使众生。究竟成佛。然世人多以天上为乐。故方便说之。

庚二广说行愿分二。辛初、明长者求佛相好；二、示圣女忆母感佛。

辛初分二。壬初、腾昔见佛发愿；二、示今因位度生。

壬初分二。癸初、叙远劫佛号；二、正问因发愿。今初

文殊师利，是地藏菩萨摩诃萨，于过去久远不可说不可说劫前，身为大长者子。时世有佛，号曰师子奋迅具足万行如来。

此叙最初发心之由。此地藏菩萨。在过去久远不可说不可说劫前。如此劫数。唯佛能知。如来以三达智知。五眼圆见。观彼久远。犹如今日。此时地藏菩萨身为大长者子。长者。年耆德艾之通称。《法华文句》，具明十德：一、姓贵；二、位高；三、大富；四、威猛；五、智深；六、年耆；七、行净；八、礼备；九、上叹；十、下归。具斯十德。方称长者。子者。尊称也。如此方孔老称子。是时有佛出世。号曰师子奋迅具足万行如来。此之名号。有通有别。如来是通号。师子等八字是别号。师子奋迅是三昧名。有法有喻。师子为兽中之王。奋者奋去尘土。迅即迅捷。前走却走。捷疾异于诸兽。此三昧亦尔。能奋去无知之惑。次第出八禅定。捷疾无间。具足万行者。一即一切名具。一切即一名足。因修万行。果成万德。此从因立名也。

癸二正问因发愿分二。子初、问得相之因；二、发度生之愿。

子初分二。丑初、长者问佛；二、佛示长者。今初



时长者子，见佛相好，千福庄严，因问彼佛，作何行愿，而得此相。

时。即长者遇佛之时。如优昙华。时一现耳。有大善根。方得值遇。见师子奋迅如来。有三十二相。八十种好。相者览而可别。好者观之可爱。知此相好。必由千福庄严。因修百福感一相。三千二百种福。始具三十二相。福义多途。难可定判。菩萨修十善。各有五心。谓下。中。上。上上。上中上。初发五心。乃至具足五心。如是百心。名为百福。又云大千盲人治瘥。为一福。如此三千二百福。修成三十二大人相。故云千福庄严。但不知此福。由何培植。因问彼师子奋迅如来。因地之中。作何行。立何愿。而得此相。则不但威神由行愿而成。即果上妙相。亦由行愿而得也。

丑二、佛示长者

时师子奋迅具足万行如来告长者子，欲证此身，当须久远度脱一切受苦众生。

当时。彼师子奋迅具足万行如来。告长者子。欲得证此相好之身。今告示汝。当须久远度脱一切受苦众生。此句话。极须留神。佛之相好。从众生中培植。则众生为成佛之增上缘。故用当须二字。谓必当须要。乃决定不易之词。久远明其时劫。一切受苦众生。为所化之机。尽令度脱。方得此相。

子二、发度生之愿

文殊师利，时长者子因发愿言，我今尽未来际不可计劫，

为是罪苦六道众生，广设方便，尽令解脱，而我自身方成佛道。

世尊告文殊师利。此时长者子。因由彼佛开示。即发愿言。我自今以后。尽未来际不可计劫。此句应上久远二字来。夫未来无尽。未来又有未来。今欲穷其边际。则所经劫数。不可计算。此久远劫中。所为何事。为此罪苦六道众生。此句明所化之机。应上一切受苦众生句来。罪是因。苦是果。由惑业为因。而感生死苦果。六道。即天、人、阿修罗、地狱、饿鬼、畜生。此六种称为道者。由善恶业。轮转不息。众生有苦。即关菩萨悲心。故须广设方便。尽令解脱。此句应上度脱二字来。方便者。即方法便宜。广设者。开广施設。权实诸法。逗宜一切众生。解脱言尽令者。如小《般若》云。若胎卵湿化等。我皆令入无余涅槃而灭度之。众生度尽。而后我身方成佛道。

壬二、示今因位度生

以是于彼佛前立斯大愿，于今百千万亿那由他不可说劫，尚为菩萨。

由此地藏菩萨。于彼师子奋迅具足万行如来前。立如此大愿。故于今百千万亿那由他不可说劫。尚为菩萨。

辛二示圣女忆母感佛分二。壬初、腾昔行愿；二、结会古今。

壬初分二。癸初、举所行因事；二、显所发弘愿。

癸初分二。子初、举佛号劫寿；二、述圣女因行。今初



又于过去不可思议阿僧祇劫，时世有佛，号曰觉华定自在王如来，彼佛寿命四百千万亿阿僧祇劫。

又字对上第一翻为长者子。过去不可思议阿僧祇劫。此时亦有佛出世。号曰觉华定自在王。从因立名。因中修七觉净华。故于禅定。得大自在。彼觉华定佛。寿命有四百万亿阿僧祇劫。佛寿长短。应众生机。既有数量。亦是有尽。佛有三身。寿量不同。法身约理。无始无终。报身约智。智冥于理。有始无终。应身应同众生。随缘奢促。有始有终。今是应身寿量。故下文云。像法之中。显见彼佛灭后像教之时也。

子二述圣女因行分二。丑初、述生前劝母正见；二、述死后忆母生界。

丑初分二。寅初、明圣女福厚；二、明邪母罪重。今初

像法之中，有一婆罗门女，宿福深厚，众所钦敬，行住坐卧，诸天卫护。

像对正而言。形似正法也。彼觉华定佛灭后。在像法之中。有一姓婆罗门女人。宿世福德深厚。为大众之所钦敬。行住坐卧。常感诸天卫护。

寅二明邪母罪重分二。卯初、圣女方便劝母；二、邪母罪重堕苦。今初

其母信邪，常轻三宝。是时圣女广说方便。劝诱其母。令生正见。

女之母信受外道邪见。因是常轻毁三宝。此时圣女。

用种种方法。劝诱其母。令生正见。

卯二、邪母罪重堕苦

而此女母，未全生信，不久命终，魂神堕在无间地狱。

然而此女母。经圣女劝诱。有时生信。有时不信。未能全生正信。若寿命长。久久劝诱。能舍邪见。入于正见。可惜不久命终。因在世不信因果。魂神随业。堕在无间地狱。

丑二述死后忆母生界分二。寅初、卖宅兴供感空声慰谕；二、受教念佛梦鬼王指示。

寅初分二。卯初、为母卖宅兴供；二、见像默念空示。今初

时婆罗门女，知母在世不信因果，计当随业，必生恶趣。遂卖家宅，广求香华，及诸供具，于先佛塔寺，大兴供养。

时指母亡后之时。知母在世。不信因果。知与痴相对。其母由愚痴故。不信因果。而起邪见。造诸恶业。以为死后无报。今圣女明知因果不昧。计度其母。必当随所造恶业。而感生恶趣。欲度慈母沉沦之苦。不凭我佛之慈。曷遂超升之愿。家宅为安身之处。今尽卖家宅。可谓竭力兴供。故能感佛。以此贸易香华。而云广求者。《行愿品》云。末香烧香与灯烛。一一皆如妙高聚。诸供具不出五尘等类。先佛指过去佛。塔寺一往而言。安舍利名塔。安佛像曰寺。亦不尽然也。

卯二见像默念空示分二。辰初、见佛兴疑；二、空声示处。



辰初分二。巳初、见佛礼敬；二、私念疑情。今初

见觉华定自在王如来，其形像在一寺中，塑画威容，端严毕备。时婆罗门女，瞻礼尊容，倍生敬仰。

像法之中。塔寺坚固。先佛塔寺。自然甚多。今圣女见觉华定自在王如来。其佛形像在一塔寺之中。塑画佛像。威仪容貌。端正庄严。相好圆满。是时婆罗门女。瞻望礼拜世尊容颜。倍益生于恭敬仰慕之心。

巳二、私念疑情

私自念言，佛名大觉，具一切智，若在世时，我母死后，傥来问佛，必知处所。

私者。内所怀念。人所不知。自作念言。今见佛像。如此相好。皆由因地福慧庄严。故称叹云。佛名大觉。具一切智。夫众生心性。与佛不殊。奈众生自无智慧力。复无善知识为之开示。迷此不思議佛性。为生死根本。倘能返妄归真。惑尽理显。成究竟佛。方名大觉。一切智摄道种智一切种智。三智具足。无不通达。设若佛在世时。我母死后。傥来问佛。母之生处。佛必知之。垂慈指示也。

辰二空声示处分二。巳初、泣恋闻声；二、闻声自扑。

巳初分三。午初、空声慰谕；二、问空何神；三、空声告示。今初

时婆罗门女，垂泣良久，瞻恋如来。忽闻空中声曰，泣者圣女，勿至悲哀，我今示汝母之去处。

若佛在世。必蒙指示。母之生处。可惜佛已灭度。当

时婆罗门女。思念及此。不觉垂泪涕泣。愈想愈悲。哭泣不已。故云良久。两目瞻望如来。中心恋慕如来。冀佛必示我母生处。而度脱之也。古人云。大孝动天。至诚感佛。倏忽之间。空中有声。而慰之曰。泣者圣女。勿至悲泣而哀恋也。汝既行大孝。倾家兴供。泣恋瞻依。我今示汝母之去处。

午二、问空何神

婆罗门女合掌向空，而白空曰，是何神德，宽我忧虑。我自失母已来，昼夜忆恋，无处可问，知母生界。

婆罗门女。闻此慰谕。即时合掌向空。仰白空曰。不知空中。是何神圣。宽我忧虑。回忆我自失母以来。从日至夜。从夜至日。忆恋之情。无时或释。奈以无处可问。不知母之生界。今闻空声。示母去处。何异失物再得。失道引归。故云宽我忧虑。

午三、空声告示

时空中有声，再报女曰，我是汝所瞻礼者，过去觉华定自在王如来。见汝忆母，倍于常情众生之分，故来告示。

当时空中有声。再报女曰。我非别神。即是汝所瞻礼者。过去觉华定自在王佛是。佛既入灭。何能现声。可知佛本不灭。众生机尽。见佛入灭。《法华》云。常在灵鹫山。及余诸住处。见汝忆母。倍于常情众生之分者。夫众生常情以此身为父母遗体。十月怀胎。三年乳哺。推干就湿。劬劳情深。诗云。哀哀父母。生我劬劳。欲报之恩。



昊天罔极。故亲死而子忆。亦众生之常情。从未有如圣女。捐家兴供。礼佛求知。借施福而荐亲。仗佛慈而示处。非常情所能企及。故云倍也。以是之故。特来告示。

已二闻声自扑分二。午初、求说母生界；二、示返舍念佛。今初

婆罗门女闻此声已，举身自扑，支节皆损，左右扶侍，良久方苏，而白空曰，愿佛慈愍，速说我母生界，我今身心将死不久。

闻此声已者。即闻空中告示之声也。前不知是何神德。今既知即是觉华定自在王如来。感佛深恩。不觉通身拜扑于地。如太山崩。不顾形骸。遂致支体骨节。悉皆损坏。如同死去。左右之人。即扶起而侍奉之。良久方渐苏醒。即白空曰。唯愿世尊。慈悲哀愍。速说我母生界。何以故。今我此身。支节皆损。将死不久也。

午二、示返舍念佛

时觉华定自在王如来，告圣女曰，汝供养毕，但早返舍，端坐思惟吾之名号，即当知母所生去处。

当时佛告示圣女。汝供养已。但早还舍。端身正坐。思惟觉华定自在王如来名号。仗佛力故。即当知母所生去处。何以佛但示其法则。不直告其母生处。良以未来众生。不信有地狱。故令圣女亲至狱所。然后转示世人。令生信心。

寅二受教念佛梦鬼王指示分二。卯初、归舍忆母念佛；二、到狱知母生处。今初

时婆罗门女，寻礼佛已，即归其舍。以忆母故，端坐念觉华定自在王如来，经一日一夜。

是时婆罗门女。蒙佛示其返舍念佛。即能知母生处。寻礼佛已。即归其舍。以忆母故。端坐正念觉华定自在王如来。如此一心不乱。经一日一夜。

卯二到狱知母生处分三。辰初、身到狱海；二、鬼王迎赞；三、问答狱处。

辰初分二。巳初、见狱海恶相；二、念佛力无惧。

巳初分二。午初、恶兽飞驰食啖；二、夜叉形异畏视。今初

忽见自身到一海边，其水涌沸，多诸恶兽，尽复铁身，飞走海上，东西驰逐。见诸男子女人，百千万数，出没海中，被诸恶兽争取食啖。

此明定中见冥界之相。本在舍内。一心念佛。倏忽之间。见自身不在家内。而在一大海边。海中之水。涌沸异常。多诸恶兽。全是铁身。在于海上。或飞或走。自东而西。由南至北。互相驰逐。初不知其所逐何物。留神谛视。见诸男子女人。百千万数。沉在海中。有时随波涌出。有时随波没溺。其涌出时。多被恶兽。争取食啖。

午二、夜叉形异畏视

又见夜叉，其形各异，或多手多眼，多足多头，口牙外出，利刃如剑，驱诸罪人，使近恶兽，复自搏攫，头足相就。其形万类，不敢久视。

梵云夜叉。此云疾捷。即地狱鬼。其形各异。此句总



标。其头或如牛马狮象虎豹豺狼。形形各异。或有二手。至千手。或有一眼。而至千眼。口牙外出。如同利刃。亦如利剑。其有罪人。逃至岸边。不知复遭恶鬼。驱诸罪人。使近恶兽。或复恶鬼自用手爪。搏攫罪人。头足相就。其中凄惨之状。千形万类。不敢久视。

已二、念佛力无惧

时婆罗门女，以念佛力故，自然无惧。

以。因也。因念佛力。虽见众形。自然无惧。盖知诸境由心。心既本空。境亦何有。心境既亡。惧自何生。

辰二、鬼王迎赞

有一鬼王，名曰无毒，稽首来迎，白圣女曰，善哉，菩萨，何缘来此。

鬼王者。管理夜叉恶鬼。名曰无毒。此鬼存心愍物。权现鬼身。心无毒害。彰此嘉名。前列众中。有摄毒鬼王。后有恶毒鬼王。毒名虽同。用意各别。原其利人。无有异也。稽首者。以首至地。稽留少顷。极显恭敬之意。今观圣女威仪。知非罪人。故云善哉菩萨。何因缘故。而来至此。

辰三问答狱处分二。已初、通问地狱有无；二、正问我母生界。

已初分二。午初、略问答；二、广问答。今初

时婆罗门女问鬼王曰，此是何处。无毒答曰，此是大铁围山西面第一重海。

初、圣女问。二、鬼王答。先鬼王问圣女何缘来此。

今不答来此缘由。乃先问鬼王此是何处。以所见境界。迥异寻常。心怀惊疑。即欲知之。故先问也。鬼王无毒答云。此是大铁围山外。西面第一重海。四洲中间。为须弥山。其外有香水海。香水海外。复有一重七金山。如此有七重香水海。七重七金山。第七重七金山外。为咸水海。此咸水海中。有四大部洲。咸水海外。则有一重铁围山。入水三百十二由旬。出水亦然。广亦如是。

午二广问答分二。未初、问答地狱有无；二、问答地狱何在。

未初分三。申初、问答狱事实不；二、问答我何到狱；三、问答狱海苦境。今初

圣女问曰，我闻铁围之内，地狱在中，是事实不。无毒答曰，实有地狱。

圣女闻说。此是铁围山。西面第一重海。因问鬼王。我闻佛经中说。铁围山内。地狱在中。是事实否。无毒答曰。实有地狱。

申二、问答我何到狱

圣女问曰，我今云何得到狱所。无毒答曰，若非威神，即须业力，非此二事，终不能到。

地狱者。拘罪恶人之狴牢。圣女自思生平不作恶业。因问鬼王。我今因何得到狱所。无毒答曰。到此者。有二种人。一者威神。二者业力。有威神之力。或度生而来此。有恶业成熟。应受地狱之苦。是故到此。除此两事。终无有能到者。今圣女系仗佛威神之力。得至狱所。非自神力。故不知是狱。亦非恶业之力。若由业生狱者。初入



时。亦知此是地狱。由何业来此。故无毒初见圣女。有善哉菩萨。何缘来此之问。

申三问答狱海苦境分二。酉初、约境疑问；二、据事直答。今初

圣女又问，此水何缘，而乃涌沸，多诸罪人，及以恶兽。

此圣女述所见之境。以问鬼王。凡有三种疑问。一者此大海水何因缘故而乃涌沸。二者何缘水中多诸罪人。三者何缘海边水内多诸恶兽。何缘二字。正是疑词。下文鬼王言三业恶因之所招感。共号业海。其处是也。此正答其所问。汝问何缘。乃由恶业因缘之所招感。故有业海也。

酉二据事直答分三。戌初、正答；二、指类；三、结名。今初

无毒答曰，此是阎浮提造恶众生新死之者，经四十九日后，无人继嗣，为作功德，救拔苦难，生时又无善因，当据本业所感地狱，自然先渡此海。

无毒答圣女曰。此海中罪人。是阎浮提。造恶众生。阎浮提即南瞻部洲。初死之人。前阴已谢。后阴未受。在此时期。有中阴身。寿命七天为期。若七日后。仍未决定受生之处。次复七日。最长不过七七。若四十九日后。全无人继续承嗣。为新死者作诸功德。救拔其苦难。而自己在生。又无善业因缘。当据本生。所作恶业。应感地狱之报。在未至地狱之前。自然先渡此大海。

戌二、指类

海东十万由旬，又有一海，其苦倍此。彼海之东，又有一海，其苦复倍。

前云。此是铁围西面。第一重海。既有第一，自有第二第三。今云此海之东。过十万由旬。又有一海。此为第二重海。其苦毒更倍于此。彼第二重海之东。过十万由旬。又有一海。此为第三重海。其苦毒复倍第二重海。

戌三、结名

三业恶因之所招感，共号业海，其处是也。

三。即身口意三为能造。十恶业为所造。此非阎罗王所作。由自身口意三造作。十恶为因。招此狱海之报。皆自作受。以此恶业为因。招感狱海之报。以是之故。此三重海。皆号业海。今圣女所见之海。乃其中之一处也。

未二、问答地狱何在

圣女又问鬼王无毒曰，地狱何在。无毒答曰，三海之内，是大地狱，其数百千，各各差别。所谓大者，具有十八。次有五百，苦毒无量。次有千百，亦无量苦。

前鬼王云。铁围山内。实有地狱。圣女因此又问鬼王。地狱今在何处。无毒答曰。即此三海之内。是大地狱。前云所感地狱。自然先度此海。又云。海东十万由旬。又有一海。若据此文。则三重海。在地狱门前。下列三重地狱。文相次第可知。十万由旬。非是空处。乃大地狱。大对小而言。地狱有大有小。盖处所有边正。受苦有重轻。以此分大小也。如八寒八热。是大地狱。八热狱在阎浮洲下。重累而住。受热苦恼。八寒狱在铁围山底。仰



向而住。受寒冻苦。此皆正狱。受苦极重。其余边狱。略有三处。一在山间。二在水边。三在旷野。受苦较轻。今在铁围山内。是大地狱。其数百千。各各差别。此亦总标。实则无量无边。岂只百千。略分三等。所谓大者。具有十八。次则五百。为中等。苦毒亦无量。再次有千百。虽居下等。苦毒亦无量。地狱苦毒。不忍言说。如世逆贼。为长吏所捕。被三百矛。人被一疮。举身皆痛。何况被三百疮。地狱中痛。与矛疮痛。亿亿万倍。不如地狱痛也。

已二正问我母生界分二。午初、圣女问母生趣；二、鬼王征其来历。今初

圣女又问大鬼王曰，我母死来未久，不知魂神当至何趣。

圣女知母在世。不信因果。计当随业。感生恶趣。今既亲至地狱。因问鬼王。我母死来。至今未久。不知母之魂神。当至何处。魂神内教指第八识。以来先去后作主人也。

午二鬼王征其来历分二。未初、问答行业；二、问答姓氏。今初

鬼王问圣女曰，菩萨之母，在生习何行业。圣女答曰，我母邪见，讥毁三宝。设或暂信，旋又不敬。死虽日浅，未知生处。

此王征问来历清楚。方可检查。你问母死之后。神生何处。然菩萨之母。在生作何等行业。若行善业。当生天上。不来此处。圣女答曰。我母在世。信受邪见。拨无因

果。邪与正相反。以是讥议毁谤三宝。虽经我方便劝诱。或时暂信。忽又不敬。自死至今。虽然日浅。未知魂神。生在何处。

未二问答姓氏分二。申初、问；二、答。今初

无毒问曰，菩萨之母，姓氏何等。

鬼王听女所说。知其母信邪。决在此处。但地狱中。造此等业者甚多。故即问曰。菩萨之母。姓氏何等。知姓名后方可调查。

申二答分二。酉初、圣女直答姓氏；二、鬼王委说生天。今初

圣女答曰，我父我母，俱婆罗门种，父号尸罗善现，母号悦帝利。

鬼王但问其母姓氏。今圣女兼答父姓氏者。良以母必从父也。圣女答曰。我父我母。俱婆罗门姓。父号尸罗善现。母号悦帝利是。

酉二鬼王委说生天分二。戌初、正说其由；二、言毕而退。

戌初分三。亥初、愿圣者返本；二、明罪女生天；三、示同罪受乐。今初

无毒合掌启菩萨曰，愿圣者却返本处，无至忧忆悲恋。

无毒听说。是悦帝利女。知是孝女。即生恭敬心。两手合掌。启禀菩萨。唯愿圣者。却还自舍。此是地狱。非可久居。不须为母忧虑思忆。悲泣恋慕。



亥二、明罪女生天

悦帝利罪女，生天以来，经今三日。云承孝顺之子，为母设供修福，布施觉华定自在王如来塔寺。

所以者何。悦帝利罪女。生天以来。于今三日矣。若论邪见之罪。千万亿劫。不得出离。此次承汝孝顺之子。为母卖宅设供。广修福业。布施觉华定自在王如来塔寺。以是功德。得生天上。

亥三、示同罪受乐

非唯菩萨之母得脱地狱，应是无间罪人，此日悉得受乐，俱同生讫。

不但菩萨之母。得脱地狱。以此善缘。泽及同人。无间狱中。所有罪人。此日悉得受乐。俱同生天矣。

戌二、言毕而退

鬼王言毕，合掌而退。

言毕合掌。敬慕之至。孝之感人深矣。

癸二、显所发弘愿

婆罗门女寻如梦归，悟此事已，便于觉华定自在王如来塔像之前，立弘誓愿，愿我尽未来劫，应有罪苦众生，广设方便，使令解脱。

昔智者大师。诵《药王品》。至是精进。是名真法供养如来。寂然入定。亲见灵山一会。俨然未散。与圣女端坐念佛。亲见狱境无异。皆于三昧中得见。今则由定而起。故云寻如梦归。谓俄尔之间。如梦归来。悟此事已

者。觉悟母亲生天之事。知恩报恩。若不说法度众生。毕竟无能报恩者。故即便到于觉华定自在王如来塔像之前。立广大誓愿。愿我尽未来劫。指度生之时。应有罪苦众生。指所化之机。广设种种方便。使诸众生。尽令解脱。

壬二、结会古今

佛告文殊师利，时鬼王无毒者，当今财首菩萨是。婆罗门女者，即地藏菩萨是。

世尊告文殊师利。古时鬼王无毒者。当今财首菩萨是。古时婆罗门女者。当今即此地藏菩萨是。此文本由文殊问佛。地藏因地。作何行。立何愿。故佛告文殊。地藏于过去世。为长者。为婆罗门女。在于佛前。发广大行愿。度脱众生。财首者。出世法财有七。一、信。二、戒。三、多闻。四、舍。五、慧。此五为宝。六、惭。七、愧。此二为守财人。而此七财。以信为首。过去世有信心。为无毒鬼王。今为财首菩萨。昔婆罗门女。由广行孝道。成地藏之身。夫人皆由父母而生。故上自国王。下至庶民。贵贱虽殊。行孝一等。如地为万物之所依止。藏为万人之所受用。是知地藏之名。全是孝顺之目。

上来《忉利天宫神通品》。为序分。因佛在忉利。为母说法。时有一无量诸佛菩萨来会。于是世尊含笑。放光出音。复有此世界。他世界。无量天龙鬼神。集于忉利。佛以所集众数。问于文殊。文殊不知。佛告文殊。此等大众。皆是地藏之所化度。文殊问佛。地藏因地作何行愿。佛乃腾昔地藏为长者子。见佛相好而发愿。为婆罗门女。度母因缘而发愿。此皆为正说之弄引。缘由既起。正事



宜彰。

乙二、正宗分

正宗文该九品。初、分身一品。明能化主。一往而言。释迦世尊。为娑婆教主。今能化主。独指地藏者。以佛灭度已后。弥勒未生之前。两楹中间。佛在忉利。将娑婆众生。付嘱地藏。故以地藏为能化主。二、业缘。业感。问狱三品。为所化机。良由众生。因惑造业。因业招苦。往来六道。流转不息。不知惑业苦三。体即三德。故得为所化之机。如众生不具佛性。教化何益。三、《如来赞叹》《利益存亡》《阎罗赞叹》三品。明度脱之缘。四、称佛正行。较施助行两品。明成佛正因。行者能知三道。即是三德。以正因助缘相资修习。速疾入于萨婆若海。此为正说之要旨。其后《地神护法》等三品。为正说之流通。则一部大意。了如指掌矣。先品题。

分身集会品第二

分身，即是化身。诸佛有三身。谓法身、报身、应身。又云二身。即真应二身。以报身合法身。名为真身。由此真身。则有应身之用。所谓功德和法身。处处应现往也。譬如明镜有光。方有照像之用。故镜体如法身。光明如报身。照像如应身。而此三身。举一即三。言三即一。一切众生。本具此三身。为无明覆蔽。不自证得。如镜无光。安有照像之功。惟诸佛究竟证此三身。故应身无量。如《法华》释迦世尊。欲开多宝佛塔。集十方分身。须三变土地而容受之。菩萨分证三身。初住菩萨。即能百佛世界。分身作佛。地藏菩萨证十地果位以来。甚大久远。且

乘本愿之力。故每一世界。化百千万亿身。每一身。度百千万亿人。虚空无尽。世界无量。则地藏分身。岂算数譬喻之所能知。集者，聚也。诸世界地藏分身。聚集于忉利也。会者，合也。无量分身。会合一身。表一心顶受。世尊殷勤付嘱。令娑婆世界。至弥勒出世以来众生。悉使解脱。永离诸苦。遇佛授记。原其分散。则从体起用。从本垂迹。集会，则摄用归体。摄迹会本也。方其分散。则一为无量。在今集会。则无量为一。一为无量。则一不为一。无量为一。则多不为多。一多无碍。舒卷自在。威德神通。不可思议。感应道交。宾主嘉会者矣。品为通题。上来已说。第二者。此品居于第二故。

乙二分四。丙初、明能化主；二、明所化机；三、明度脱缘；四、明成佛因。

丙初分二。丁初、地藏来仪；二、释迦诏告。

丁初分二。戊初、叙分身地藏；二、叙业道众机。今初

尔时百千万亿不可思，不可议，不可量，不可说无量阿僧祇世界，所有地狱处，分身地藏菩萨，俱来集在忉利天宫。

尔时者。须指如来含笑放光之时。如《法华》集分身诸佛先放光照之。光云出音。天龙鬼神同集之时。前集众中未叙者。由于佛与文殊。宾主酬对。无暇述及。故在此追叙。盖地藏菩萨。为本经之主人。若地藏不集忉利。则世尊灭后。娑婆众生。无人付嘱。故如来含笑放光。意实在此。今文先举世界。次明地藏分身。百千万亿者。以亿分四等。一、十万为亿。二、百万为亿。三、千万为亿。



四、万万为亿。今是第四之数。乃有百千万之亿。如是之数。尚难穷究。况有百千万亿不可思、不可议、不可量、不可说、无量阿僧祇世界。此正显世界难量。每一世界。凡所有地狱之处。即有一分身地藏菩萨。地狱既多。则分身莫测。如是十方沙界。分身地藏。具睹光闻音。来集忉利天宫。

戊二叙业道众机分三。己初、率众同来供佛；二、因化不退菩提；三、至天心喜观佛。今初

以如来神力故，各以方面，与诸得解脱从业道出者，亦各有千万亿那由他数，共持香华，来供养佛。

因由如来放光出音。神通之力。各各分身地藏。在于四方八面。同诸已得解脱从业道出者。各各亦有千万亿那由他数之众。共持香华。来供养佛。业道二字。有通有别。通则六道均可称业道。别则单指地狱道。

己二、因化不退菩提

彼诸同来等辈，皆因地藏菩萨教化，永不退转于阿耨多罗三藐三菩提。

彼诸得解脱。与分身地藏同来之众。此辈本在业道受苦。悉由地藏菩萨之所教化。至今永不退转于阿耨多罗三藐三菩提。阿耨多罗三藐三菩提。此云无上正等正觉。觉对凡夫之不觉。正异外道之邪觉。正等非二乘之偏觉。无上不同菩萨之有上。不退转有三。谓位不退。行不退。念不退。又有藏、通、别、圆四教不同。若圆教初住。圆证三不退。

己三、至天心喜观佛

是诸众等，久远劫来，流浪生死，六道受苦，暂无休息。以地藏菩萨广大慈悲，深誓愿故，各获果证。既至忉利，心怀踊跃，瞻仰如来，目不暂舍。

此文分三节。先明六道流转。次由地藏获证。三由感佛深恩。先叙其未遇地藏之前。此诸与地藏同来等辈。最初在凡夫地时。从无始劫来。背觉合尘。随逐见流、欲流、有流、无明流故。在六道之中。受生死苦。如浪生灭。暂无休息。幸有地藏菩萨。无缘慈悲。深宏誓愿。广设方便。悉使解脱。今则各各获证果位。复承世尊神通之力。得随地藏。同至忉利。感佛深恩。内心踊跃。瞻望仰慕世尊慈容。目不暂舍。

丁二释迦诏告分二。戊初、如来摩顶付嘱；二、地藏合身领教。

戊初分二。己初、经家叙通；二、发言付嘱。今初

尔时世尊舒金色臂，摩百千万亿不可思，不可议，不可量，不可说无量阿僧祇世界，诸分身地藏菩萨摩诃萨顶。

尔时者。佛与文殊问答已竟之时。舒者，伸也。金色臂。以佛全身皆黄金色。故臂亦金色。今世尊以一手。遍摩所集无量阿僧祇世界分身地藏之顶。此由如来神通之力。摩顶有二义。一者慰劳以前所度之众。二为付嘱未来灭后度生之事。

己二发言付嘱分二。庚初、明己所化众；二、付嘱未



调众。

度初分二。辛初、总示化门调机；二、别明分身度脱。今初

而作是言，吾于五浊恶世，教化如是刚强众生，令心调伏，舍邪归正。十有一二，尚恶习在。

正摩顶时。口作是言。我释迦世尊。在于娑婆五浊恶世之时。众生刚强。最难教化。故用种种方便。令心调伏。舍邪归正。如舍利弗、目犍连等二百人。及优楼频螺迦叶一千人。本皆外道邪见。由值遇佛。舍邪归正。即已归正者。十有一二。尚有恶习未除。正使虽断。习气犹在。如舍利弗示瞋。难陀现贪。毕陵伽婆蹉显慢。益显娑婆众生。刚强难化也。

辛二别明分身度脱分二。壬初、约机略明；二、约应广示。今初

吾亦分身百千亿，广设方便。或有利根，闻即信受。或有善果，勤劝成就。或有暗钝，久化方归。或有业重，不生敬仰。

亦字对前地藏分身。遍于百千万亿无量世界。不但地藏分身如此。即吾释迦世尊。亦分身百千万亿。汝地藏菩萨。广设方便。度脱众生。吾亦如是广设方便。调伏众生。分身方便。身百千万亿。此二为度生之本。广设方便者。譬如捕鱼用网。必须多设网孔。佛之教法。如世网孔。所以者何。以众生机宜不一。佛应机设教亦异。下文别立四种根性。分上、中、下、下下。或者，不定之词。

根由宿世培植。利者，快利。一闻即能信受。如佛出世。对四十一位法身大士。演大《华严》。如日初出。先照高山。此是利根众生。或有善果。是有福报人。根虽不如上利。在阿含方等般若。俱可入实。但须殷勤劝导。方可成就。此为中根。或有暗钝。久化方归。此则钝根声闻。须具历五味。方于《法华》入佛知见。此为下根。或有业重。不生敬仰。此为下下根人。如调达等。全无恭敬信仰之心。佛亦无可奈何。《大论》云。如死人种种庄严。转转烂坏。终不可令活。提婆达多亦复如是。佛日日种种教化。恶心转剧。恶不善法。日日转增。乃至作三逆罪。又云。佛在舍卫。二十五年。城中居民。有九亿家。三亿家眼见佛。三亿家耳闻佛。三亿家不见不闻。何况远者。

壬二约应广示分二。癸初、结前起后；二、普现色身。今初

如是等辈众生，各各差别，分身度脱。

此句可作二用。一结前。指前来众生。根有利钝。各各不同。故须分身而度脱之。二起后。因由众生根性各各差别。故我分身。或现男女等身。而度脱之。

癸二、普现色身

或现男子身，或现女人身，或现天龙身，或现神鬼身，或现山林川原，河池泉井，利及于人，悉皆度脱。或现天帝身，或现梵王身，或现转轮王身，或现居士身，或现国王身，或现宰辅身，或现官属身，或现比丘，比丘尼，优婆塞，优婆夷身，乃至声闻，罗汉，辟支佛，



菩薩等身，而以化度，非但佛身独现其前。

此文虽略。义具十界。自男子身。至优婆夷身。为六凡法界。声闻至佛身。为四圣法界。此是正报。或现山林等。是依报。此由众机。关佛慈悲。以王三昧力。不动法身。而往应之。故一时普现诸身。或者，不定之词。或有众生。应以男子身得度者。世尊即现男子而为说法。或以女人身得度者。现女人身而为说法。或以天身、龙身、神身、鬼身得度者。即皆现之而为说法。或现高山，或现茂林，或现川泽，或现平原，或现河池泉井等依报度人。盖众生在苦。善心难生。今则利及于人。悉发菩提心。皆使度脱。或有众生。欲生忉利。世尊即现天帝身。为说十善之法。或有众生。愿生梵天。佛即现梵王身。为说禅定之法。或有众生。欲作轮王。即现转轮王身。为说五戒十善之法。或有众生。爱谈名言。清静自居。即现居士身而为说法。或有众生。应以国王、宰辅、官属身得度者。即皆现之而为说法。已上皆未受道者。此下四众。为受道之机。比丘，此云乞士。清静活命故。系男子出家者。尼，此云女。系女子出家者。优婆塞，此云近事男。优婆夷，此云近事女。谓亲近承事三宝故。此为在家二众。受佛五戒者。如有四众之机。佛即为现四众之身而为说法。乃至，超略之词。此下为四圣法界。声闻禀佛四谛音声而悟道。通指初果、初果向，乃至四果向、四果。均称声闻。阿罗汉，此云无生。见思已尽。三界无受生处。则独指四果。辟支佛，此云独觉。又云缘觉。观十二因缘而悟道者。菩萨等。通指四教菩萨。总不出四弘六度。一切众

生。应以三乘身得度者。现三乘身而为化度。非仅仅佛身。独现一切众生之前也。

庚二付嘱未调众分二。辛初、敕观累劫度生；二、令忆天宫付嘱。今初

汝观吾累劫勤苦，度脱如是等难化刚强罪苦众生。

观字莫草草过去。为众生受苦。《法华》云，三千世界皆舍身命处。又云吾成佛以来。甚大久远。汝地藏观想我释迦世尊。不止一劫二劫度生。在于过去无量劫。殷勤辛苦。舍身亡命。《大经》云。指山指地。骸骨倍多。指海指江。髓脑非喻。无非为度脱如是难化刚强众生。

辛二、令忆天宫付嘱

其有未调伏者，随业报应，若堕恶趣，受大苦时，汝当忆念吾在忉利天宫殷勤付嘱，令娑婆世界至弥勒出世已来众生，悉使解脱，永离诸苦，遇佛授记。

其有业重之辈。至今未调伏者。必随所造恶业。而受报应。若堕三恶趣中。受极大苦时。一日一夜。万死万生。汝地藏须忆念吾在忉利天宫。殷勤付嘱。普令娑婆世界。有三千大千之广。从今日起。至弥勒成道已来。须经五十亿七千六百万岁。时节久长。所有一切刚强难化众生。悉皆使令解脱。永离生死之苦。遇弥勒佛而得授记。如此重任。若非地藏。谁能荷担。故如来再三殷勤付嘱。良有以也。弥勒。唐云慈氏。在华林园初会说法。度九十六亿人得阿罗汉。是释迦世尊时。受五戒者。第二会说法。九十四亿人得阿罗汉。是释迦如来时。受三皈依



者。第三会说法。九十二亿人得阿罗汉。是释迦佛时。一称南无佛者。由此而言。则此等众生。皆种因在释迦。成熟在地藏。解脱在弥勒也。

戊二地藏合身领教分二。己初、地藏正领；二、如来赞喜。

己初分三。庚初、叙合身宗本；二、申化事受旨；三、慰世尊勿虑。今初

尔时诸世界分身地藏菩萨，共复一形，涕泪哀恋。

尔时者。指付嘱之时。诸世界即无量阿僧祇世界。所有地狱处。皆有分身地藏菩萨。如是分身无量。今共复一形。一为无量是出。无量为一是入。出则教化众生。故分身无量。入则禀承佛敕。故无量为一。前世尊敕云。汝观吾累劫勤苦。度脱如是难化刚强罪苦众生。地藏闻之。不觉涕泪哀恋。盖有四意。一者悲如来慧日将沉。二者悲天宫付嘱事大。三者悲六道造业不悛。四者悲众生刚强难化。诚有不得已之苦衷也。

庚二申化事受旨分二。辛初、佛引使获通慧；二、化身沙界利生。今初

白其佛言，我从久远劫来，蒙佛接引，使获不可思议神力，具大智慧。

此文非此生成佛。尘点劫前已成正觉。故地藏以释迦为本师。当时地藏。即白佛言。世尊。我地藏从久远劫来。蒙佛接引。在未蒙世尊接引之前。亦是生死凡夫。由佛说法教化。则接凡成圣。引迷归悟。令得不可思议神通

之力。具足广大智慧。理须知恩报德。以佛之接引我者。引接众生也。观久远劫来。蒙佛接引之语。则知地藏为佛长子。今世尊将灭。以娑婆众生。付嘱地藏。而地藏一心顶受。所谓担荷如来家业也。

辛二化身沙界利生分二。壬初、分身度人；二、小善获利。今初

我所分身，遍满百千万亿恒河沙世界，每一世界化百千万亿身，每一身度百千万亿人，令归敬三宝，永离生死，至涅槃乐。

由于证得不思议神通之力。所以地藏分身。遍满于百千万亿恒河沙世界。岂仅娑婆一界。每一世界。化现百千万亿身。由于具足广大智慧。对机设教。是以每一地藏分身。能度脱百千万亿人。先令归敬三宝。盖三宝为众生良福田。若无良田。安能下种。故归敬三宝。如植种于良田。夫千寻之树。发于萌芽。黄河之水。起于涓滴。由此而修戒定慧。永离二种生死之苦。得证无上涅槃之乐。今依《杂心论》。释三宝有六种义。一者希有义。二者离垢义。三者势力义。四者庄严义。五者最胜义。六者不改义。归者，归投。如鸟投林。亦返还义。返邪归正也。敬，即恭敬。于三宝中。起一念恭敬之心。皆能离苦得乐。弗以善小而不为也。

壬二、小善获利

但于佛法中所为善事，一毛一漚，一沙一尘，或毫发许，



我渐度脱，使获大利。

但愿一切众生。于佛法三宝之中。所为善事。或大或小。今举极小者。譬如一毛甚轻。一滴水极少。一粒沙甚微。一微尘更细。或仅仅毫发许。由众生信心力故。地藏菩萨慈愿力故。以此善根。渐令度脱二种生死。使获涅槃之乐。《法华》举手低头。皆成佛道。开人天之福。即缘因佛种也。

庚三、慰世尊勿虑

唯愿世尊，不以后世恶业众生为虑。如是三白佛言，唯愿世尊，不以后世恶业众生为虑。

世尊最慈愍者。为灭后作恶之众。故在忉利。殷勤付嘱地藏。今地藏果能赤心担荷。故慰世尊不因灭后恶业众生为虑。显己能救拔众生之任。如是三白者。正领上再三殷勤付嘱之意。

己二、如来赞喜

尔时佛赞地藏菩萨言，善哉善哉，吾助汝喜。汝能成就久远劫来发弘誓愿，广度将毕，即证菩提。

当尔之时。世尊赞叹地藏。善哉善哉。双赞善哉者。一以能体佛心。敬承严命。二以分身利物。虽小善不遗。汝助吾喜。我亦助汝之喜。不须涕泪哀恋。汝能成就久远劫来所发弘愿。广度将毕。即证菩提。

丙二、明所化机：通论九界为所化机，别指六道，的指在人道，以佛出世、成道、转法轮、入涅槃，皆在人间故。良由众生因惑造业，由业招报，惑业苦三，相续不

断。佛以大悲，出应于世也。先品题。

观众生业缘品第三

观，为能观之智。众生业缘，为所观之境。此品从境智立名。若以文便。须先释观字。次释众生业缘四字。今依义便。先释众生业缘。次释观字。众生是假名。揽五阴实法。成众生假名。通而言之。十界皆称众生。以皆具此五阴故。佛有清静五阴。为无上众生。经云。众生无上者佛是。而此十界众生。苦乐果报。各各不同。则知因中造业差别。略分为二。六凡为有漏业。四圣为无漏业。就有漏。复有善业、恶业、不动业三种。无漏又有偏真中道不同。细分则有无量。虽所造之业千差万别。然原其造业缘由。总不离一念之心。故《华严》云。心如工画师。造种种五阴。一切世间中。莫不由心造。心既能造十界。则知心具十界。界界互具。则有百界。每界有十如是。即成百界千如。既有众生假名。必有五阴实法。故有众生假名一千。五阴实法一千。有正报必有依报。故有依报国土一千。如此三千性相。一念圆具无缺。若吾人心缘地狱时。非心之少分。乃心之全体。则地狱即具百界千如三千性相。如是则地狱修恶。体之即是性恶。性恶融通。故地狱性相与佛界性相无二无别。所谓佛如众生如。一如无二如。如名不异。即是空义。真谛境也。十界因果相在。即是假义。俗谛境也。空假不二。即是中义。中谛境也。所观之境。既一境三谛。能观之智。即一心三智。十方诸佛悟此三谛之理。则证三德涅槃。一切众生迷此三谛之理。而为三道流转。地藏菩萨在因地中。观众生三道。得证如



来三德。因知一切众生。与我同体。欲开众生三道。而示以三德。故云拔出众生根本业缘。使令解脱。然惑业苦三。如恶叉聚。生则俱生。灭则俱灭。今分为三品者。以众生有三根故。若上根利智。观一念无明心。即证三德秘藏。为中根再说业感。为下根人广说地狱名号。类《法华》三周。而义理无减。品为通题。上来已释。

丙二分三。丁初、示业缘差别；二、示业感差别；三、示业报差别。

丁初分二。戊初、圣母启问；二、地藏敬答。今初

尔时佛母摩耶夫人，恭敬合掌，问地藏菩萨言，圣者，阎浮众生，造业差别，所受报应，其事云何。

当佛告地藏。在我灭后。未调伏者。随业报应。若堕恶趣。受大苦时。须忆忉利付嘱之语。悉使解脱。永离诸苦。地藏答云。勿以后世恶业众生为虑。问此疑后世众生受报之事。故须问也。此时佛之生母。摩耶夫人。梵云摩耶。此云大幻。为千佛之母。即一心恭敬。两手合掌。请问于地藏菩萨言。圣者，称叹之词。谓智通大道。应变不穷。能测物之情性者。以上为经家叙请法之仪。虽为佛母。以重法故。理须恭敬。良以法为诸佛之师。阎浮众生。即此处众生。现在造业千差万别。将来受报之事。究竟如何。以地藏久在幽冥。故特请示。

戊二地藏敬答分二。己初、通示诸界业缘；二、的示阎浮恶趣。今初

地藏答言，千万世界，乃及国土，或有地狱，或无地狱，

或有女人，或无女人，或有佛法，或无佛法，乃至声闻，辟支佛，亦复如是，非但地狱罪报一等。

夫宾主酬唱。如砧锤相扣。今之答问不合，何也？因摩耶夫人所问太狭不广。仅问阎浮众生造业报应。若论造业报应。何止南洲。故云千万世界乃及国土。世界净秽。各各不同。或者，不定之词。或有世界有地狱。或有世界无地狱。如极乐世界。尚无恶道之名。何况有实。或有世界有女人。或有世界无女人。如极乐世界无女人。故莲花化生。或有世界有佛法。或有世界无佛法。极乐世界。阿弥陀佛。今现在说法。此为有佛法世界。若无佛世界。不但无三乘涅槃之道。亦无三归五戒等。种种善法。故贵有佛国土地。贱无佛国土也。乃至，超略之词。依正差别甚多。不能广说。故略而不谈。声闻辟支佛为二乘。若秽土方便说三。容有二乘。若净土纯一佛乘。故无二乘。然舍利弗作华光如来时。亦以三乘教化众生。虽非恶世。以本愿故。说三乘法。如是世界差别无量。下句结云。今圣母但问地狱一种罪报。而不知依报净秽差别。全由众生业力所感。故造业受报。非仅地狱罪恶报一等而已。

已二的示阎浮恶趣分二。庚初、圣母重白；二、地藏再答。今初

摩耶夫人重白菩萨，且愿闻于阎浮罪报所感恶趣。

然圣母岂不知世界差别。全由业感。因观众生根性下劣。广说非宜。故且就此地阎浮众生。目前所造之罪。将来受报。所感恶趣。分别说之。使令闻者。改恶修善。渐得度脱也。



庚二地藏再答分二。辛初、彼此谦恭；二、答明罪恶报。今初

地藏答言，圣母，唯愿听受，我粗说之。佛母白言，愿圣者说。

地藏答圣母言。愿闻阎浮罪报。祈一心听受。此地藏寄圣母以诫世人谛听。我今粗略说之。若广说罪报。一劫难尽。佛母白言。愿圣者慈悲宣说。吾当谛听也。

辛二答明罪恶报分二。壬初、地藏详示；二、圣母礼退。

壬初分二。癸初、总示；二、别明。今初

尔时地藏菩萨白圣母言，南阎浮提罪报名号如是。

你问阎浮众生罪业报应。所列名号如是。造罪差别。故受报名号亦有如是差别。

癸二别明分二。子初、正答阎浮罪报；二、重问无间狱名。

子初分二。丑初、别明罪报；二、结显堕苦。

丑初分二。寅初、不孝二亲；二、不敬三宝；三、侵损淫污；四、破戒诳人；五、偷常住物。今初

若有众生，不孝父母，或至杀害，当堕无间地狱，千万亿劫，求出无期。

此文初句明罪。下句明报。罪业为因。苦报为果。故惑业苦三。本不可离。人生在世。无论贵贱。皆由父母养育而成。十月怀胎。三年乳哺。长养之恩。如天如地。正

以两肩荷负父母。力行孝道。尚难报答万一。奈众生善恶不等。或有一类逆伦之辈。不但不孝顺父母。或有甚至杀之害之。夫杀害何名也。杀者，诛也。有罪而戮死。法所在也。害者，伤也。有怨而必报。情不堪也。今父母与汝何罪何怨。而至杀害。杀，应读弑字。下害上曰弑。

《易》曰臣弑其君。子弑其父。非一朝一夕之故。其由来者渐矣。《孟子》曰。孩提之童。未有不爱其亲者。曾子曰。孝衰于妻子。故最初但听谗言。见亲有不是处，渐则现于形色，发于言词。加诸手足。而卒至于弑害。不知天下无不是的父母。盖一念心性。与佛不异。只因无明覆蔽。随境流转。欲报父母恩。必须劝亲归依三宝。受持五戒。渐离诸苦。得涅槃乐。

寅二、不敬三宝

若有众生，出佛身血，毁谤三宝，不敬尊经，亦当堕于无间地狱，千万亿劫，求出无期。

不信佛。如调达推山压佛。金刚神用杵粉碎。有少石伤佛足指出血。调达生身堕入地狱。佛灭度后。世有泥塑木雕。彩画佛像。皆与真佛无异。敬之得福。毁之获罪。若画毁坏。则众生无求福之处。亦断佛种。毁谤三宝。此句是总。尊经为法宝，经通五人所说。法为诸佛之师，故云尊经。佛为世界眼目。亦如大暗明灯。所说之法。皆使众生转邪归正。革凡成圣。僧则住持佛法。使不断绝。故此三宝。当恭敬孝顺。如同父母。反兴侵害。以是罪业为因。亦如不孝之罪。身死之后。直堕无间地狱。千万亿劫。求出无期。



寅三、侵损淫污

若有众生，侵损常住，点污僧尼，或伽蓝内，恣行淫欲，或杀或害，如是等辈，当堕无间地狱，千万亿劫，求出无期。

《律钞》明四种常住。一、常住常住。谓众僧寺、舍、树木、田、园、仆、畜等。体局当处。不通余界。但得受用。不通分卖。故云常住常住。二、十方常住。谓僧家供僧常食。体通十方。唯局本处。此二名僧祇物。三、现前现前。谓得施之物。唯施此处现前僧。四、十方现前。亡五众物。未羯磨从十方僧得罪。已羯磨望现前僧得罪。此二名现前僧物。常住各物。十方凡圣有分。境既无边。所以罪亦无边。或有一类众生。不知此理。侵害损坏常住之物。或有众生。点污僧尼。比丘尼、式叉摩那、沙弥尼是出家女众。净修梵行。应当恭敬。反生淫欲之念。强行点污。毁他梵行。此等罪业。千佛出世。不通忏悔。僧尼遇此强暴。力不能抗。无一念喜乐之心。犹如热铁刺身。于戒不毁。不可因此而生退悔。或有一类。在伽蓝内。恣意行于淫欲。或杀害生命。梵云僧伽蓝。此云众园。如世园圃。生植果苗。伽蓝为净修梵行之所。是佛弟子生植道芽圣果之处。应当生恭敬心。反恣行淫欲杀害。全无惭愧。如是指上来造罪恶之人。此身死后。必当堕于无间地狱。千万亿劫。求出无期。

寅四、破戒诳人

若有众生，伪作沙门，心非沙门，破用常住，欺诳白

衣，违背戒律，种种造恶，如是等辈，当堕无间地狱，千万亿劫，求出无期。

沙门，为出家之通称。此云勤息。勤修戒定慧。息灭贪嗔痴。或有一类众生。外形虚伪。似作沙门。内心不修沙门之行。名实不符。由是破用常住。不知常住僧食。来自施主。所以成就僧众道业。若不办道。何以报信施之恩。古人有出家四料拣。身心俱出家。最为尊贵。莲池大师云。与其身出家心不出家。不如身心俱不出家。何以故。信施难消也。或有外现修行之状。欺诳白衣。指贪图在家人供养。或有违背戒律。造种种恶业。如是等辈。身死之后。必当堕于无间地狱。千万亿劫。求出无期。

寅五、偷常住物

若有众生，偷窃常住财物，谷米，饮食，衣服，乃至一物不与取者，当堕无间地狱，千万亿劫，求出无期。

或有众生。此不论在家出家。其有偷盗私窃常住财物谷米饮食衣服。乃至最少之物。一针一草。不与而取。皆名偷盗。常住谷米衣服。为僧众养身办道之用。今偷盗使其匮乏。如此恶业。身死之后。必堕无间地狱。千万亿劫。求出无期。

丑二、结显堕苦

地藏白言，圣母，若有众生作如是罪，当堕五无间地狱，求暂停苦，一念不得。

地藏白圣母言。若有众生。作如上所说之罪。身死之后。必当堕于五种无间地狱。受苦无时间断。欲求暂停



苦。一念之顷。亦不可得。

子二重问无间狱名分二。丑初、圣母问；二、地藏释。今初

摩耶夫人重白地藏菩萨言，云何名为无间地狱。

由于地藏白圣母。若有众生。作诸恶业。当堕无间地狱。所以圣母重白地藏。请问云何名为无间地狱。既有无间之名。必有无间之义。

丑二地藏释分二。寅初、总示诸狱；二、别明无间。今初

地藏白言，圣母，诸有地狱，在大铁围山之内。其大地狱有一十八所。次有五百，名号各别。次有千百，名字亦别。

凡诸所有地狱。在大铁围山之内者。皆是大地狱。其余小狱。或在山间水边。旷野等处。其在铁围山内。重大地狱。有一十八所。次有五百。名号各别。次有千百。名字亦别。大者如国。次如省。再次如县。

寅二别明无间分三。卯初、正明业报；二、重示业感；三、广说不尽。

卯初分二。辰初、正明；二、结示。

辰初分二。巳初、示狱城出名；二、明狱相显报。今初

无间狱者，其狱城周匝八万余里，其城纯铁，高一万里，城上火聚，少有空缺。其狱城中，诸狱相连，名号各别。

独有一狱，名曰无间。

由圣母独问无间名号。今先出诸狱。以显无间地狱。为诸狱之一。是极重正狱。即八热地狱。最重者。为无间地狱。次有五百。再次千百。皆为眷属。先出城名。所谓无间狱者。其狱外有城。周围一匝。有八万余里。其城纯是铁为。高计一万里。城上皆是猛火。无有少许空缺之处。城中诸狱相连。名号各别。最中有一狱。名曰无间。

巳二明狱相显报分二。午初、示相；二、显报。

午初分二。未初、示；二、结。

未初分二。申初、狱火相；二、狱床相。今初

其狱周匝万八千里，狱墙高一千里，悉是铁为。上火彻下，下火彻上。铁蛇铁狗，吐火驰逐，狱墙之上，东西而走。

其无间狱。另有一城。周围一匝。一万八千里。狱墙高一千里。全是铁为。城头之火。透彻城脚。城下之火。透彻城上。其中又有铁蛇铁狗。口吐火焰。驰逐罪人。在狱墙之上。东西而走。

申二、狱床相

狱中有床，遍满万里。一人受罪，自见其身，遍卧满床。千万人受罪，亦各自见，身满床上。

此狱中有一铁床。全是猛火。遍满万里。一人受罪。自见其身。遍卧满床。若千人万人受罪。通在铁床。亦各自见。身满床上。而无障碍。

未二、结



众业所感，获报如是。

此无间地狱。非佛天人所作。由众生恶业所感。因造业无间。故受报无间。《楞严经》云。造十习因。受六交报。今生以眼根造业。至狱以眼根受报。现造业为因。将来堕狱是报。以如是因。感如是果。犹如种豆得豆。种瓜得瓜。故云如是。

午二显报分三。未初、标；二、释；三、结。今初

又诸罪人，备受众苦。

此总标。此诸罪恶人。所受之苦。不止狱床一种。备受种种诸苦。

未二释分二。申初、夜叉恶鬼报苦；二、铁鹰铁蛇报苦。今初

千百夜叉及以恶鬼，口牙如剑，眼如电光，手复铜爪，拖拽罪人。复有夜叉，执大铁戟，中罪人身，或中口鼻，或中腹背，抛空翻接，或置床上。

此无间狱中。有千百夜叉。及以恶鬼。下正显恶相。口中牙出。犹如利剑。两眼如同电光。手指皆是铜爪。拖拽罪人。再有一类夜叉。手中执大铁戟。刺中罪人之身。或中口鼻。或中腹背。将诸罪人。抛于空中。翻手接来。置于火床之上。

申二、铁鹰铁蛇报苦

复有铁鹰，啖罪人目。复有铁蛇，缴罪人颈。百肢节内，

悉下长钉，拔舌耕犁，抽肠锉斩，洋铜灌口，热铁缠身。

不但夜叉恶鬼。再有铁鹰。从空中飞来。啖罪恶人目。复有铁蛇。缴罪人颈。四肢百节。通用长钉。口舌造罪。在地狱中。拔出舌根。用犁耕之。抽出肚肠。锉之斩之。口渴之时。烱铜作水。恶鬼用钳灌之。从口入去。直从下出。或用热铁缠身。

未三结分二。申初、生死万千；二、苦报亿劫。今初

万死千生，业感如是。

一天之中。万死万生。业感如是。不尽不息。

申二、苦报亿劫

动经亿劫，求出无期。此界坏时，寄生他界。他界次坏，转寄他方。他方坏时，展转相寄。此界成后，还复而来。

梵云劫波。此云时分。最短刹那。最长劫波。劫有大中小之别。人寿八万四千岁。百年减一岁。减至十岁。再从十岁。百年增一岁。增至八万四千岁。为一小劫。如是二十小劫。为一中劫。四中劫。为一大劫。不至无间地狱则已。若一入此狱。动经亿劫。求出无期。或疑地狱坏时。应可出离。盖世界有成、住、坏、空。分为四个时期。成时二十小劫。住，二十小劫。坏，二十小劫。空，二十小劫。八十小劫。为一大劫。今云动经亿劫。求出无期。此事难可置信。今释之曰。此世界坏时。无间罪恶人。业未尽者。寄生他方未坏世界。若他界次坏。复转寄他方。他方坏时。由此展转相寄。待此处世界成后。还复而来。是故动经亿劫。



辰二、结示

无间罪报，其事如是。

无间地狱。所受罪报。如是如是。

卯二重示业感分二。辰初、标举；二、征释。今初

又五事业感，故称无间。

五事者。一时、二形、三苦、四果、五命。皆由业感。前圣母但问无间之名。今地藏重示五种无间者。以前云当堕五无间地狱。故不待圣母重问。自为解释。又者，再也。五种苦报。由业而感。一一皆无间断。故称无间。

辰二征释分二。巳初、征；二、释。今初

何等为五。

何等为五种无间地狱耶。

巳二释分五。午初、时无间；二、形无间；三、苦无间；四、果无间；五、命无间。今初

一者，日夜受罪，以至劫数，无时间绝，故称无间。

释曰。一者受苦时节无间。从日至夜。从夜至日。如此以至于劫数。无有一时间断。以是之故。称为无间。不比轻间地狱。极热时有凉风吹来。苦事暂息。盖因中或畜养畜生。使其凉暖得所。故得凉风之报。

午二、形无间

二者，一人亦满，多人亦满，故称无间。

二者形无间。形即身形。若堕此狱。自见身形。遍满

地狱。即无量人堕于地狱。亦各各自见。身满狱中。故称无间。

午三、苦无间

三者，罪器叉棒，鹰蛇狼犬，碓磨锯凿，锉斫镬汤，铁网铁绳，铁驴铁马，生革络首，热铁浇身，饥吞铁丸，渴饮铁汁，从年竟劫，数那由他，苦楚相连，更无间断，故称无间。

三者苦具无间。即因罪受苦之器具也。罪器二字总标。下叉棒等别列。有铁叉、铁棒、铁鹰、铁蛇、铁狼、铁犬。不但全身是铁。且全身是火。追逐罪人。或用碓捣磨磨。或用锯解凿凿。或锉或斫。或用镬汤烧煮罪人。或热铁为网。缠络其身。或热铁为绳。缚罪人身。铁驴铁马。残害罪人。或以生皮络首。或以热铁浇身。饥渴之时。吞热铁丸。及饮铁汁。罪苦之事。不忍称说。从一年积至一劫。复由一劫积至无量劫。苦毒酸楚之事。互相连续。更番受苦。而无间断。以是之故。称为无间。

午四、果无间

四者，不问男子女人，羌胡夷狄，老幼贵贱，或龙或神，或天或鬼，罪行业感，悉同受之，故称无间。

四者果无间。果即果报之身。或男身女身。乃至天身鬼身。在人间一等造罪。而有男女老幼贵贱之分。若一入此狱。则不问男子女人。羌胡夷狄。古称四夷。不受王化。东夷、南蛮、西羌、北狄。今云胡者。乃外国之通称也。《礼》七十曰老。十年曰幼。贵贱一往以爵位别之。



然亦有天爵人爵之分。所谓朝廷莫如爵。乡党莫如齿。行政施仁莫如德也。故仁义为天爵。得之即贵。失之即贱。今论贵贱。指人爵而言。龙是畜道。鬼神是鬼道。天即由地居天至于非非想天。如是天人鬼畜。一切众生。造诸罪业。感堕狱中。悉皆同受。无有差别。故称无间。

午五、命无间

五者，若堕此狱，从初入时，至百千劫，一日一夜，万死万生，求一念间暂住不得，除非业尽，方得受生，以此连绵，故称无间。

五者命无间。命即命根。无有中夭。如世人连持色心为命。故有横死。此无间狱。以业报为命。若堕此狱。从初入时。乃至百千万劫。一日一夜。万死万生。《观佛三昧经》云。地狱一日一夜受罪。如阎浮提六十小劫。故知地狱日长。所以一日夜间。万遍生死。欲求一念之间。暂时停苦。而不可得。除非业尽报谢。方得受生之处。以是连绵不断。故称无间。

卯三、广说不尽

地藏菩萨白圣母言，无间地狱，粗说如是。若广说地狱罪器等名，及诸苦事，一劫之中，求说不尽。

前圣母问。云何名为无间地狱。今地藏答言。无间地狱。略说如是。若详细广说地狱罪器等名。及诸受苦之事。一劫之中。说之不尽。良由众生恶心遍布。昼夜相续。是以地狱之中。循业发现。苦具无量。故云求说不尽。

壬二、圣母礼退

摩耶夫人闻已，愁忧合掌，顶礼而退。

当时佛母。闻阎浮业报。心生愁忧。愁罪人受苦摩穷。忧已力救援未逮。两手合掌。顶礼而退。

丁二、示业感差别。先品题。

阎浮众生业感品第四

上品明因惑造业。此品明由业感果。业有善恶。报有好丑。感应之道。如影随形。不爽毫末。此惑业报三。本不可分。盖吾人五阴之身。即属果报。而有贪嗔痴等。种种烦恼。即是惑。因此发为身口意三业。倘无果报之身。则惑业何处寄托。是以不可分离。依理而言。必先由惑造业。因业招报。故次第分为三品耳。阎浮，树名。此方无，不翻。或云胜金。以阎浮果汁。流入河中。染石为金。颜色殊胜。人间不及。故云胜金。或云秽树。以果汁染处。虽洗不净。佛世有一比丘。取阎浮提果。以奉世尊。佛受此果。破为多片。施诸大众。汁染佛手。佛以此手。击于岩上。至今赤色。如昔不异。湿亦不燥。掌迹分明。因昔分果为片片故。乃名此石为片片岩。此树在须弥山南。近海边。其树高大。围十五由旬。高一百由旬。从根至上。无树叶五十由旬。枝叶横出。亦五十由旬。为南洲之大树王。南阎浮提。由此立名。众生业感。有通有别。通则十界皆称众生。悉由业感。六凡以有漏业感。生于同居。二乘以无漏业感。生于方便。菩萨以亦漏亦无漏业感。生于实报。佛以非漏非无漏业感。生于寂光。故知



无有一法。从空而起。皆由性具。而起逆顺之修。则有十界差别。今则别指阎浮众生业感者。以阎浮众生。果报下劣。易造感极苦之业。如经云。举心动念。无非是罪。脱获善利。多退初心。若遇恶缘。念念增益。故地藏大士。以平等慈。分身沙界。而悲心偏向南洲有情。譬如父母爱子。非不平等。而于病子。尤加怜愍也。故云《阎浮众生业感品》。

丁二分二。戊初、地藏重述付嘱；二、当机正问誓愿。

戊初分二。己初、大士述事；二、如来示意。

己初分二。庚初、述；二、慰。

庚初分二。辛初、昔承佛力分化；二、今蒙佛嘱度生。今初

尔时地藏菩萨摩诃萨白佛言，世尊，我承佛如来威神力故，遍百千万亿世界，分是身形，救拔一切业报众生。若非如来大慈力故，即不能作如是变化。

此品由《分身集会品》中。如来以灭后众生。付嘱地藏。地藏慰世尊。勿以后世恶业众生为虑。当时佛赞地藏。吾助汝喜。广度将毕。即证菩提。地藏应有领受之语。由佛母请问阎浮罪报。故于今品。重述付嘱。尔时指圣母已退之时。由世尊称赞地藏。善哉善哉。汝能成就久远劫来发弘誓愿。广度将毕。即证菩提。今地藏推功于佛。谓我仗佛威德神通之力。故能遍于百千万亿世界。分身救拔。一切业报众生。若非如来。于过去世。大慈接引于我。何由得此神通。既无神通。即不能作如是变化。

辛二、今蒙佛嘱度生

我今又蒙佛付嘱，至阿逸多成佛以来，六道众生，遣令度脱。

是以饮水思源。理应度脱众生。以报佛恩。况今于忉利天宫。又亲蒙佛付嘱。从世尊灭度后。至阿逸多成佛已来。所有六道罪恶苦众生。使令解脱。梵云阿逸多。此云无能胜。即弥勒之名。

庚二、慰

唯然，世尊，愿不有虑。

唯愿世尊。勿以后世恶业众生为虑。如是再三安慰世尊。可谓求忠臣必于孝子之门。

己二如来示意分二。庚初、生性无定；二、汝愿度罪。

庚初分三。辛初、法示；二、喻显；三、合明。今初

尔时佛告地藏菩萨，一切众生未解脱者，性识无定，恶习结业，善习结果，为善为恶，逐境而生。轮转五道，暂无休息，动经尘劫，迷惑障碍。

初句是付嘱之本。未对已而言。若已得解脱者。则不须付嘱。解脱有二。一小乘解脱。解见思之惑。脱分段生死。二大乘解脱。解五住烦恼。脱二种生死。当时世尊。告地藏言。吾所忧虑者。即灭后一切众生。未得解脱之人。此等人性识无定。性指真性。识即意识。亦名缘虑心。真性如水。意识如波。全水成波。则生灭无定。故从



真起妄。即逐境攀缘。而无决定坚住之性。由是随熏习而转变。习，即习性。指过去而言。业，即作业。指现行而言。果，即果报。指未来而言。由过去恶业熏以成性。则现世发为恶业。来世则结恶果。由过去善习熏以成性。则现世发为善业。来世则结善果。恶因略果。善果略因。绮文互对。义应具足。如是由种子发现行。由现行熏种子。习续不断。此亦一往言之。然世人一生之中。忽而为善。忽而为恶。本无决定。无非逐境而生。譬如水无定性。随器方圆。为善则生人天道中。为恶则生三途之中。如井轮展转高下。无有暂时休息。究其原因。皆由一念妄动。迷真如为无明。由是造种种业障。感种种苦报。无始生死以来。经于微尘劫数。

辛二、喻显

如鱼游网，将是长流，脱入暂出，又复遭网。

鱼，合未解脱之众。游，合性识无定。网，合恶习结业。善习结果。此即惑业苦三。相续不断。如网难出。将者随逐。是指外境。合为善为恶。逐境而生。长流，合轮转五道。暂无休息。脱入暂出者。以生死以来。动经尘劫。虽欲出苦。不依三宝四谛修证。但修世间禅定。得生非非想天。似乎暂得出离。报尽依然散入诸趣。故云又复遭网。合上迷惑障难。

辛三、合明

以是等辈，吾当忧念。

因由如是等辈。故吾忧之念之。汝须忆念。忉利天宫

付嘱之语。救护解脱也。

庚二、汝愿度罪

汝既毕是往愿，累劫重誓，广度罪辈，吾复何虑。

地藏慰云。唯愿世尊。勿以后世恶业为虑。今世尊云。汝既尽此往昔之愿。所谓愿愿度生。及累劫以来。发重誓言。如一众生未证菩提。誓不成佛。故久远劫来。在生死道中。广设方便。度脱罪辈。寻看广度将毕。即证菩提。汝愿既满。吾亦无虑。

戊二当机正问誓愿分二。己初、自在问累劫发何愿；二、天王问何更立誓愿。

己初分二。庚初、以地藏各发何愿问；二、约众生业感发心答。今初

说是语时，会中有一菩萨摩訶萨，名定自在王，白佛言，世尊，地藏菩萨累劫已来，各发何愿，今蒙世尊殷勤赞叹。唯愿世尊，略而说之。

正当世尊说此语时。忉利法会之中。有一大士。名定自在王。适闻世尊谓地藏。汝既毕是往愿。累劫重誓。因白佛言。此地藏菩萨。从累劫以来。生生之中。各发何愿。今蒙世尊。如此殷勤赞叹。唯愿世尊。略而说之。

庚二约众生业感发心答分二。辛初、诚听许说；二腾昔愿事。今初

尔时世尊，告定自在王菩萨，谛听，谛听，善思念之，



吾当为汝分别解说。

初句诫听。汝须审谛而听。听已，善思其义。解已修行。念兹在兹。善听是闻慧。善思是思慧。念属修慧。下句许说。吾当为汝。分别解说。

辛二腾昔愿事分二。壬初、正明昔愿利益；二、结显神力通经。

壬初分二。癸初、述昔誓愿；二、示今利益。

癸初分二。子初、小国王所发愿；二、光目女所发愿。

子初分三。丑初、述王佛劫号；二、腾昔王愿事；三、结二王今古。今初

乃往过去无量阿僧祇那由他不可说劫，尔时有佛，号一切智成就如来，应供，正遍知，明行足，善逝，世间解，无上士，调御丈夫，天人师，佛，世尊，其佛寿命六万劫。

佛以一切智知。佛眼观。乃在往昔之世。距今过去。有无量阿僧祇那由他不可说劫。当尔之时。有佛出世。号一切智成就。如来乃至世尊。十种是通号。一切智成就。是别号。因修三观。破三惑。于果成就三智。故云一切智成就如来。其佛寿命六万劫。

丑二腾昔王愿事分二。寅初、叙二王友善；二、述二王发愿。今初

未出家时，为小国王，与一邻国王为友，同行十善，

饶益众生。

此一切智成就如来。在未出家之时。为小国王。与一邻国王为友。同行十善之法。教化利益一切众生。

寅二述二王发愿分二。卯初、出愿本；二、正发愿。

其邻国内，所有人民，多造众恶。二王议计，广设方便。

但其邻国之内。所有人民。多造种种恶业。由是二王。商议计度。必须广设方便。化恶令善。

卯二正发愿分二。辰初、一王自先成佛；二、一王先度众生。今初

一王发愿，早成佛道，当度是辈，令使无余。

一王因是而发愿言。愿我早成佛道。当度汝国造恶人民。皆入灭度。使无遗余。

辰二、一王先度众生

一王发愿，若不先度罪苦，令是安乐，得至菩提，我终未愿成佛。

一王心思。若成佛须经久远劫数。则罪苦众生。一时何能出离。因发愿言。若不先度此罪苦众生。令得无上涅槃之乐。我终不愿成佛。

丑三、结二王今古

佛告定自在王菩萨，一王发愿早成佛者，即一切智成就如来是。一王发愿永度罪苦众生，未愿成佛者，即地藏菩萨是。

佛告定自在王。往古之时。有一国王。发愿早成佛



道。当度罪辈者。即一切智成就如来是。以本愿故。已于过去。早成佛道。其有一王发愿。永远度脱罪苦众生。如一众生未度。终不愿成佛者。即今地藏菩萨是。

子二光目女所发愿分二。丑初、述佛号劫寿；二、腾罗汉利生。今初

复于过去无量阿僧祇劫，有佛出世，名清净莲华目如来，其佛寿命四十劫。

地藏菩萨。不但往昔为国王时发愿。又于过去。无量阿僧祇劫。当时有佛。出现于世。名清净莲华目如来。此佛以相好立名。西土有青莲华。最极清净。佛之紺目澄清。实无可比。今借世人所见者喻之耳。因地之中。以慈眼观视众生。故得此相。又以心性和顺。无粗暴心。所以如来之眼。如初生月。如来，通号。其佛寿命四十劫。

丑二腾罗汉度生分二。寅初、叙昔愿事；二、结会古今。

寅初分二。卯初、罪母堕苦；二、孝女发愿。

卯初分二。辰初、举能度罗汉；二、述所遇孝女。今初

像法之中，有一罗汉，福度众生。

佛法有正法、像法、末法三期。正法之世。有佛教化。众生依教修行者。证果最多。像法之世。有教有行。而证果者甚少。末法之世。但有教无行。何况证果。清净莲华目如来。寿长四十劫。然应身寿量。随众生机。机薪既尽。应火亦亡。今在彼佛灭后。像法之中。乃塔寺坚固

之时。为下罗汉教塑画形像伏案。此时有一罗汉。罗汉此云无生。已证无生果位。不来三界受生故。亦云。杀贼。杀见思贼故。亦云应供。应受人天供养。为世福田。故曰福度众生。

辰二述所遇孝女分三。巳初、出名；二、问愿；三、白事。今初

因次教化，遇一女人，字曰光目，设食供养。

须菩提舍贫就富。迦叶舍富就贫。各有因缘。皆随机度生。今此罗汉。以次第乞食。由是因缘。教化众生。在乞食之次。遇一女人。字曰光目。以至诚心。特为设食。供养罗汉。

巳二、问愿

罗汉问之，欲愿何等。

罗汉食竟。因问汝今至诚设供。欲求何愿。佛世常仪。食竟应问所愿。近世僧众。食毕结斋。咒愿施主安乐。皆循古法也。

巳三白事分二。午初、孝女陈事；二、罗汉入定。今初

光目答言，我以母亡之日，资福救拔，未知我母生处何趣。

尊者问我何愿。我因今天适值母亡忌日。所以设食供养。实欲资仗福力。救拔吾母。但不知我母生在何趣。

午二罗汉入定分二。未初、述定中见母；二、述出定



问答。今初

罗汉愍之，为入定观，见光目女母堕在恶趣，受极大苦。

罗汉愍此孝女。因为入定。入对出而言。小乘神通力劣。须仗定力。方能得见。偏观六道。见光目女母。堕在地狱之中。受极大苦。

未二述出定问答分二。申初、问行业；二、答所习。
今初

罗汉问光目言，汝母在生作何行业，今在恶趣受极大苦。

出定问光目言。汝母在生。作何等行业。作，即造作。一切众生。所受苦乐。非天授与。皆自作自受。何等，疑问之词。行，即行阴。是思心所。业者，动也。动身之思。动口之思。及思当体。如此相应。方得成业。今见汝母。在恶趣之中。受极大苦。果必有因。故问作何行业。

申二答所习分二。酉初、述事求救；二、方便度脱。
今初

光目答言，我母所习，唯好食啖鱼鳖之属。所食鱼鳖，多食其子，或炒或煮，恣情食啖，计其命数，千万复倍。尊者慈愍，如何哀救。

习，即习性。难可改变。光目答言。我母在生所习，唯独嗜好。食啖鱼鳖之类。而所食鱼鳖。多食其子。或炒或煮。快意食啖。忍使母子俱妄。母命是一。子命甚多。计其所杀命数。千万复倍。如此重业。必受大苦。今恳尊者。大慈大悲。应设何法。哀愍救度。

酉二方便度脱分三。戌初、念佛塑像；二、画像供礼；三、夜梦见佛。今初

罗汉愍之，为作方便，劝光目言，汝可志诚念清净莲华目如来，兼塑画形像，存亡获报。

罗汉见光目女。为母哀求拔救。深为怜愍。因作方便。劝告光目。汝母罪重。非我神力所及。如目莲不能救母。必须仰仗佛力。汝可志心诚意。念清净莲华目如来。不但正行念佛。更修助道。塑画如来形像。礼拜恳求。造像功德。且利及于人。如此正助共行。不独亡者离苦得乐。即生存之人。亦获善报。

戌二、画像供礼

光目闻已，即舍所爱，寻画佛像而供养之，复恭敬心，悲泣瞻礼。

此时光目闻此开示。当即舍所爱之物。人生莫不爱身。所以资身之物。不可须臾或离。今因救母。不顾自身。故顿舍所爱。寻即请画师。恭谨绘画佛像。至诚供养。复恭敬心。悲哀涕泣。瞻仰尊容。至诚礼拜。求佛哀佑。使母脱苦。

戌三夜梦见佛分二。亥初、孝女见佛告语；二、罪母托生婢家。

亥初分二。天初、女见胜相；二、佛告生处。今初

忽于夜后，梦见佛身，金色晃耀，如须弥山，放大光明。

如是朝暮礼念。在于后夜。睡眠之间。梦中得见佛



身。全是金色。光明晃耀。犹如须弥山王。放大光明。夜分三时。有初中后。今是夜之后分。故云夜后。

天二、佛告生处

而告光目，汝母不久当生汝家，才觉饥寒，即当言说。

不但见佛相好。又闻佛音告示。光目。汝母不久之间。当生汝家。才觉饥寒。即当言说。

亥二罪母托生婢家分二。天初、生后求救；二、审问业行。今初

其后家内婢生一子，未满三日，而乃言说。稽首悲泣，告于光目，生死业缘，果报自受。吾是汝母，久处暗冥。自别汝来，累堕大地狱。蒙汝福力，方得受生。为下贱人，又复短命。寿年十三，更落恶道。汝有何计，令吾脱免。

文分三节。初、叙生缘。光目女自梦已后。家中婢女。得生一子。未满三日。而乃言说。宿世虽为母女。今世分属婢子。奴对主人。故恭敬稽首。自经大苦。得见亲属。不觉悲从中来。泣告光目。二、述诉苦境。生死是果。业缘为因。因必感果。所受苦报。皆自作自受。吾前生为汝之母。自别汝来。常居铁围暗冥之中。从一地狱。经一地狱。故云累堕大地狱。百千万劫。无有出期。三、述谢求救。今仗汝念佛塑像。福力救拔。转重报为轻报。方得受生。为下贱人。寿命仅十三岁。自此以后。更落恶道。不知汝有何计。使吾脱免恶道之苦。

天二审问业行分二。地初、正问本罪；二、转征狱报。

地初分二。玄初、以作何行业征；二、以杀骂受报答。今初

光目闻说，知母无疑。哽咽悲啼而白婢子，既是我母，合知本罪，作何行业，堕于恶道。

当时光目闻已。知是己母无疑。因梦中已蒙佛指示。悲母堕苦。中心痛切。啼不出声。故云哽咽悲啼。审知是母。应知本生作何罪业。堕于恶道。

玄二、以杀骂受报答

婢子答言，以杀害毁骂二业受报。若非蒙福，救拔吾难，以是业故，未合解脱。

汝今问我。在生作何行业。以杀害生灵。毁谤恶骂。由此二业。受恶道报。前只知母杀害。今知复有恶口之业。杀害属身业。毁骂属口业。皆由意地贪嗔而发。只以愚痴。不知因果。致受苦长劫。若非蒙汝福力。救拔吾难。以是恶业因缘。不应解脱地狱之苦。

地二、转征狱报

光目问言，地狱罪报，其事云何。婢子答言，罪苦之事，不忍称说，百千岁中，卒白难竟。

光目因重征问。你说累堕地狱。作罪受报。其事云何。婢子答言。罪苦之事。无量无边。痛切心脾。不忍称说。纵经百千岁中。尽白地狱之苦。亦难究竟。

卯二孝女发愿分二。辰初、光目闻苦为母发愿；二、空佛感孝赞愿告生。



辰初分二。巳初、泣向空界陈母苦报；二、愿对本佛发我誓心。

巳初分二。午初、愿脱现生报；二、愿脱后世报。今初

光目闻已，啼泪号泣而白空界，愿我之母，永脱地狱，毕十三岁，更无重罪，及历恶道。

光目闻婢子之言。悲啼涕泣。号声大叫。对空白言。愿我故母。永脱地狱。毕尽十三岁寿。从此之后。更无重罪。及历恶道。

午二、愿脱后世报

十方诸佛慈哀愍我，听我为母所发广大誓愿，若得我母永离三涂及斯下贱，乃至女人之身永劫不受者。

唯愿十方世界。现住诸佛。大慈大悲。当哀愍我。当证知我。听我为母。所发广大誓愿。若得我母。从此之后。永远脱离三途之苦。及离此奴婢下贱之役。乃至女人五障之身。永劫不受者。

巳二、愿对本佛发我誓心：前为发愿之因，今正发愿。

愿我自今后，对清净莲华目如来像前，却后百千万亿劫中，应有世界，所有地狱及三恶道诸罪苦众生，誓愿救拔，令离地狱恶趣，畜生，饿鬼等，如是罪报等人，尽成佛竟，我然后方成正觉。

愿我从今日起。对清净莲华目如来像前。尽未来际。

百千万亿劫之中。此明所历之时。应有世界。尽括依报之土。其中凡所有地狱。及三恶道。诸罪苦众生。苦众皆度也。誓愿救拔。普令脱离地狱饿鬼畜生等恶趣之苦。此是大悲拔苦。普令如是罪报等人。尽成佛竟。此是大慈与乐。我然后方成正觉。

辰二空佛感孝赞愿告生分二。已初、印证前愿；二、告转后报。今初

发誓愿已，具闻清净莲华目如来而告之曰，光目，汝大慈愍，善能为母发如是大愿。

发如是大愿已竟之时。此句结前。备闻清净莲华目如来。告光目言。汝之慈愍。广大无边。因为母故。发如此大愿。可谓善而且能。以旷济之心。求毕母罪。譬如大水而灭小火。何患不灭者乎。

已二、告转后报

吾观汝母十三岁毕，舍此报已，生为梵志，寿年百岁。过是报后，当生无忧国土，寿命不可计劫。后成佛果，广度人天，数如恒河沙。

今吾以佛眼观视汝母。初由仗汝念佛塑像之功。得脱地狱苦报。托生婢家。寿仅十三。复堕恶道。今由汝发广大誓愿之力。十三岁毕。舍此下贱之报。来世生为梵志。寿命百岁。过梵志报后。当来得生无忧国土。如极乐世界无异。寿命不可计劫。至后毕竟成佛。广度一切人天。犹如恒河沙数。一子发菩提心。其母三报俱转。初生下贱。以转前地狱之报。次生梵志。以转现下贱短命之报。后成



佛果。以转梵志邪见之报。佛赞善能为母发如是大愿。可谓诚谛不虚矣。

寅二、结会古今

佛告定自在王，尔时罗汉福度光目者，即无尽意菩萨是。光目母者，即解脱菩萨是。光目女者，即地藏菩萨是。

于是释迦牟尼佛。告定自在王菩萨。尔时，指过去无量劫。清净莲华目如来像法之时。有一罗汉。福度光目者。即今无尽意菩萨是。无尽是境。意是智。以一心三智。观一境三谛。境既无尽。智亦无尽。故云无尽意。古时光目母。即今解脱菩萨是。解脱即是自在。昔堕铁城。备经辛苦。一不自在。由女供佛。次生婢家。又复短命。二不自在。后为梵志。终堕邪流。三不自在。今由光目女发愿。展转脱离诸苦。成不思議解脱大士。古时光目女者。即今地藏菩萨是也。

癸二示今利益分二。子初、结指大愿；二、赞劝归敬。今初

过去久远劫中，如是慈愍，发恒河沙愿，广度众生。

此地藏大士。于过去久远劫中。因慈愍众生故。略说已四次发如是广大誓愿。此句结前。若广说者。累劫以来。发愿如恒河沙。愿愿皆不为自利。无非广度众生。脱生死苦。证涅槃乐。

子二赞劝归敬分二。丑初、恶者归敬脱报；二、志心奉事受福。

未来世中，若有男子女人，不行善者，行恶者，乃至不信因果者，邪淫妄语者，两舌恶口者，毁谤大乘者，如是诸业众生，必堕恶趣。若遇善知识，劝令一弹指间归依地藏菩萨，是诸众生，即得解脱三恶道报。

承前地藏愿力广大。堪为众生依止。所以世尊慈悲告语。在我灭后。未来世中。若有男子女人。其有不行善者。行恶者。下指出行恶之事。世人同一身心。所以喜作恶者。原因在不信因果。由邪见故。则身行邪淫。邪对正而言。在俗，夫妻属正。亦须知时知处。何况肆行邪淫。妄语两舌恶口。属于口业。妄者虚妄不实。见言不见。不见言见等。恶口者。粗恶骂詈人等。两舌者。一口说两般话。似有两个舌头。毁谤大乘经典。乘者，运载之义。运行人出生死苦。至涅槃岸。不知报恩。反加毁谤。如是造诸恶业众生。将来必堕地狱。此结恶者。次述归敬。若知此罪业。或幸遇善知识。善简非恶。闻名为知。见面为识。劝令归依地藏菩萨。不用多时。仅一弹指之间。以是功德。使是诸业众生。下明脱报。即得解脱三恶道报。

丑二、志心奉事受福

若能志心归敬，及瞻礼赞叹，香华衣服，种种珍宝，或复饮食，如是奉事者，未来百千万亿劫中，常在诸天，受胜妙乐。若天福尽，下生人间，犹百千劫，常为帝王，能忆宿命因果本末。

前不信恶人。归依尚得脱苦。何况有善根男子女人。能志诚心。归依恭敬地藏菩萨。及在地藏形像之前。瞻仰礼拜。或用香华衣服。种种珍玩宝物。或以饮食。如是供



养奉事之人。此明行因。未来下。明得果。从此以后。百千万亿劫中。常在诸天。受殊胜微妙之乐。若天上福尽。下生人间。犹百千劫。常为帝王。能得宿命智。忆本初供养地藏为因。末后在人天受福为果。如此明识因果。则不造恶业。永离恶道之苦矣。

壬二结显神力通经分二。癸初、如来结显；二、当机承命。今初

定自在王，如是地藏菩萨，有如此不可思议大威神力，广利众生。汝等诸菩萨当记是经，广宣流布。

佛告定自在王。如是，指上于一弹指间归依。即得脱苦。地藏大士。有如此不可思议。大威德神通之力。广利众生。以是之故。汝定自在王。与诸菩萨等。应当牢记。如是经典。广为宣说。流布世间。

癸二当机承命分二。子初、慰佛通经；二、白已敬退。今初

定自在王白佛言，世尊，愿不有虑。我等千万亿菩萨摩訶萨，必能承佛威神，广演是经，于阎浮提，利益众生。

定自在王。即白佛言。唯愿世尊。不以为虑。我定自在王等。百千万亿诸大菩萨。必能承佛威德神通之力。广演此经。于南阎浮提。利益众生。故知南洲有此经典。由定自在王流通之功。

子二、白已敬退

定自在王菩萨白世尊已，合掌恭敬，作礼而退。

定自在王白世尊已竟。两手合掌。一心恭敬。作礼而退。

已二天王问何更立誓愿分三。庚初、天王蹶前疑问；二、如来为后答释；三、天王闻已悲退。

庚初分三。辛初、经家叙仪；二、天王述疑；三、愿佛为说。今初

尔时四方天王，俱从座起，合掌恭敬。

尔时，即定自在王已退之时。四方天王。居须弥山腰。离地四万二千由旬。东方黄金埵。王名提头赖吒。此云持国。领乾闥婆、富单那二部。南方琉璃埵。王名毗留勒叉。此云增长。领鸠槃荼、薜荔多二部。西方白银埵。王名毗留博叉。此云杂语。领毗舍闍、毒龙二部。北方水精埵。王名毗沙门。此云多闻。领夜叉、罗刹二部。四王各有九十一子。俱从本坐而起。合掌是身业。恭敬是意业。下白佛言是口业。三业至诚。为请法之仪式。

辛二、天王述疑

白佛言，世尊，地藏菩萨于久远劫来，发如是大愿，云何至今，犹度未绝，更发广大誓言。

前闻世尊。说此地藏菩萨。于久远劫来。发如上四番大愿。自应度尽众生已。因何至今犹度未绝。更发广大誓愿。为愿力未及耶。为众生难度耶。

辛三、愿佛为说



唯愿世尊，为我等说。

我等正护四方。南洲恶业偏多。不但负大士救拔之心。我等亦抱护持之失。故愿世尊。为我等说。

庚二如来为后答释分三。辛初、赞许；二、愿闻；三、正告。今初

佛告四天王，善哉善哉，吾今为汝，及未来现在天人众等，广利益故，说地藏菩萨于娑婆世界阎浮提内，生死道中，慈哀救拔，度脱一切罪苦众生方便之事。

佛告四天王。善哉善哉。汝既为众而问。吾今为汝并及现在未来天人众等。广利益故。说此地藏菩萨。在于娑婆。五浊恶世之时。尤以南洲众生。性识无定。多造众恶。所以在六道之中。生死不息。劳此菩萨。大慈大悲。头头救拔。度脱一切罪苦众生方便之事。吾今略说。

辛二、愿闻

四天王言，唯然，世尊，愿乐欲闻。

唯然，应之速也。如蜂念好蜜。如渴思甘露。故云愿乐欲闻。

辛三正告分二。壬初、略示重发愿意；二、广明随机说法。今初

佛告四天王，地藏菩萨久远劫来，迄至于今，度脱众生，犹未毕愿，慈愍此世罪苦众生，复观未来无量劫中，因蔓不断，以是之故，又发重愿。

此文分两节。自久远劫至犹未毕愿。为结前。慈愍此

世至又发重愿为起后。佛告四王。地藏于过去劫来。至于今日。度脱众生。犹未毕愿。所以今日。更发重愿者。因由地藏菩萨。慈愍现世罪苦众生。复观未来众生。于无量劫中。生死之因。如蔓不断。以是之故。又发重愿。

壬二广明随机说法分二。癸初、明大士度脱；二、劝天王拥护。

癸初分二。子初、总示方便；二、别明说法。今初

如是菩萨于娑婆世界阎浮提中，百千万亿方便，而为教化。

因发如是重愿。所以地藏菩萨。于今娑婆世界。阎浮提中。随众生机。设百千万亿方便之法。而为教化。

子二别明说法分二。丑初、正明随机说化；二、结示业感差别。今初

四天王，地藏菩萨若遇杀生者，说宿殃短命报。若遇窃盗者，说贫穷苦楚报。若遇邪淫者，说雀鸽鸳鸯报。

总列二十三种果报。先举十恶报。上总示百千万亿方便而为教化。今正明随机说法之相。若者，不定之词。地藏大士。设若遇现世杀生之人。为说来世招多病短命之报。若遇私窃偷盗之人。为说将来招贫穷苦楚之报。若遇邪淫之人。为说来世招雀鸽鸳鸯之报。此示身三恶业所招之报。

若遇恶口者，说眷属斗争报。若遇毁谤者，说无舌疮



口报。

此示口四业所招之报。若遇恶口之人。为说来世招眷属斗争之报。若遇毁谤之人。为说招无舌疮口之报。毁辱诽谤。即摄妄言两舌绮语等三。

若遇嗔恚者，说丑陋癰残报。若遇悭吝者，说所求违愿报。若遇饮食无度者，说饥渴咽病报。

此示意三业所招之报。若遇嗔恚之人。为说来世招丑陋癰残之报。若遇悭吝之人。为说来世所求违愿之报。若遇饮食无度之人。此属痴业。无度有二种。一者过量而食。饮酒贪味。漫无节制。二者一席千金。奢靡无度。人生莫不赖于饮食。在饥荒之世。尤须节食。以济大众。今饮食无度。暴殄天物。来世则招饥渴咽病之报。此十恶业。若论果报。当堕地狱。然地狱之事。世多未见。不易生信。故但说花报。使亲见亲知。易于取信。若知短命之苦。则不敢造杀业。此诚对机设教。应病与药。地藏慈心。真大医王也。

若遇畋猎恣情者，说惊狂丧命报。若遇悖逆父母者，说天地灾杀报。若遇烧山林木者，说狂迷取死报。若遇前后父母恶毒者，说返生鞭撻现受报。若遇网捕生雏者，说骨肉分离报。

此下明五种杂业果报。畋猎始于伏羲。为农家除害。驱逐野兽。后人无知。便以此为业。任情杀害。不知物之惜命。与人无异。将来感惊狂丧命之报。悖理逆伦。不孝之人。为天地所不容。将来感天灾地杀之报。或被天雷击

毙。或地崩身陷。烧山林木。每至冬令。往往纵火焚山。致一切生灵。无路可逃。悉遭伤害。将来感狂迷取死之报。前后父母。即前父后母也。爱自生之子。害于前生之子。如大舜、闵损之后母是也。感转生之间。母子相易。现受鞭挞之报。生雏，初生小鸟。毛羽未全。不能高飞。以网捕之。虽人禽异形。而母子之爱。出于天性。令其生离死别。故来世遭骨肉分离之报。

若遇毁谤三宝者，说盲聋喑哑报。若遇轻法慢教者，说永处恶道报。若遇破用常住者，说亿劫轮回地狱报。若遇污梵诬僧者，说永在畜生报。

此明三宝中罪报。宝者可尊之义。佛称两足尊。法称离欲尊。僧称众中尊。若能皈依。必得返迷为悟。今乃毁之谤之。正是从冥入冥。来世必招盲聋喑哑之报。教者，圣人被下之言。法者，轨持之义。教为能诠。法为所诠。法虽可轨。弘之在人。故宏通教法之师。为众生法身父母。理须恭敬尊重。反轻之慢之。此等人自绝清升之路。永处恶道之报。常住之物。皆是信施资助僧众办道之用。若非理破坏使用。使施主不得求福。僧众不得办道。如是恶业。将来定招亿劫轮回地狱之报。本是梵行之僧。无故诬谤污辱。如此愚痴。不别善恶。将来永在畜生之报。

若遇汤火斩斫伤生者，说轮回递偿报。若遇破戒犯斋者，说禽兽饥饿报。若遇非理毁用者，说所求阙绝报。若遇吾我贡高者，说卑使下贱报。若遇两舌斗乱者，



说无舌百舌报。若遇邪见者，说边地受生报。

此明六种杂业果报。生，指有命之属。贪生惜死。与人无异。今以汤火斩斫。伤其生命。经云以人食羊。来世人死为羊。羊死为人。如此轮回。互相酬报。永无止息。戒者，五戒、十戒、二百五十戒。所以止恶防非。为菩提之本。今毁犯不持。来世受禽兽之报。斋者，过午不食。若能一日夜持斋。将来不遇饥馑之灾。今犯而不持。故受饥饿之报。用，即器用什物。无论或自或他。皆须爱护。若非理毁坏。将来感所求阙乏之报。贡高是自大自高之人。皆由我见而起。今世轻慢他人。将来招卑使下贱之报。两舌者。一舌说两般话。搬弄是非。使双方斗乱。小则毁家。大则亡国。将来招无舌百舌之报。邪见，乃不信正法。将来在边地无正法处受生。

丑二、结示业感差别

如是等阎浮提众生，身口意业，恶习结果，百千报应，今粗略说。如是等阎浮提众生业感差别，地藏菩萨百千方便而教化之。

如是。结前二十三种果报。阎浮众生。指造恶之人。身口意为造业之具。恶习结果。是习因感习果。百千报应。是报因感报果。今大略说之。使显而易见。知所惩戒。如是阎浮众生。由造业不同。所以感报差别。地藏菩萨。以大慈愿力。用百千方便。说种种果报。而教化之。

癸二、劝天王拥护

是诸众生，先受如是等报，后堕地狱，动经劫数，无

有出期。是故汝等，护人护国，无令是诸众业迷惑众生。

是诸恶业众生。先受上来所说花报。次堕地狱。以受果报。一入地狱。动经劫数。无有出期。以是之故。吾今付嘱汝等天王。民为国本。护人即是护国。众生心性与佛无异。良由宿世恶业。迷而不悟。故云勿令是诸众业。迷惑众生也。

庚三、天王闻已悲退

四天王闻已，涕泪悲叹，合掌而退。

闻地藏百千方便。而为教化。奈众生刚强。造业不息。苦报无际。所以涕泪悲叹。合掌而退也。

地藏菩萨本愿经略解卷上终



地藏菩薩本願經略解卷中

天台山國清寺靜權法師述

丁三、示業報差別。初品題。

地獄名號品第五

此品與《業緣》《業感》。具明所化機。以眾生惑業苦三道。翻之即成三德。不須舍冰求水也。上品《業感》論通論別。通論十界。別論六道。今此品別論地獄。何以故。六道之中。三善苦樂相間。三惡純苦無樂。即於三途。鬼畜之苦稍輕。地獄之苦最劇。本經云。罪苦之事。不忍稱說。百千歲中。卒白難竟。故普賢聞業感差別。輒問地獄名號。使眾生知苦斷集。慕滅修道。意有在也。梵云泥黎耶。此云無有。以獄中純苦。無有樂故。此皆約正報義翻。今云地獄。依處立名。謂此牢獄。在南洲地下二萬由旬。依本經在三海之內。蓋地獄有邊有正。邊獄或在地上。或在鐵圍山。正獄則在地下。今從多為言。名地獄耳。四洲之中。南洲有正有邊。東西二洲唯邊無正。北洲邊正俱無。三洲人若造重罪。皆來南洲正獄受報。名號者。正顯地獄多種。各各名號不同。以下所列。但是略說。若廣解說。窮劫不盡也。夫人間一人系獄。便令九族惶擾。而六親墮落地獄。恬然不知。哀哉。今聞地獄名號。及前婆羅門女光目女救親之事。普愿世間善男信女。

当有所效法矣。

丁三分二。戊初、普贤请说；二、地藏承答。今初

尔时普贤菩萨摩訶萨白地藏菩萨言，仁者，愿为天龙四众，及未来现在一切众生，说娑婆世界，及阎浮提罪苦众生，所受报处地狱名号，及恶报等事，使未来世末法众生，知是果报。

尔时，指前说《业感》已竟之时。普贤菩萨。因乘机问狱报差别之相。若论普贤大士。行弥法界。位邻极圣。岂不知地狱之名与事。只由地藏分身冥界。教化泥犁。当众发明。谁不信受。故特兴问。仁者，尊称之词。以慈育物称仁。古称尧仁如天。普为大众发问。故云愿为天龙八部四众等。并及未来现在一切众生。说娑婆世界。及阎浮提。此由广至狭。上品明阎浮众生业感。今问果报。亦但云阎浮众生。罪行业感。所受报处。地狱名号。及恶报等事。所以问此者。欲使未来世中。末法之时。一切众生。知此地狱苦报。不敢为恶。力行善法。此为大士兴问之意。

戊二地藏承答分三。己初、谦恭许说；二、答释狱报；三、结示指广。今初

地藏答言，仁者，我今承佛威神，及大士之力，略说地狱名号，及罪报恶报之事。

初二句谦恭。地藏答言。仁者所问。非我能答。今承佛威德神通之力。及大士之力。略说下，许说。地狱名号。及恶报之事甚多。若广说穷劫不尽。现但略说而已。



己二答释狱报分二。庚初、答地狱名号；二、答罪报恶事。

庚初分二。辛初、总示狱处；二、别开狱名。今初

仁者，阎浮提东方有山，号曰铁围，其山黑邃，无日月光。

仁问阎浮罪苦众生。受报之处。今正示地狱之处。在阎浮提东方有山。号曰铁围。凡一四大部洲之外。皆有铁围山。周匝围绕。三千大千世界。有百亿四大部洲即有百亿铁围山。《法华》云。其国中间。幽冥之处。日月威光。所不能照。故黑而且邃。邃者。深远也。惟诸佛出世。大光遍照。其中众生。各得相见。咸作是言。此中云何忽生众生。

辛二别开狱名分二。壬初、正主地狱；二、眷属等狱。今初

有大地狱，号极无间。又有地狱，名大阿鼻。

于其两山中间。有大地狱。号极无间。又有地狱。名大阿鼻。梵云阿鼻。此云无间。《观佛三昧经》合为一狱。此经与《楞严》分为二狱。经云。九情一想。下洞火轮。身入风火二交过地。轻生有间。重生无间。纯情即沉入阿鼻地狱。今此二狱。同在铁围山内。譬如二姓共居一宅。一门出入。各有眷属。同出一门。何妨说一。既是二姓。何妨说二。

壬二眷属等狱分二。癸初、狱数无限；二、狱名不同。

癸初分二。子初、列名；二、指广。今初

复有地狱，名曰四角。复有地狱，名曰飞刀。复有地狱，名曰火箭。复有地狱，名曰夹山。复有地狱，名曰通枪。复有地狱，名曰铁车。复有地狱，名曰铁床。复有地狱，名曰铁牛。复有地狱，名曰铁衣。复有地狱，名曰千刃。复有地狱，名曰铁驴。复有地狱，名曰洋铜。复有地狱，名曰抱柱。复有地狱，名曰流火。复有地狱，名曰耕舌。复有地狱，名曰锉首。复有地狱，名曰烧脚。复有地狱，名曰啖眼。复有地狱，名曰铁丸。复有地狱，名曰诤论。复有地狱，名曰铁钺。复有地狱，名曰多瞋。

复有，对前主狱而言。乃阿鼻大狱之眷属也。其类甚多。故以复有二字别之。四角地狱者。《正法念处经》云。其狱周围铁壁。五百由旬。从上雨火雨铁。一切身分。分散为末。常煮常烧。飞刀即刀轮地狱。《观佛三昧经》云。刀轮地狱。四面刀山。于众山中积刀如砖。虚空中有八百万亿极大刀轮。随次而下。犹如雨滴。火箭。准《观佛三昧经》。即五百亿铁机地狱。铁机一动。无量铁弩。同时皆张。一一铁箭。射罪人心。一日一夜。六百亿生死。夹山。《正法念经》云。二山坚硬。铁焰火然。两厢作势。一时俱来。拶地狱人。拶已磨之。其身散尽。无物可见。磨已复生。如是经无量百千年岁。通枪。《立世经》云。剑叶地狱。是剑林路。有诸铍刺。罪人行此林路。备受钻刺等苦。铁车。《贤愚因缘经》云。世尊过去为慈童女。狱卒以热铁轮置于头上。因发愿言。代世间人受罪。铁轮落地。自此命终。即生天上。此为世尊发菩提心之始。铁床。《杂藏经》云。今身淫泆。死入地狱。卧



之铁床。或抱铜柱。狱鬼然火。以烧其身。铁衣。无数千万亿赤铁袈裟。及赤铁衣。从空来下。各各缠裹罪人之身。皮肉筋骨。悉焦烂已。铁衣自去。千刃。《观佛三昧经》云。罪人坐于大剑床上。百亿剑刃。刃皆出火。烧刺其身。烧脚。《立世论》名热灰。罪人往到彼中。脚践热灰。皮肉即烂。啖眼。《正法念》云。罪人入大剑树铁林之中。有铁鸷鸟。啄破其眼。而饮其汁。铁铁地狱。纵广五百由旬。狱卒捉罪人扑热铁上。以热铁斧。斫其身体。诤论、多嗔二狱。同成一因。诤论起于贪嫉。以贪嫉故。遂多嗔恚。堕此狱中。罪人自然手生铁爪。锋利如刃。各各相见。生怨结恨。互相伤害。

子二、指广

地藏白言，仁者，铁围之内，有如是等地狱，其数无限。

铁围山内。有如是等地狱。此结前。其数无限者。此一一狱。各有小狱。不能尽陈也。

癸二狱名不同分二。子初、列名；二、指广。今初

更有叫唤地狱，拔舌地狱，粪尿地狱，铜锁地狱，火象地狱，火狗地狱，火马地狱，火牛地狱，火山地狱，火石地狱，火床地狱，火梁地狱，火鹰地狱，锯牙地狱，剥皮地狱，饮血地狱，烧手地狱，烧脚地狱，倒刺地狱，火屋地狱，铁屋地狱，火狼地狱。

更有，对前复有而言。《长阿含》列八热地狱。第四叫唤。第五大叫唤。各有十六游增。狱卒捉罪人。掷大镬中。热汤涌沸。又掷大熬上。反复煎熬故号啕大叫。火

象。堕叫唤狱中。有火象生。身皆焰然。一切身分。皆能打触。取彼罪人。触破身分。破碎堕落。竭声大唤。倒刺。《立世》云。逆刺睽浮梨。一切皆铁。昼夜烧然。树高一由旬。刺长十六寸。狱卒捉罪人。牵上刺向下。牵下刺向上。

子二、指广

如是等地狱，其中各各复有诸小地狱，或一或二，或三或四，乃至百千，其中名号，各各不同。

如是，指前二十二种地狱。此中一一地狱。复有小地狱以为眷属。或一种二种。乃至百千。其中名号。各各不同。难可指陈。

庚二答罪报恶事分三。辛初、正示恶业感报；二、别明狱报差别；三、结显业感苦器。

辛初分三。壬初、标示业感；二、释业力大；三愿仁听言。今初

地藏菩萨告普贤菩萨言，仁者，此者皆是南阎浮提行恶众生，业感如是。

地藏对普贤言。此铁围山中。所有地狱。并非天作人与。皆由南洲行恶众生。业力所感。故有如是苦报。所谓善心初发。上天之宝殿已成。恶念才萌。下地之火城已具也。

壬二释业力大分二。癸初、正举；二、诫劝。今初



业力甚大，能敌须弥，能深巨海，能障圣道。

初句总标。下三句释业力大。山海二句举例。以比业力之大。盖世间最大莫过须弥。最深莫过大海。而不知众生业力。胜过于须弥大海。圣道即佛道。诸佛道力。最不可思议。而众生业力。亦不可思议。佛道虚通。不但四数四门皆可入道。而通达非道。即是佛道。岂非一切法皆是佛法。本无障碍。奈六凡有漏之业。能障三乘圣道。二乘无漏之业。能障佛性中道。故云业力甚大。能障圣道。

癸二、诫劝

是故众生莫轻小恶，以为无罪，死后有报，纤毫受之。父子至亲，岐路各别，纵然相逢，无肯代受。

以业力能障圣道之故。为是普劝众生。勿以恶小而为之。勿以善小而不为。盖虽小恶。日积月累。则成大罪矣。况因果报应。不爽毫厘。在生以为小恶无罪。不知死后有报。虽纤毫之微。悉自受之。且如父善子恶。自然善恶路别。未必相逢。设若相逢。亦不肯代受也。

壬三愿仁听言分二。癸初、地藏劝听；二、普贤释意。今初

我今承佛威力，略说地狱罪报之事，唯愿仁者，暂听是言。

前普贤问地狱之名与事。上来所答是地狱名号。今承佛威神之力。再说地狱罪报之事。唯愿仁者。暂听是言。乃寄托普贤。以诫大众也。

癸二、普贤释意

普贤答言，吾已久知三恶道报，望仁者说，令后世末法一切恶行众生，闻仁者说，使令归佛。

若论三恶道报。吾普贤久已知之。所以望仁说者。不但为佛世时。正欲使灭后末法之世。一切恶行众生。闻大士所说。使此恶行众生。归依于佛。究竟令他离苦得乐。

辛二别明狱报差别分二。壬初、总示；二、别明。今初

地藏白言，仁者，地狱罪报，其事如是。

此文两属。若云地狱名号。其事如上所说是也。此是结上。若云地狱罪报之事。如是如是。此为起下。

壬二、别明

或有地狱，取罪人舌，使牛耕之。或有地狱，取罪人心，夜叉食之。或有地狱，镬汤盛沸，煮罪人身。或有地狱，赤烧铜柱，使罪人抱。或有地狱，使诸火烧，趁及罪人。或有地狱，一向寒冰。或有地狱，无限粪尿。或有地狱，纯飞鏃鏃。或有地狱，多攒火枪。或有地狱，唯撞胸背。或有地狱，但烧手足。或有地狱，盘缴铁蛇。或有地狱，驱逐铁狗。或有地狱，尽驾铁骡。

别明十四种罪报者。即总示文中。其事如是如是也。

《八师经》云两舌、恶口、妄言、绮语。谮人无罪。毁谤三尊。死入地狱之中。鬼神拔出其舌。以牛犁之。取心夜叉食者。《观佛三昧经》云。诸罪人生灰河中。诸剑树间。有一罗刹。以叉叉其心出。与夜叉食之。以昔时偷盗父母师长罪因缘故。一日一夜。五百亿生死。受苦无量。镬汤煮身。前经云。镬汤地狱有十八镬。一一镬纵广四十



由旬。滿中沸鐵。五百羅剎。鼓大石炭。燒其銅鑊。火焰相承。六十日不灭。閻浮提日。滿十三萬歲。鑊沸如星。化成火輪。此由毀佛禁戒。殺生祠祀。為啖血肉。焚燒山林。生鑊湯中。速疾消爛。惟余骨在。赤燒銅柱如前。火燒趁及罪人。趁，逐也。《起世經》云。阿毗大獄諸眾生輩。以不善業果報。經無量時。見獄東門忽開。獄眾見已。走向彼處。我等今者。決應得脫。如是走時。身諸支節。轉復熾然。南西北門。亦復如是。一向寒冰。《樓炭經》云。寒冰獄縱廣二萬里。人入其中。風四面起。吹寒冰著人肌骨。入髓中便死。無限糞尿。《地獄經》云。沸屎獄有十八隔。各八千由旬。隔中四壁。百萬億劍樹。皆生鐵虫。口吐熱屎。有情飲屎。此虫啖舌啖心。以前世破八齋戒。及不淨惡業故。純飛鏃鏃。《觀佛三昧經》云。罪惡人落黑暗處。有鐵鳥嘴距長利。從山飛來。抓啄罪人。痛急疾走。足下鏃鏃。穿骨徹髓。此由兵家結寨。四角埋藏鐵鏃鏃害人。故生此中。

丁三、結顯業感苦器

仁者，如是等報，各各獄中，有百千種業道之器，无非是銅，是鐵，是石，是火，此四種物，眾業行感。

如是，指前十四種獄。每一獄中。有百千種苦器。以眾生造業千般。故苦具有百千之多。其間凡刀槍劍戟。皆是銅鐵火石所為。以造業時。惡心堅固。故云此四種物。由罪人業行所感。非天與人授也。《唯識論》云。如地獄中。無地獄主。而地獄眾生。依自然業。見地獄主。與種種苦。而起心見。此是地獄處。此夜時昼時。以惡業故。

见狗见鸟。或见山压。以此文证。善恶熏心。令心易见。实无地狱。然心外虽无地狱。恶业成时。强自妄见。如梦见种种物。皆自心变现。梦时实有。醒时则无。故《决定毗尼》云。我说地狱诸苦事。实无恶趣可来往也。

己三、结示指广

若广说地狱罪报等事，一一狱中，更有百千种苦楚，何况多狱。我今承佛威神及仁者问，略说如是。若广解说，穷劫不尽。

前来乃大略而说。若广说之。每一狱中。更有百千种苦楚。如是但一阿鼻地狱。便有种种罪报苦事。何况多狱耶。我今承佛威神。敬答仁者之问。略说如是之事。若广说者。虽一劫之中。说也不尽。只由众生昔时。触境生著起爱。今则触境秽恶受苦。故苦报、苦事、苦器。殊难悉举。明所化机竟。

丙三、明度脱缘。先品题。

如来赞叹品第六

如来二字是通号。即仿同先德号。谓今佛出世。如古佛再来也。如者不变之体。来者随缘之用。一往而言。六凡众生来而不如。谓但逐境随缘。而不会理体。二乘众生。但如不来。谓沉空滞寂。而不出假化物。惟大乘菩萨。能亦如亦来。自既证理。而度生不息。阐提众生。为非如非来也。又有三身如来。若云无所从来。亦无所去。此法身如来也。又云第一义谛名如。正觉名来。此报身如来也。又云乘如实道。来成正觉。此应身如来也。《法



华》以前。三身离即。待至《法华》。三身相即。故龙女赞佛云微妙净法身。具相三十二。今经在《法华》以后。并是圆机所见。应是释迦应身。即是尊特也。佛于忉利大会之中。赞叹地藏。盖有二意。一显地藏无数劫来。慈悲神力。二劝未来众生。供养得福。盖世尊灭后。惟依此大士。为作度脱之缘也。

丙三分二。丁初、化主放光赞叹；二、阎罗兴问赞叹。

丁初分二。戊初、世尊赞叹功德；二、地藏利益存亡。

戊初分二。己初、如来叹慈悲事；二、普广请利益事。

己初分二。庚初、叙光声称叹；二、令方便护经。今初

尔时世尊举身放大光明，遍照百千万亿恒河沙等诸佛世界，出大音声，普告诸佛世界一切诸菩萨摩訶萨，及天龙鬼神人非人等，听吾今日称扬赞叹地藏菩萨摩訶萨，于十方世界，现大不可思议威神慈悲之力，救护一切罪苦之事。

此经凡三次放光。初《忉利天宫神通品》。含笑放光。以标说法为要。此品举身放光。标十八界皆如来藏妙真如性。欲令众生直下承当。发大菩提心。三次在《见闻利益品》。从顶门上放光。标证极果。光明遍照百千万亿恒河沙世界。明所照之境广。以显地藏分身世界之广也。出大音声者。佛音称性周遍。远近一体。普告诸佛世界。

一切菩萨。天龙八部者。欲令此经。流通沙界。非仅娑婆一处也。夫众生由惑业苦三。流转生死。今地藏开三道即是三德。使悟生死即涅槃。烦恼即菩提。任运与乐拔苦。故云救护一切罪苦之事。皆由大士不思议威神。无缘慈悲之力。故世尊称扬赞叹也。

庚二、令方便护经

吾灭度后，汝等诸菩萨大士，及天龙鬼神等，广作方便，卫护是经，令一切众生证涅槃乐。

若佛在世。自能救护。如长者在家。不使起火。所忧者佛灭度以后。末世众生。如幼稚无知。不戒于火。故云吾灭度后。汝等诸菩萨。天龙八部等。须以种种方便。卫护是经。流通十方。所以者何。此经乃出生死海之舟航。入涅槃道之要门也。

己二普广请利益事分二。庚初、当机请说；二、世尊垂答。今初

说是语已，会中有一菩萨，名曰普广，合掌恭敬而白佛言，今见世尊赞叹地藏菩萨，有如是不可思议大威神德。唯愿世尊，为未来世末法众生，宣说地藏菩萨利益人天因果等事，使诸天龙八部，及未来世众生，顶受佛语。

知弥法界曰普。行满虚空曰广。先经家叙仪。而白佛言下。请世尊说地藏利益人天因果之事。果即二十五有果报。虽苦乐不同。皆不免生死。如八热地狱之苦。菩萨以无缘慈悲。王三昧力应之。即获清凉。乃至天人五衰相



现。瞻礼地藏。转增天福。此为果益之相。因即修因。一人之心。起无量业。若有众生。起五逆十恶之心。菩萨为说戒善之法。使之坏四趣恶因。成人天善因。此为因益之相。但必须恶心转成善心。则业坏。虽入道场忏悔。恶心不转。业亦不失也。若就菩萨救护一切罪苦之事。岂仅利益人天。然人天为善类。受道则易。故问利益人天因果之事。约教而言。天，指第一义天。人，指内凡位。如经云。十善菩萨发大心。长别三界苦轮海。十善为天因。圆教十信。已断见思。出三界生死。又云三十三天。君臣同服甘露不死之药。住行向为三十。合十地为一。等觉为一。妙觉为一。圆教初住乃至妙觉。皆证中道。获常乐我净。此为天果。如此利益。犹胜别教。况人天小果位耶。

庚二世尊垂答分二。辛初、如来正答；二、普广礼退。

辛初分三。壬初、诚听许说；二、承旨愿闻；三、广明利益。今初

尔时世尊告普广菩萨及四众等，谛听，谛听，吾当为汝略说地藏菩萨利益人天福德之事。

尔时即请说已竟之时。告普广及四众。即摄八部。谛听即诚听也。吾当为汝略说。此为许说。

壬二、承旨愿闻

普广白言，唯然，世尊，愿乐欲闻。

如文。

壬三广明利益分二。癸初、教主说利益；二、普广请

经名。

癸初分二。子初、广说利益之事；二、总结威神之力。

子初分二。丑初、通示闻名等益；二、别示久病等益。

丑初分二。寅初、供养得福；二、讥毁获报。

寅初分四。卯初、闻名赞礼福；二、塑画形像福；三、厌女供像福；四、伎乐赞供福。今初

佛告普广菩萨，未来世中，若有善男子善女人，闻是地藏菩萨摩诃萨名者，或合掌者，赞叹者，作礼者，恋慕者，是人超越三十劫罪。

前文由普广请问。今佛对告普广。谓未来正像已过。末法世中。若有男子女人。由宿世善根为因。闻地藏菩萨名号为缘。起下列四种之行。谓合掌、赞叹、作礼、恋慕。总不出三业供养。合掌恋慕是意业。赞叹属口业。作礼属身业。是人，指上四种人。皆于地藏前生恭敬心。由此三业为能感。大士威神慈悲为能应。即得超越三十劫重罪。乃获益也。良以菩萨之名。由万行万德之所庄严。故一历耳根。减罪无量。况一一诸行。皆缘起无性。当体即空即假即中。故随修一行。皆称法性。是以能减三十劫重罪也。

卯二、塑画形像福

普广，若有善男子善女人，或彩画形像，或土石胶漆，金银铜铁，作此菩萨，一瞻一礼者，是人百返生于



三十三天，永不墮于惡道。假如天福盡故，下生人間，
猶為國王，不失大利。

世尊又告普廣。若未來世中。有善男女等。作此菩薩形像。或用五彩绘画。或用泥塑。或用石琢。或以金銀銅鐵等鑄成。或有男子女人。于此像前。仅仅一瞻一禮。如是造像及瞻禮之人。修因極微。所獲果報極大。舍此身已。即得百返生于三十三天。永不墮于三惡道中。假如天福已盡。下生人間。猶為國王。不失大利，有二解：一者雖作國王，能識宿命，猶不失作像瞻禮之大利；二者畢竟成佛，為大利也。《法華》云。如是諸人等。漸漸積功德。具足大悲心。皆已成佛道是也。准《戒經》。不許造半身像。不宜用牛皮膠等不淨物。將來感不淨果報。修功德者慎之。

卯三灰女供養福分二。辰初、灰女身供像轉報；二、
灰丑病禮像獲福。

辰初分二。巳初、明供像；二、轉報果。今初

若有女人灰女人身，尽心供養地藏菩薩画像，及土石
膠漆銅鐵等像，如是日日不退，常以華香飲食，衣服
繒彩，幢幡錢寶物等供養。

《法華》云。女身有五障。一者不得作梵王。二者帝
釋。三者魔王。四者轉輪聖王。五者佛身。若有女人。灰
此女身。欲求脫離。但須竭尽心力。供養地藏菩薩画像。
及土石膠漆銅鐵等像。供養不出內、外二種。內則三業
至誠。外則錢、寶物等。如是二種供養。難在常以及日日
不退也。果能常以此供養。日日為之。即不退最初竭盡

之心。

巳二转报果分三。午初、明转女身；二、愿不转女；三、结不受女。今初

是善女人，尽此一报女身，百千万劫，更不生有女人世界，何况复受。

如是善女人。毕此一期果报之身。从此百千万劫。更不生有女人世界。如西方极乐世界等。何况复受女人之身。

午二、愿不转女

除非慈愿力故，要受女身，度脱众生。

然菩萨度生。应以何身得度。即现何身而为说法。若应以女身得度者。要受女身度脱众生。此系悲愿所牵。非关业果。故云除非慈愿力故。如摩耶夫人。韦提希等是也。

午三、结不受女身

承斯供养地藏力故，及功德力，百千万劫，不受女身。

此结转报之由。因仗此地藏威神力故。及供养功德力故。感应道交。是以百千万劫。不受女人之身。

辰二厌丑病礼像获福分三。巳初、瞻礼；二、转报；三、结成。今初

复次普广，若有女人，厌是丑陋多疾病者，但于地藏像前，志心瞻礼，食顷之间。

丑陋多病。不但女身。男子亦有。然女人之身。不得



自由。相貌丑陋。为夫君所嫌憎。身多疾病。招眷属之轻陵。以此为能感之机。但下，明修因。食顷，一饭食时。此以少显多。以短况长。谓仅仅食顷之间。志心瞻礼地藏形像。

已二转报分二。午初、相貌圆满；二、贵姓受生。今初

是人千万劫中，所受生身，相貌圆满。

而此丑陋多病女人。仗地藏功德力故。从此以后。千万劫中。所受生身。相貌圆满。

午二、贵姓受生

是丑陋女人，如不厌女身，即百千万亿生中，常为王女，乃及王妃，宰辅大姓，大长者女，端正受生，诸相圆满。

若此女人。不厌女身。即于百千万亿生中。常在贵姓受生。或为王女、王妃。宰辅大姓。大长者女。所受之身。容貌端正。诸相圆满。若但端正无相。或早孤少寡。相禄不佳。今既端正有相。可谓宿植德本。众人爱敬矣。

已三、结成

由志心故，瞻礼地藏菩萨，获福如是。

此结出获福之由。今丑女志心瞻礼为能感。地藏以威神慈悲为能应。良以佛心众生心。一心无二心。故感应道交。获福如是也。经明七种礼。一、我慢礼。如碓上下。无恭敬心。二、唱和礼。高声喧杂。意不虔诚。三、恭敬礼。五体著地。捧足殷重。四、无相礼。深入法性。离

能所相。五、起用礼。虽无能所。普运身心。六、内观礼。但观内心。不观外像。七、实相礼。实相无相。内外一如。

卯四、伎乐赞供福

复次普广，若有善男子善女人，能对菩萨像前，作诸伎乐，及歌咏赞叹，香华供养，乃至劝于一人多人，如是等辈，现在世中，及未来世，常得百千鬼神，日夜卫护，不令恶事，辄闻其耳，何况亲受诸横。

文分二节。初明能供之机。如是下明所获之福。伎乐歌咏赞叹。乃声尘供养。香华是色尘供养。自既以此供养地藏。复劝他人供养。如是供养之人。现在世及未来世。常得百千鬼神卫护。自然逢凶化吉。履险若夷。尚不令恶事闻到。何况亲身受诸横祸。

寅二讥毁获报。卯初、正示；二、结况。

卯初分二。辰初、示讥毁相；二、显讥毁报。今初

复次普广，未来世中，若有恶人及恶神恶鬼，见有善男子善女人，归敬供养赞叹瞻礼地藏菩萨形像，或妄生讥毁，谤无功德及利益事，或露齿笑，或背面非，或劝人共非，或一人非，或多人非，乃至一念生讥毁者。

初明讥毁之类。即恶人恶神恶鬼。盖善恶相反。故见有善男女等。皈敬供养地藏菩萨形像。遂生忌嫉之心。或妄生讥毁下，此出其相。由归供赞礼地藏功德。而获利益。今谤无功德及利益事。此拨无因果。起大邪见。不但自作。复劝人共非。乃至一念生讥毁者。此以少显多。



辰二显讥毁报分二。已初、直堕阿鼻；二、转生恶道。今初

如是之人，贤劫千佛灭度，讥毁之报，尚在阿鼻地狱受极重罪。

如是一念生讥毁之人。出其罪报。在此贤劫中。千佛灭度已。而讥毁之报。尚在阿鼻大地狱中。受极重罪。

已二、转生恶道

过是劫已，方受饿鬼。又经千劫，复受畜生。又经千劫，方得人身。纵受人身，贫穷下贱，诸根不具，多被恶业来结其心，不久之间，复堕恶道。

过此贤劫已后。方出地狱。余业未尽。又在饿鬼道中。受苦千劫。从鬼道出。复受畜生之身。经于千劫。然后方得人身。虽得为人。贫穷下贱。诸根不具。由贫穷故。所求乖愿。则多造恶业。由诸根不具。则愚痴暗钝。覆结其心。以是惑业因缘。不久之间。复堕恶道。可谓三途是家乡。人天是客路矣。

卯二、结况

是故普广，讥毁他人供养，尚获此报，何况别生恶见毁灭。

《法华》云。以不善心。于一劫中。现于佛前。常毁骂佛。其罪尚轻。若人以一恶言。毁訾读诵《法华经》者。其罪甚重。良以佛久离八风。不为逆、顺境界所牵。初发心人。闻他毁訾。退菩提心。断灭佛种。故获报弥

重。今讥毁他人。供养地藏。断人善根。是以招长劫沉沦之报。一念轻毁之心。尚获如是苦报。何况别生恶见。毁灭佛法。其罪更甚矣。

丑二别示久病等益分五。寅初、久病恶相乃至五斋诵感报。

寅初分三。卯初、示病中恶相；二、明修福脱罪；三、结劝修功德。

卯初分二。辰初、示相；二、释意。今初

复次普广，若未来世，有男子女人，久处床枕，求生求死，了不可得。或夜梦恶鬼，乃及家亲，或游险道，或多魇寐，共鬼神游。日月岁深，转复尪瘵，眠中叫苦，惨凄不乐者。

恶相者。相以表报为义。恶则非善。若见如是久病恶相。乃堕恶道之先兆。皆由宿业所感。须对三宝至诚忏悔。但男女肉眼。不辨是事。故世尊再告普广。在未来世中。有一类男子女人。或因疾病。久在床枕。求生求死。了不可得。下述病相。《佛说医经》云。人身中本有四病。一地、二水、三火、四风。《智论》云。四大为身。常相侵害。一一大中。百一病起。冷病有二百二。水风起故。热病有二百二。地火起故。今之病相。不关四大不调。是在精神上受苦。或者，不定之词。因神思瞽乱。故有种种恶梦。或梦见恶鬼。乃及家中已故亲属。或游悬崖海边。危险道路。或睡眠之间。多被魇寐。身虽未死。共鬼神游。《唯识论》明四梦。一、无明习气。二、善恶先征。三、四大偏增。四、巡游旧识。今梦恶鬼，恶相先征也。见家亲，巡游旧识也。游险道，则四大偏增也。鬼神



游，乃无明习气也。如是积日成月。积月成岁。年复一年。身体展转尪弱。久病成为劳瘵。不但醒时觉苦。即眠中亦常叫苦。如此凄惨不乐之情。难可尽述。

辰二、释意

此皆是业道论对，未定轻重，或难舍寿，或不得愈。男女俗眼不辨是事。

上来明病相。今出病由。此病皆是杀业所致。业道应指地狱处。善恶之业。由阎罗管辖。生魂在业道中。与宿世冤对辩论。未定其罪之轻重。故应死者。或难舍寿。不应死者。又不得愈。世间男女肉眼。不见过去恶业。故不辨是事。

卯二明修福脱罪分二。辰初、正示方轨；二、况显利益。

辰初分三。巳初、对像读经；二、为病舍物；三、脱罪知命。今初

但当对诸佛菩萨像前，高声转读此经一遍。

四大不调之病。世医药饵可疗。今是恶业报病。必须修福脱罪。盖善恶为因。灾福为果。灾须福除。恶须善解。若见如此久病恶相。不必求医祷鬼。但当对诸佛菩萨像前。高声朗诵。此经一遍。使病人亲聆法音。一念之间。转恶为善。则业消病除矣。须知佛为医王。善疗众生身心之病。经是法药。菩萨是瞻病之人。故须对像读经。只转一遍者。金丹一粒。点铁成金。至理一言。革凡成圣。何俟多转乎。

巳二、为病舍物

或取病人可爱之物，或衣服宝贝，庄园舍宅，对病人前，高声唱言，我某甲等，为是病人，对经像前舍诸等物，或供养经像，或造佛菩萨形像，或造塔寺，或然油灯，或施常住。

复有一法。或取病人可爱之物。盖心有爱著。不得速死。今舍施三宝。此断其病根。衣服等，明所舍之物。或者，不定之词。衣服严身。宝贝致富。庄园游玩。舍宅安身。皆日常受用。不可缺少。故爱之重之。对病人前。高声唱言者。因病久昏迷。故须高声唱言。令病者闻之。所作功德。忆持在心。经云。一切诸物。悉皆分散。唯此愿王。不相舍离。我是某人。为你病人。对经像之前。舍诸等物。所修功德。请三宝证明也。或供养经像。乃至或施常住。随行一种。即感胜报。非事事要做也。

巳三、脱罪知命

如是三白病人，遣令闻知。假令诸识分散，至气尽者，乃至一日二日三日四日至七日已来，但高声白，高声读经，是人命终之后，宿殃重罪，至于五无间罪，永得解脱，所受生处，常知宿命。

如是必须三白病人。令他耳闻此语。知自有供养功德。则恐惧之心即息。假令者。谓正欲借此施福。病去身安。假使大限难逃。世缘永绝。当诸识分散之时。以六识附于六根。根坏识散。乃至气尽。八识亦去。身死之后。自一日至于七日以来。但天天仍须一次。乃至三次。高声



告白。更須高声读诵此本愿经。是人，即前久病之人。由宿世恶业，在业道论对。未定轻重者。今仗此舍物读经功德。命终之后。宿世恶业。极重至于五无间罪。永得解脱。且从此之后。所受生处。常知宿世。以久病故。遇善知识。为代舍物读经。由是功德。得生善道。

辰二、况显利益

何况善男子善女人自书此经，或教人书，或自塑画菩萨形像，乃至教人塑画，所受果报，必获大利。

以代其舍施读经功德。尚能解脱宿殃重罪。受生善处。何况有善男女等。自己书写此经。复教人书写此经。流通此经。应有五种法师。谓受持、读、诵、解说、书写。或自塑画菩萨形像。乃至教人塑画。如此胜因。所受果报。必获成佛之大利也。

卯三、结劝修功德

是故普广，若见有人读诵是经，乃至一念赞叹是经，或恭敬者，汝须百千方便，劝是等人，勤心莫退，能得未来现在千万亿不可思议功德。

以有如是功德故。若见有人。或对本读此本愿经。或背诵此本愿经。或一部一品。乃至仅仅一念。赞叹是经。或对经像。生恭敬心者。今劝汝普广。须百千方便。劝是等修功德者。切弗有始无终。必须勤心莫退。能得未来现在。千万亿不可思议功德。

寅二梦寐见鬼分三。卯初、梦见恶境；二、敕遣读经；三存亡得益。

卯初分二。辰初、示相；二、释意。今初

复次普广，若未来世诸众生等，或梦或寐，见诸鬼神，乃及诸形，或悲或啼，或愁或叹，或恐或怖。

此梦与前梦不同。前是自身业对。此为过去眷属。在恶道中。求作功德。早脱苦趣。以是佛复告普广。若未来世。诸众生等。或在梦中。或昏寐之间。见诸鬼神。其形各异。下列六种。或悲、或啼、或愁、或叹、或恐、或怖。皆是乞怜之状。

辰二、释意

此皆是一生十生百生千生过去父母，男女弟妹，夫妻眷属，在于恶趣，未得出离，无处希望福力救拔，当告宿世骨肉，使作方便，愿离恶道。

此字指梦中所见。皆是宿世眷属。或一生十生。百生千生。过去父母。或一生乃至千生。过去弟妹。夫妻眷属。今堕在地狱饿鬼恶趣之中。不得出离。因无处希望福力救拔。只得告宿世骨肉。悲哀求乞。使作方便。愿离恶道。是知《孟兰盆经》云。七世父母生天。自在化生。即是一生至七生父母。皆得离苦生天。此亦就近而言。自有身已来。生生世世。皆有父母。均须报恩。此地藏所以为母发愿。度尽众生。方证菩提也。

卯二、敕遣读经

普广，汝以神力，遣是眷属，令对诸佛菩萨像前，志



心自读此经，或请人读，其数三遍或七遍。

世间愚人。知恩分者少。生前六亲。尚有不顾。况隔数世之亲耶。是以世尊付嘱普广。仗汝神通之力。使是现生眷属。知此道理。梦中所见鬼神。是宿世眷属。欲求脱苦。更须教以方法。令对诸佛菩萨像前。自己读诵此经。或请人读诵。其数三遍。或七遍。以此功德。回向宿世眷属。使他离苦得乐。

卯三、存亡得益

如是恶道眷属，经声毕是遍数，当得解脱，乃至梦寐之中，永不复见。

如是对像读经。毕是三遍或七遍之数。则前在恶道眷属。必得解脱。此亡者获益也。从是睡眠安稳。乃至梦寐之中。永不复见诸鬼神等。此存者获益也。

寅三下贱求悔分三。卯初、标能忏人；二、释所悔法；三、结转报益。今初

复次普广，若未来世，有诸下贱等人，或奴或婢，乃至诸不自由之人，觉知宿业，要忏悔者。

未来世中。有诸下贱等人。此句总标。《辩意经》云。五事常生卑贱。为人奴婢。一者懦弱不敬二亲。二者刚强无恻心。三者放逸不礼三尊。四者窃盗以为生业。五者负债逃避不偿。下别列。谓或奴或婢。乃至诸不自由之人。此等皆仰人鼻息。最为痛苦。然亦有智有愚。若有智者。觉悟主人与己。同一人类。何以贵贱天渊。知由宿世恶业所感。必须忏悔前愆。改往修来。梵云忏摩。华言悔

过。华梵双标也。

卯二、释所悔法

志心瞻礼地藏菩萨形像，乃至一七日中，念菩萨名，可满万遍。

然欲修忏法。当有方轨。必须在地藏菩萨形像之前。发露忏悔。此示其处。自一日乃至七日。瞻礼称名。此示修法。可满万遍者。转万恶成万善也。

卯三、结转报益

如是等人，尽此报后，千万生中，常生尊贵，更不经三恶道苦。

如是忏悔之人。尽此果报身后。千万生中。常生尊贵。更不经历三恶道苦。此转下贱报。为尊贵报。

寅四新产获福分二。卯初、举种类新产；二、示经名利益。今初

复次普广，若未来世中，阎浮提内，刹利，婆罗门，长者，居士一切人等，及异姓种族，有新产者，或男或女。

若论生产。四洲皆有。今但举南洲者。以北洲产于树下。亦无恶露苦恼。东西二洲。欲事既少。生育应稀。惟有南洲女人。多产多苦。刹利婆罗门。长者居士。此皆贵姓。异姓即旃陀罗等。人虽贵贱不等。生产是同。有初生者。或男或女。

卯二示经名利益分二。辰初、诵经念名；二、脱殃增寿。今初



七日之中，早与读诵此不思議经典，更为念菩萨名，可满万遍。

当初生之时。自一日至于七日。及早读诵此不思議经典。以此本愿经。功德不可思議故。再为新生之子。念地藏名。可满万遍。为初死诵经。以消其现业。为初生诵经。以消其宿业。以众生受生。皆由业感。故初生之时。即须酬还。并令善神拥护。离诸灾害也。

辰二、脱殃增寿

是新生子，或男或女，宿有殃报，便得解脱，安乐易养，寿命增长。若是承福生者，转增安乐，及与寿命。

此初生儿。或男或女。宿世恶业。应有殃报。仗此诵经念名功德。便得解脱。从此安乐易养。寿命增长。若此新生之儿。承宿世福业受生。于一七日内。诵经念名功德。则福上加福。故云转增安乐。及与寿命。

寅五斋诵感报分二。卯初、标斋日之意；二、释读经之益。今初

复次普广，若未来世众生，于月一日，八日，十四日，十五日，十八日，二十三，二十四，二十八，二十九日，乃至三十日，是诸日等，诸罪结集，定其轻重。

文分二节。初、标十斋日。二、设斋日意。未来世众生。即指现在末法众生也。于每月一日、八日、十四、十五、十八、二十三、二十四、二十八、二十九，乃至三十日。乃至二字，文颇难消。当是及至三十日也。此诸日等下。出斋日意。诸罪结集。定其轻重。亦是诸善结

集。定其轻重。是知平日所行善恶。皆有鬼神注记。至十斋日。结集善恶。判定轻重。分别受报。故斋日吃素念佛。可转未定之业。犹如新死四十九日内，罪业未经判定。为其修福诵经。则业报可转。与斋日诵经。同一道理。世之持斋者。有三长斋，月六斋，十斋不同。准《佛祖统记》。引《提谓经》。明三长斋。佛谓提谓长者曰。四时交代。岁终。三覆以校。一月六奏。诸天帝释。太子使者。阎罗鬼神。俱用正月、五月、九月、旦日。案行王、民、龙、鬼、鸟、兽。为善恶者。与四王一月六奏。使无枉错。覆校众生罪福多少。福多者。敕司命下阎罗五官。除罪增禄。故使持三长斋。月六斋。引《四天王经》。帝释敕四王。各治一方。白月三日。初八日。遣使者。案察众生善恶。十四日。遣太子。十五日。王亲临。黑月三日。廿三、廿九、三十亦如是。此日若遇修行斋戒。诸天相庆。即为注禄增算。《十斋经》。明十斋日。即于六斋日。加月旦等四日。如本经。此日持佛菩萨名号。可乞福灭罪。

卯二释读经之益分三。辰初、举阎浮罪状；二、示斋日读经；三、释现世利益。今初

南阎浮提众生，举止动念，无不是业，无不是罪，何况恣情杀害，窃盗，邪淫，妄语，百千罪状。

四洲之中。南洲果报。最为下劣。易造恶业。故独指南阎浮提众生。念，即第六意识。举，即是起。止，即是息。此念若起。必借因缘。内以意根为因。外以法尘为缘。因缘和合。一念心起。因缘别离。一念心息。介尔有



念。不出善、恶、无记三性。故云无不是业。然众生无始在迷。贪嗔痴等分。此四心。念念流动。故云无不是罪。如是则镇日收摄其心。犹恐不及。何况纵恣情欲。杀害、窃盗、邪淫。此举身三业。妄语即摄口四业。此身三口四。皆由无始贪嗔痴而起。如是十恶业。各有上中下三品。细分无量。故总结云。百千罪状。

辰二、示斋日读经

能于是十斋日，对佛菩萨诸贤圣像前，读是经一遍，东西南北百由旬内，无诸灾难。当此居家，若长若幼，现在未来，百千岁中，永离恶趣。

南洲众生。既有如是罪业。将来必感恶报。今示其灭罪乞福之法。若能于此十斋日。对佛菩萨像前。志心读是经一遍。不但自身利益。在此东南西北。百由旬内。一由旬四十里。百由旬有四千里。无诸灾难。当此读经之人。所居家内。无论若长若幼。现在无诸灾难。即未来百千岁中。仗此功德。永离恶趣。

辰三、释现世利益

能于十斋日，每转一遍，现世令此居家，无诸横病，衣食丰溢。

每逢十斋日。转此经一遍。即现在世中。令此居家。无诸横病。即疫病流行之病。衣食丰溢。一切众生。因衣食故。造诸恶业。今由读经功德。感丰饶之报。自然不造恶业。业因既无。恶果自亡。岂仅现世利益耶。

子二总结威神之力分二。丑初、正结地藏利益；二、

别示阎浮有缘。今初

是故普广，当知地藏菩萨，有如是等不可说百千万亿大威神力利益之事。

此总结威神力。及利益事。前普广白佛言。今见世尊。赞叹地藏。有如是不可思议大威神德。唯愿宣说地藏利益人天因果之事。今世尊略说地藏利益之事已竟。是故再告普广。当知此地藏菩萨。威神之力。不可思议。故利益之事。亦不可思议也。

丑二别示阎浮有缘分二。寅初、略示有缘；二、广明闻益。今初

阎浮众生，于此大士有大因缘。

以地藏菩萨久在幽冥界中。累世宗亲。俱蒙接引。故南洲众生。于此大士。最为有缘。即感应。佛不度无缘之人。今云大因缘者。如《法华》云。佛以一大事因缘故。出现于世。欲令众生开示悟入佛之知见。地藏菩萨云。但于佛法中。所为善事。一毛一湍。我渐度脱。使获大利。亦无非欲令众生成佛也。

寅二、广明闻益

是诸众生，闻菩萨名，见菩萨像，乃至闻是经三字五字，或一偈一句者，现在殊妙安乐，未来之世，百千万生，常得端正，生尊贵家。

是故诸众生等。闻菩萨名。见菩萨像。乃至闻此经三字五字。一偈一句。如此之人。现世获殊胜安乐。未来世



中。百千万生。常得容貌端正。生于尊贵之家。一句一偈尚尔。何况具足闻耶。

癸二普广请经名分二。子初、结显请意；二、正请经名。今初

尔时普广菩萨，闻佛如来称扬赞叹地藏菩萨已，胡跪合掌，复白佛言，世尊，我久知是大士有如此不可思议神力，及大誓愿力，为未来众生遣知利益，故问如来，唯然顶受。

尔时者，佛说已竟之时。普广闻佛。如是赞叹地藏菩萨已。即到世尊之前。胡跪合掌。此有二义。一者领前，以表一心顶受。二者请问经名。久知大士有如是威神之力。及誓愿力。由是知普广与地藏。是一流人物。今知而故问者。欲令未来众生。使知地藏利益人天之事。是故问于如来。今蒙宣说。自当一心顶受也。

子二正请经名分二。丑初、请；二、答。今初

世尊，当何名此经，使我云何流布。

在忉利法会之中。广闻地藏不思议功德。有德者必有名。所谓名以召德也。名为能诠。易于流布。故问当何名此经。使我用何法流布。

丑二答分二。寅初、答经名；二、结流布。今初

佛告普广，此经有三名，一名地藏本愿，亦名地藏本行，亦名地藏本誓力经。

此经有三名。皆出如来金口。一名本愿。由菩萨本初

在因地中。所发广大誓愿。此依愿立名。亦名本行。彰菩萨本地所行之事。如舍爱供养等。亦名本誓力经。以誓愿之力。不可思议。欲令众生度尽。方自成佛也。

寅二、结流布

缘此菩萨久远劫来发大重愿，利益众生，是故汝等，依愿流布。

汝问云何流布。由此地藏菩萨。从久远劫来。发大重愿。利益众生。是故汝等普广。亦应依其本愿。而流布之。

辛二、普广礼退

普广闻已，合掌恭敬，作礼而退。

如文。

戌二、地藏利益存亡。初品题。

利益存亡品第七

前品如来赞叹地藏威神之力。劝未来众生。供养得福。然托之空言。不如见诸事实。今则地藏自说利益存亡之法。存，指现存眷属。亡，指已亡眷属。由世人愚痴无智。往往为临终之人。宰杀生灵。拜祭鬼神。求请魍魉。不但无益。且使亡者转结罪缘。而存者增长杀业。岂非求福得祸。由是地藏菩萨。示其方法。临终之时。眷属须助其念佛。命终以后。须于诸佛教中。修诸善事。列须精勤护净。所有功德。命终之人。七分获一。六分功德。生者自利。故云《利益存亡品》。



戊二分二。己初、地藏正明；二、大辯助显。

己初分三。庚初、通示众生善退恶增；二、正示习恶宜为设福；三、结显修善多少自得。

庚初分三。辛初、法示；二、喻显；三、事明。今初

尔时地藏菩萨摩诃萨白佛言，世尊，我观是阎浮众生，举心动念，无非是罪。脱获善利，多退初心，若遇恶缘，念念增益。

当佛与普广。问答已竟。此时地藏菩萨。亲从座起。白佛言。世尊。我以法眼观此阎浮众生。性识无定。逐境攀缘。故云举心动念。又以处处爱著。故云无非是罪。设有发心欲修善行。功不浪施。由善行故。而得利益。理应精进。然志不坚牢。往往少得利益。多退初心。若遭遇恶缘。则念念增益。故知在此阎浮。善易退。恶易增。生生世世。常在轮转。普劝读者。求生极乐。

辛二、喻显

是等辈人，如履泥涂，负于重石，渐困渐重，足步深邃。

泥涂，譬生死道。重石，譬恶业。渐困，譬善退。渐重，譬恶增。足步深邃，譬由恶业堕于恶道。

辛三、事明

若得遇知识，替与减负，或全与负，是知识有大力故，复相扶助，劝令牢脚，若达平地，须省恶路，无再经历。

若者，不定之词。或宿有善根。今得遇善知识。此知识近指眷属。远指诸佛菩萨。替者，代也。在生眷属。为

亡者修福。所作功德。有大有小。使亡者或减罪。如减负。或全消。如全与负。若是知识。有大力故。须指诸佛菩萨。扶持，喻教以十善。牢脚，劝其精勤莫退。由是得达平地。喻修十善。得升人天。必须回忆三途之苦。如须省恶路。有志者。无再经历也。

庚二正示习恶宜为设福分二。辛初、总示；二、别释。今初

世尊，习恶众生，从纤毫间，便至无量。

何故阎浮众生。举心动念。无非是罪耶。由于无始劫来。习恶成性。是以从纤毫一念之间。渐渐便至无量无边罪业。

辛二别释分二。壬初、设福存亡利益；二、造恶亡人增罪。

壬初分二。癸初、临终设福；二、死后造善。

癸初分三。子初、示意；二、设福；三、得益。今初

是诸众生有如此习，临命终时，父母眷属宜为设福，以资前路。

此习恶众生。由习恶故。熏成种子。复由恶习种子。发为习恶现行。如是种现交熏。因果相感。命终之后。必堕恶趣。故临命终时。父母眷属。应为亡者。设福资助中阴。托生善趣。

子二、设福

或悬幡盖及然油灯，或转读尊经，或供养佛像及诸圣像，



乃至念佛菩薩及辟支佛名字，一名一号，历临终人耳根，或闻在本识。

前云宜为设福。今示其修福之法。必须在三宝之中。或悬幡盖。及然油灯。供养佛及诸圣像。或转读尊经。乃至念佛菩萨。及辟支佛名字。虽一名一号。使临终之人。一历耳根。永为道种。或闻佛号。纳在本识。阿梨耶识。为生死作本。故云本识。

子三、得益

是诸众生所造恶业，计其感果，必堕恶趣，缘是眷属为临终人，修此圣因，如是众罪，悉皆消灭。

是诸众生。所造恶业。计其感果。必堕恶趣。此正明因必感果。今得免者。由现生眷属为临终之人。于三宝中。修诵经念佛殊胜之因。故使如是众罪。悉皆消灭。譬如猛风之吹浮云。亦似大水之灭小火。众罪悉灭。正合前文。遇知识全与负也。

癸二、死后造善

若能更为身死之后，七七日内，广造众善，能使是诸众生，永离恶趣，得生人天，受胜妙乐，现在眷属，利益无量。

前云一名一号。历临终人耳根。或闻在本识。犹是前阴未尽。今云身亡之后。七七日内。则前阴已谢。在中阴身。四十九日内。受生之处未曾判定。若现生眷属。能为亡者。于此期间。广造众善。能使亡者。仗此功德。永离恶趣。得生人天。受胜妙乐。不但亡者得乐。即现在眷

属。利益无量。所谓六分功德。生者自利也。

壬二造恶亡人增罪分二。癸初、法示；二、喻合。

癸初分二。子初、蹶前正劝；二、转释所以。今初

是故我今对佛世尊，及天龙八部，人非人等，劝于阎浮提众生，临终之日，慎勿杀害，及造恶缘，拜祭鬼神，求诸魍魉。

承上而言。临终修福。存亡俱获利益。是则宜行。尚有不宜行者。是故我今。又对世尊。及大众之前。劝诫南洲众生。将要命终之日。眷属骨肉。切莫杀害。及造杀害之缘。以拜祭鬼神。求于魍魉。乞福灭罪。

子二转释所以分二。丑初、直释；二、复疏。今初

何以故。尔所杀害，乃至拜祭，无纤毫之力，利益亡人，但结罪缘，转增深重。

何以故，是转释之词。尔，指现生眷属。所杀害者，是一切物命。为临终人。拜祭鬼神。求福灭罪。此等鬼神魍魉。能知人寿命罪福。当至未至。但不能活人。不能杀人。不过因人衰耗。语其祸福。令人设祀。自己尚在生死道中。实无丝毫之力。利益亡人。故拜祭鬼神。求诸魍魉。不但无益。且使亡者。与所杀物命。结成罪缘。本有恶业。转增深重。岂非求升反堕耶。

丑二复疏分二。寅初、应报善者反得恶；二、应受恶者更增业。今初

假使来世，或现在生，得获圣分，生人天中，缘是临



终被诸眷属造是恶因，亦令是命终人，殃累对辩，晚生善处。

假设此临终之人。在生本修善业。计其感果。现世应获圣人之分。如念佛之人。临终复由眷属助念。现在生中。即得面见弥陀。与诸上善人。俱会一处。自亦得入圣人之分。或但修世善。于未来世。得生人天道中。奈缘命终之时。被诸眷属等。造此杀害。祭鬼恶因。殃及亡人。累他与被杀冤魂。在阴司对辩。由是之故。晚生善处。此复疏但结罪缘句。

寅二、应受恶者更增业

何况临命终人，在生未曾有少善根，各据本业，自受恶趣，何忍眷属更为增业。

上来修善之人。由眷属杀害。尚晚生善处。何况临命终人。在生之时。未曾有少许善根。各人自据本所造业。自然感受恶趣之报。在生眷属。理应为其救拔。何忍更为增其罪业。此复疏转增深重句。

癸二、喻合

譬如有人，从远地来，绝粮三日，所负担物，强过百斤，忽遇邻人，更附少物，以是之故，转复困重。

有人，合临命终人。从远地来绝粮三日，合在生未曾有少善根。从无始劫来。久乏戒定慧之资粮。所负担物，合各据本业。所谓万般将不去，惟有业随身也。强过百斤，合自受恶趣。由具造十恶。各各互具。如百斤重担。以恶业为因。自受恶趣之报。此因果互显也。邻人，合在

生眷属。更附少物，为临终杀生。将此罪业。更附亡者身上。转复困重，合更为增业也。

庚三、结显修善多少自得

世尊，我观阎浮众生，但能于诸佛教中，乃至善事，一毛一涕，一沙一尘，如是利益，悉皆自得。

世间愚痴。不信三宝。是以地藏菩萨。于世尊前。为作证明。故云我亲眼观此阎浮众生。但能于佛法之中。修诸功德。乃至极少善事。如一毛一涕。一沙一尘。如是利益。悉皆自得。

己二大辩助显分四。庚初、大辩兴问；二、地藏垂答；三、鬼神发心；四、长者礼退。今初

说是语时，会中有一长者，名曰大辩，是长者久证无生，化度十方，现长者身，合掌恭敬，问地藏菩萨言，大士，是南阎浮提众生，命终之后，小大眷属，为修功德，乃至设斋，造众善因，是命终人得大利益，及解脱不。

初经家叙赞。地藏说是语已。当时法会之中。有一长者。名曰大辩。具四无碍辩。依德立名。今迹为长者。其本地中。已久证无生法忍。应出离三界。然为化度十方。示长者之身。下正发问。因地藏大士常在幽冥。故问此南洲众生。命终之后。在生眷属。或小辈如子女等。长辈如父母等。为亡者修功德。或设斋布施。造种种善因。如是阳上修福。能使死者在幽冥之中。实得利益。及解脱生死否。前地藏已略说死后造善。存亡获益。今由长者问答因缘。益助成前说。以显利益不虚。无非欲使末法众生。深



信莫疑也。

庚二地藏垂答分二。辛初、许说；二、答示。今初

地藏答言，长者，我今为未来现在一切众生，承佛威力，略说是事。

长者久证无生。为现未众生。问于地藏。故地藏答言。长者。我今为现在未来一切众生。言承佛威力。略说是事者。以此事由佛力加被而说。非自智力。例如二乘人。在般若会上。转教菩萨。良以幽明途隔。非佛金口诚言。不易置信。故必须仗佛威德神通之力。使闻者信此难信之法。又佛日既没。圣哲日稀。更无罗汉福度众生。若舍此法。末世众生。出苦无期矣。事既重要。非轻易可说。故云承佛威力也。

辛二答示分二。壬初、示临终闻名悉脱；二、示终后造福获一。今初

长者，未来现在诸众生等，临命终日，得闻一佛名，一菩萨名，一辟支佛名，不问有罪无罪，悉得解脱。

尝读净土诸经。罕见临终助念之文。惟有此经。前云一名一号。历临终人耳根。或闻在本识。今云临命终日。得闻佛名。有罪无罪。悉得解脱。以此方众生。耳根偏利。临终之时。本识犹存。若闻佛名。业犹可转。此时不救。随业受生。出苦无期。在此千钧一发之际。惟菩萨法眼彻见。故不觉殷勤重说也。未来现在指时。诸众生等指机。平时未曾念佛。临终之日。眷属小大。为其助念。由是得闻一佛名。或一菩萨名。或一辟支佛名。是临终之

人。不问生平。有罪无罪。仗此功德。悉得解脱。若无助道因缘。虽平生无罪。不得解脱。纵五逆十恶。临终遇善知识助念。自己深信不疑。十念即得往生净土。解脱众苦。《十六观经》明文若兹。普劝读者。幸弗置疑。

壬二示终后造福获一分二。癸初、略明；二、详示。

癸初分二。子初、直明终后获一；二、反显自修悉得。今初

若有男子女人，在生不修善因，多造众罪。命终之后，眷属小大，为造福利，一切圣事，七分之中而乃获一，六分功德，生者自利。

世有男子女人。在生不修善业因缘。多造众罪。到命终后。其家眷属。或大或小。代造福业。如悬幡然灯等。以此福业。利益亡者。资生善处。圣事，即是佛事。不论大小佛事。其功德以七分计算。死者仅获一分功德。余六分功德。在生眷属自利。以有志诚心故。

子二、反显自修悉得

以是之故，未来现在善男女等，闻健自修，分分已获。

以是之故。普劝未来现在。有善根男子女人。在生耳目聪明。强健之时。极早自修。则七分功德。分分已获也。《随愿往生经》。普广白佛言。若善男女。未终之时。逆修生七。然灯悬幡。请僧转经。得福多否。佛言。其福无量。又言父母亲族。命终受苦。为其修福得福多否。佛言七分获一。缘前生不信道德故。若以亡者严身之具。屋宅园林。以施三宝。可拔地狱之苦。



癸二详示分二。子初、示亡人望救；二、劝眷属修斋。

子初分二。丑初、罪福未定；二、审定受报。

丑初分二。寅初、求救之意；二、求救之时。今初

无常大鬼，不期而到，冥冥游神，未知罪福。七七日内，如痴如聋。或在诸司，辩论业果。审定之后，据业受生。未测之间。千万愁苦，何况堕于诸恶趣等。

所以须闻健自修者。以生死无定。无常大鬼。不与人期。忽然而到。在生既无功德。死后游神。冥冥无知。不悉己之罪福。自新死一七日乃至七七日。前阴已灭。后阴未生。在中阴身。此时六根不利。如在梦中。故云如痴如聋。或者，不定之词。若造极善极恶之业。此处命终。即得生处。今指普通人。须在诸司台前。辩其在生善恶之业。以论罪福果报。既审定后。依据所造之业。以受生处。在未测罪福之间。已千思万虑。愁忧多苦。何况堕于诸恶趣等。其苦更甚矣。

寅二、求救之时

是命终人，未得受生，在七七日内，念念之间，望诸骨肉眷属，与造福力救拔。

是命终之人。若未遇生缘。不得受生。在中阴身中。寿命七日为期。死而复生。如是展转生死。至七七日。决定得生。在七七日内。罪福未定。故念念之间。望诸骨肉眷属。替他造福。仗此功德之力。可转罪为福。救拔其苦也。

丑二、审定受报

过是日后，随业受报。若是罪人，动经千百岁中，无解脱日。若是五无间罪，堕大地狱，千劫万劫，永受众苦。

过七七日后。则罪福审定。随所作之业。而受果报。若是罪人。造中下品恶业。则堕边小地狱。或饿鬼畜生。展转三途。故云动经千百岁中。无解脱日。若是罪人。所造是五无间罪。堕于大地狱中。寿命极长。千劫万劫。永受众苦。

子二劝眷属修斋分三。丑初、示营斋法；二、明供养力；三、结存亡利。今初

复次长者，如是罪业众生，命终之后，眷属骨肉，为修营斋，资助业道。未斋食竟，及营斋之次，米泔菜叶，不弃于地，乃至诸食未献佛僧，勿得先食。

如罪业众生。命终之后。七七日内。望诸眷属。造福救拔。是以在生眷属。或父母兄弟。骨肉之亲。理应为亡者。修营斋供。以慰亡人之望。仗此功德。资助罪人。得脱业道。今示营斋之法。凡奉斋三宝。若未斋食竟。在营办斋供之时。所有淘米泔水。黄菜叶等。须用桶盛。不得弃之于地。必须清净手淘米。洗菜。亦不得以不净手触净食。诸食未献佛僧。勿得先食。此有二义：一者为佛设食，佛未食者，人不能消；二者预先尝啜，则变成残食，诸天不欢，鬼神不喜。此人预先尝者，五百世中，受饿鬼苦。故诫勿先食也。



丑二、明供养力

如有违食及不精勤，是命终人，了不得力。如精勤护净，奉献佛僧，是命终人，七分获一。

此示二种人。一、如法。二、不如法。虽同一营斋。使亡人或得。或不得。如有违背前法。未献佛僧。辄尔先食。又不精勤护净。如是草草营斋。是命终人。了不得力。如能意业专精。勤于护净。诸食必先奉献佛僧。如法营斋。是命终人。七分功德。得获一分。

丑三、结存亡利

是故长者，阎浮众生，若能为其父母，乃至眷属，命终之后，设斋供养，志心勤恳，如是之人，存亡获利。

以是之故。今告长者。普劝阎浮众生。若能为其父母眷属。命终之后。设斋供养。必须至心勤恳。如是之人。若存若亡。悉得利益。

庚三、鬼神发心

说是语时，忉利天宫，有千万亿那由他阎浮鬼神，悉发无量菩提之心。

是语，即前文云。拜祭鬼神无益。徒令人造业。由是忉利天宫。诸鬼神等。发露忏悔。悉发无量菩提之心。

庚四、长者礼退

大辩长者，作礼而退。

如文。

丁二、阎罗兴问赞叹。先品题。

阎罗王众赞叹品第八

梵云阎罗。此云双世。亦云双王。兄妹皆作地狱主。兄治男事。妹治女事。双治世间罪人。又以苦乐双受。一日三时受苦。铜镬从空而来。狱卒卧王热铁上。烱铜灌口。从咽彻下。无不焦烂。事竟。还与采女共相娱乐。此由宿世恶愿而来。《净土三昧经》云。昔毗沙王。与维陀如生王共战。兵力不敌。因立誓愿。为地狱主。臣佐十八人。与百万之众。亦共立誓。毗沙王者。今阎罗王是。十八大臣者。今诸小王是。百万之众。诸阿傍是。此据实业感生。若准下文。主命鬼王本迹。则阎王与众。皆不思議菩萨。住王三昧。应现其中。度脱地狱众生。今在忉利会上。闻世尊赞叹地藏威神之力。王众既主狱事。亲见罪众旋出旋入。窃疑大士有如是威神。不使依止善道。永取解脱。世尊因答以非大士威神不逮。实由众生刚强难化。然仍不辞疲倦。劫劫度生。由此问答释疑。益显地藏威神慈悲。不可思议。故云《阎罗王众赞叹品》。

丁二次品文分二。戊初、经家叙；二、正兴问。

戊初分三。己初、主伴来仪；二、列鬼王号；三、承力俱来。今初

尔时铁围山内，有无量鬼王与阎罗天子，俱诣忉利，来到佛所。

尔时，应指分身地藏升忉利天时。王与鬼众随从同到。不预集众之列者。盖宾主酬酢。事迹相连。未暇出名。故于此品。承便示之。准《长阿含经》云。阎浮提南。有金刚山。内有阎罗王宫。纵广六千由旬。今云铁围



山内者。或因阎罗与诸鬼王。具主狱事。故云从铁围山来。阎罗，鬼宫之总司，是主。无量鬼王，俱为所统，是伴。王来臣必随之。帝释天为父王。命阎罗为天子。统摄诸王。俱诣忉利。同到佛所。此承世尊光音。地藏威神之力也。

己二、列鬼王号

所谓恶毒鬼王，多恶鬼王，大诤鬼王，白虎鬼王，血虎鬼王，赤虎鬼王，散殃鬼王，飞身鬼王，电光鬼王，狼牙鬼王，千眼鬼王，啖兽鬼王，负石鬼王，主耗鬼王，主祸鬼王，主食鬼王，主财鬼王，主畜鬼王，主禽鬼王，主兽鬼王，主魅鬼王，主产鬼王，主命鬼王，主疾鬼王，主险鬼王，三目鬼王，四目鬼王，五目鬼王，祁利失王，大祁利失王，祁利叉王，大祁利叉王，阿那吒王，大阿那吒王。

前云无量是总。今别列三十四位鬼王名。以众生有善有恶。故鬼王立名亦有善恶。众生有刚有柔。故鬼王现相或慈或威。皆随众生机。立种种名。此世界悉檀释也。或以善名生众生之善。或以恶名治众生之恶。若达名字性空。即入第一义悉檀也。若得此意。则知诸鬼王。皆是不思议菩萨。大权应化。欲令众生。得四悉檀利益也。

己三、承力俱来

如是等大鬼王，各各与百千诸小鬼王，尽居阎浮提，各有所执，各有所主。是诸鬼王与阎罗天子，承佛威

神及地藏菩萨摩诃萨力，俱诣忉利，在一面立。

如是，指前三十四位鬼王。等于无量鬼王。此等鬼王。各有百千诸小鬼王。以为眷属。此非他方之鬼。尽住南洲。各有所执。如散殃鬼王等。各有所主。如主财、主命等。是诸鬼王。与阎罗天子。今承佛及地藏威神之力。俱诣忉利。在一面立。

戊二正兴问分二。己初、阎罗兴问正叹；二、鬼王护法助扬。

己初分五。庚初、经家叙仪；二、天子述意；三、许问为说；四、申疑致请；五、答示显德。今初

尔时阎罗天子，胡跪合掌。

当大辩退已之时。会中有阎罗天子。亲诣佛前。右膝著地。两手合掌。此经家叙仪。

庚二、天子述意

白佛言，世尊，我等今者，与诸鬼王，承佛威神及地藏菩萨摩诃萨力，方得诣此忉利大会，亦是我等获善利故。我今有小疑事，敢问世尊，唯愿世尊，慈悲宣说。

先述来意。次发问。我，指阎罗天子。等者。准《长阿含》。小千世界。有一千阎罗王。况三千大千世界。今佛出南洲。以此界冥王为正。与诸鬼王。本居幽冥。得上跻忉利。实仗佛威神。与地藏愿力。方得预此忉利大会。亦是我等宿植善根。故能见佛闻法。获大善利。我今有下，发问。疑事虽小。障信则大。为是请问世尊。慈悲宣说。



庚三、许问为说

佛告阎罗天子，恣汝所问，吾为汝说。

佛心慈悲。如洪钟在架。随扣随鸣。故云凡有所疑。任汝来问。吾当为汝说之。

庚四申疑致请分三。辛初、叙仪；二、申请；三、愿说。今初

是时阎罗天子瞻礼世尊，及回视地藏菩萨。

瞻礼敬佛求法之仪。佛在法座。天子对佛请问。地藏菩萨坐于佛傍。故须回视也。

辛二申请分二。壬初、直叹神通；二、转申疑事。今初

而白佛言，世尊，我观地藏菩萨在六道中，百千方便而度罪苦众生，不辞疲倦。是大菩萨，有如是不可思议神通之事。

承上回视。故云我观此地藏菩萨。依本愿自在之力。在六道中。权巧现化。或现梵天。令除憍慢。化人道令修施戒。地狱，代其受苦。饿鬼，令其饱满。修罗，调伏恶心。畜生，使得智慧。用百千方便。度脱罪苦众生。从劫至劫。身不辞疲劳。意亦无倦怠。是大菩萨。神通之事。诚不可思议。

壬二转申疑事分二。癸初、正陈疑本；二、覆申疑事。今初

然诸众生脱获罪报，未久之间，又堕恶道。

然诸罪苦众生。仗地藏菩萨之力。得脱离罪报。生于善道。但不久之间。又堕恶道。

癸二、覆申疑事

世尊，是地藏菩萨，既有如是不可思议神力，云何众生而不依止善道，永取解脱。

此正申疑怀。善对恶而言。道，即道法。世间之法。有善有恶。出世法四教不同。亦得展转论善恶。所证解脱。浅深亦异。依止中道善法。能解脱二死之苦。云何二字是疑问。既地藏大士。有如是神力。理应众生依止善道。永取解脱。今因何众生。不依止善道。永取解脱耶。为地藏神力不逮欤。为众生心力不及欤。

辛三、愿说

唯愿世尊，为我解说。

有疑在怀。若无智慧。不能解释。若无慈悲。不乐宣说。惟有世尊。悲智双运。故云但愿世尊。为我说之。解释此疑。

庚五答示显德分二。辛初、总示难化；二、别叹方便。今初

佛告阎罗天子，南阎浮提众生，其性刚强，难调难伏。

当时佛告阎罗天子。地藏神力。虽不可思议。奈南洲众生。习性刚强。如恶象驽马。难于调伏。

辛二别叹方便分三。壬初、以法直示；二、以喻释



明；三、以法合显。

壬初分二。癸初、约地藏方便救拔；二、约众生恶习难脱。今初

是大菩萨，于百千劫，头头救拔如是众生，早令解脱。是罪报人乃至堕大恶趣，菩萨以方便力，拔出根本业缘，而遣悟宿世之事。

此地藏大士。仍不舍慈悲。于百千劫中，约时。头头救拔，约处。谓在六道之中。处处救拔也。在菩萨本愿。欲令如是刚强众生。早得解脱。然是众生。不受教化。乃至造上品罪。其果报应堕大地狱中。在未堕之前。菩萨犹以方便之力。拔出根本业缘。造业之缘。应指无明。以不达诸法缘生。妄计有我。以有我故。而起贪爱。由贪爱故。则造诸业。由造业故。则有生死。故知生死根本。即是无明。今云拔出者。为此等众生。说十二因缘。使悟因惑造业。由业招报。三世轮转之事也。是以阎王犯逆。必堕地狱。世尊犹为说法。命终堕狱。即入即出。譬人将死。尚一息在。无上医王。不忍弃之。况轻病耶。益显大士慈悲愿力。不可思议也。

癸二、约众生恶习难脱

自是阎浮众生结恶习重，旋出旋入，劳斯菩萨久经劫数而作度脱。

承上而言。众生不依止善道。永取解脱。非关地藏神力未逮。由此阎浮众生。结恶习重故也。结者，略言三结，由身见、戒取、疑，结缚生死，不得解脱；广说

八十八使，由结使故，造诸恶业。但此结业。本无自性。熏习而有。非始今日。无始劫来。从迷积迷。故云结恶习重。是故虽经地藏救拔令出。转眼之间。复堕恶道。然千年暗室。一灯能破。以暗无自性故也。众生结恶。若有智慧。虽重易破。以恶业无自性故也。奈愚痴无智。从冥入冥。不堪闻大。疾入佛道。致劳此地藏菩萨。久远劫来。渐渐引诱。用三乘、五乘、七方便之法。为作度脱之缘也。

壬二以喻释明分三。癸初、迷入险道；二、知识指迷；三、迷求出路。今初

譬如有人迷失本家，误入险道，其险道中，多诸夜叉，及虎狼师子，虬蛇蝮蝎。如是迷人，在险道中，须臾之间，即遭诸毒。

譬者，譬况也。将浅以况深。将世间易知之事。以况出世难知之法。上根人直说法体。中根须以譬喻得解。有人，指六凡众生。本家，即常寂光土，亦是本觉之理。迷，即不觉念起而为无明。则真如不守自性。故云失也。由是流转五道。而为众生。故云误入险道。其险道中，即五道中。皆有因险难。及果险难。因，指五住烦恼。果，指二种生死。多诸夜叉等。此但举同居土中。因险难也。夜叉，譬五利使。虎狼愚痴，譬五钝使。虎譬慢使。《善恶分别经》云。憍傲常慢人。后生为猛虎。狼譬贪使。以狼求食。不满不止。狮譬痴使。由昔持戒虽严。而无净慧。执戒慢人。故堕畜类。因戒力故。得为兽王。无慧即痴。虬蛇譬非理嗔。蝮蝎譬执理嗔。如是迷人，即迷真逐



妄之人。在生死道中。須臾之間，即剎那無停。所謂苦則三相遷流。常被無常所侵。即遭諸毒。所謂集則四心流動。念念之間。無不是罪也。

癸二、知識指迷

有一知識，多解大術，善禁是毒，乃及夜叉諸惡毒等，忽逢迷人欲進險道，而語之言，咄哉男子，為何事故而入此路，有何異術能制諸毒。

知識，指地藏菩薩。一者所謂唯我一人能為救護。知識有二義：一者地藏常在六道教化，為諸眾生，所知所識；二者即多解大術，故稱知識。多解大術者：解，即是智；多者，得權實二智也；大，指一佛乘；術，指諸方便教。應機設教，故云善。出對治之法，故云禁。夜叉諸惡毒，指十使煩惱也。對多貪眾生說不淨觀。多瞋眾生，為說慈悲觀等。即三藏教中。所謂道則對治易奪也。忽逢者，不期而遇。即菩薩無緣慈悲。為眾生作不請之師。迷人即須臾之間。即遭諸毒。一切眾生。既念念是罪。有此惡因。將來必墮惡趣。在將墮未墮，故云欲進。此險道，應指三途為險道也。而語之言。此地藏為臨墮惡趣眾生說法。咄哉，驚覺之詞。眾生在迷。故須覺之。男子，名丈夫。《大經》云。能見佛性。名為丈夫。以眾生本具佛性。與佛無二。故以男子覺之。令知本有也。為何事故。而入此路。以惡趣中。二種人到。若非威神。即須業力。今問為度眾生仗威神之力而入此路耶。為由惡業所牽而來此耶。異術，指神通。諸毒，指三途劇苦。若由業力而入此路者。既無神通之力。何能免三途劇苦耶。

癸三迷求出路分二。子初、迷闻退步求路；二、知识接引告语。今初

是迷路入忽闻是语，方知险道，即便退步，求出此路。

此迷真之人。宿植善根。从昔未闻。今始得闻。故云忽闻是语。此属闻慧。方知险道，是思慧。退步，是止恶。求出，是行善。此二属修慧。又忽闻是语，闻四谛音声也。方知恶道，知苦也。即便退步，断集也。求，即修道。出，即证灭也。

子二知识接引告语分二。丑初、接引；二、告语。今初

是善知识，提携接手，引出险道，免诸恶毒，至于好道，令得安乐。

众生既有求出之机。是地藏菩萨。为作大善知识。而成就之。提携接手。作同行善知识也。渐渐引诱。令出恶道。作教授善知识也。免诸恶毒。至于好道。令得安乐。作外护善知识也。

丑二告语分二。寅初、正告迷人；二、嘱令转告。今初

而语之言，咄哉迷人，自今已后，勿履是道，此路入者，卒难得出，复损性命。是迷路入，亦生感重。

是诸众生。依止地藏大善知识。得离三途。生人天中。而菩萨大悲不已。再告迷人。使令觉悟。从今以后。须依止善道。万勿履此恶道。所以者何。一入地狱。动经



劫数。故云卒难得出。受苦无量。故云复损性命。人天善根既绝。法性慧命亦断。是迷人如轻醉之人。闻地藏教化。薄生微解。故云亦生感重。

寅二、嘱令转告

临别之时，知识又言，若见亲知，及诸路人，若男若女，言于此路，多诸毒恶，丧失性命。无令是众，自取其死。

众生既离苦得乐。菩萨暂时息应。故云临别之时。知识又言者。然法须流通。若见亲知。已稟内道四众弟子也。及诸路人。即在俗未受道者。无论男子女人。言于此路者。但说地狱一道。无智慧力。不能广说也。如随喜品。只说一句一偈。多诸恶毒者。狱中苦具无量。丧法性，失慧命。此说苦谛也。无令是众。自取其死者。此地狱苦。自作自受。由于因惑造业。感此苦报。此说集谛也。欲令众生。无是苦者。必须慕灭修道也。

壬三以法合显分二。癸初、合方便救拔；二、合恶习难脱。

癸初分二。子初、直以法合；二、法喻合释。今初

是故地藏菩萨具大慈悲，救拔罪苦众生，生天人中，令受妙乐。是诸罪众，知业道苦，脱得出离，永不再历。

地藏菩萨，合有一知识。具大慈悲，合多解大术。以有智慧。则能鉴机。以有慈悲。乐于说法。救拔罪苦众生。生天人中。令受妙乐。合是善知识。提携接手。引出险道。乃至令得安乐之文。是诸罪众。知业道苦。脱得出离。永不再历。合是迷路人。方知恶道。求出此路。具大

慈悲者。以心佛众生。三无差别。十界因果。不离一心。而此一心。是慈悲体。故云具也。悲拔十界苦集。慈与四种道灭。能于一时。任运与拔。故云大也。救拔罪苦众生者。菩萨虽无心攀缘。自然现益。罪苦众生。若有机者。莫不救拔。譬如一月在天。影临众水。《大经》云。我实不往。慈善根力。见如斯事。故六道众生。唯见地藏菩萨。头头救拔。如影临众水。而菩萨法身不动。如一月在天也。就菩萨慈悲。不但拔三途罪苦。与人天妙乐。以三途剧苦。人天安乐。世间习闻。易于信受也。诸罪众，是所化之机。知业道苦。是亲历之事。故愿脱得出离。永不再历也。

子二法喻合释分二。丑初、合迷人入险；二、合知识指迷。今初

如迷路入，误入险道。

合上喻如有人。乃至即遭诸毒之文。

丑二合知识指迷分二。寅初、迷人自出；二、转告他人。今初

遇善知识引接令出，永不复入。

合上有一知识。乃至亦生感重之文。

寅二、转告他人

逢见他人，复劝莫入，自言因是迷故，得解脱竟，更不复入。

合上临别之时。乃至无令是众。自取其死之文。喻文



约应。合文约机。此机应互显也。

癸二合恶习难脱分二。子初、喻合；二、法合。今初

若再履践，犹尚迷误，不觉旧曾所落险道，或致失命。

此超合上难调难伏。结恶习重。旋出旋入之文。若者，不定之词。若有智慧。知业道苦。永不再历。若再履践者。以其犹尚迷误。不觉复堕恶道。若乘急戒缓。有可生之机。虽堕易出。不失法性慧命。乘戒俱缓者。或致丧失法性慧命。或者，非决定之词。以阐提不断性善。法性慧命。法尔不失。但现无善根。故云或失也。

子二、法合

如堕恶趣，地藏菩萨方便力故，使令解脱，生人天中。旋又再入，若业结重，永处地狱，无解脱时。

自如堕恶趣。至旋又再入。合若再履践。不觉旧曾所落险道之文。自若业结重。至无解脱时。合上或致失命一句。永字，应作久字释。无字，应作不字释。谓久处地狱。不得解脱也。以众生性善之力。法尔有可出之机。况有为之法。俱属无常。故无永处地狱之理。

己二鬼王护法助扬分二。庚初、恶毒拥护；二、主命助修。

庚初分二。辛初、鬼王护世；二、如来赞喜。

辛初分二。壬初、叙已行处；二、护人修为。今初

尔时恶毒鬼王合掌恭敬白佛言，世尊，我等诸鬼王，其数无量，在阎浮提，或利益人，或损害人，各各不同。

然是业报，使我眷属，游行世界，多恶少善。

初经家叙仪。尔时，世尊对阎罗天子说竟之时。有一鬼王。名曰恶毒。前列众中。以恶毒为首。故代众陈白。我等诸鬼王。其数无量。此明数量。在阎浮提。此明住处。鬼之贵者为王。以各有所执。各有所主。事务既繁。鬼王亦多。皆属阎罗所统。住处边正不同。正处在阎浮提五百由旬之下。边处不定。或山谷海边。亦有与人同住。鬼能见人。人不见之。故欲界称五趣杂居地也。或利益人。或损害人。此明鬼类有善有恶。各各不同。但恶多善少。皆由宿世恶业所感。《正法念经》云。贪嫉邪佞。谄曲欺诳。乘是业因。报生鬼道。然亦是众生业报使然。以世人作恶者多。行善者少。故使我眷属。游行世界。亦多恶少善也。如子女善。则父母喜。子女恶。则父母嗔。由多嗔故。亦堕恶道。故二乘人。自顾力弱。不愿意入三界度生。唯菩萨大悲。知众生心性。与佛无二。愍彼愚痴。造诸恶业。是以入生死海。广度众生也。

壬二护人修为分二。癸初、所历善处；二、令护恶事。今初

过人家庭，或城邑聚落，庄园房舍。或有男子女人，修毛发善事，乃至悬一幡一盖，少香少华，供养佛像及菩萨像。或转读尊经，烧香供养一句一偈。

此段正明业报。使我眷属多恶少善之意。过人家庭。或城邑聚落。庄园房舍。此是所历之处。若论处所。本无善恶。以有男子女人。于所居之处。修行善事。举其极小。虽毛发善事。或悬一幡一盖。少香少华。供养佛像。



及菩薩像。或转读尊经。佛所说经典。皆称尊经。于此尊经。生殷重心。烧香供养。一句一偈。上云供养佛像。即佛宝。供养菩萨。即僧宝。供养一句一偈。即法宝也。

癸二、令护恶事

我等鬼王敬礼是人，如过去现在未来诸佛。敕诸小鬼，各有大力，及土地分，便令卫护。不令恶事横事，恶病横病，乃至不如意事，近于此舍等处，何况入门。

我恶毒等诸鬼王。见如是修善之人。恭敬礼拜。如过去庄严劫之千佛。现在仁贤劫之千佛。未来星宿劫之千佛。以一切诸佛。皆由凡夫地中。培植福慧。因圆果满。方成佛道。无天生弥勒。自然释迦也。故读诵经典。供养三宝。此缘了二因。是成佛之种。所以鬼王敬礼。如三世诸佛。敕诸所属小鬼。此等小鬼。各各皆有大力。亦各有土地之分。是人所在之处。即便令彼当地鬼神。用心卫护。不使恶事横事。恶病横病。乃至种种不如意事。近于此善人舍宅等处。何况入门。恶事恶病多由恶业所召。横事横病或有诸恶鬼神。滥及善人。如宋司马文宣。颇信佛法。弟丧月余。忽一鬼附其灵座。时南林灵味二寺僧。与鬼言论。鬼云。昔为尊贵。以犯众恶。受此鬼身。去寅年。有四百部鬼。大行疾疠。而犯横极众。多滥福善。故使我来监察。由是则知鬼类多恶少善。故必须大力善鬼。为之卫护也。

辛二、如来赞喜

佛赞鬼王，善哉善哉，汝等及与阎罗，能如是拥护善男女等，吾亦告梵王帝释，令卫护汝。

所以双叹善哉者。一为鬼王自敬善人。此自修随喜也。二赞其敕诸小鬼。卫护善人。此教他修随喜行也。于一切善。能随喜者。即彼功德。成己功德。故云汝等能如是拥护善男女等。称其能自利也。又以汝等眷属与阎罗天子。能如是拥护。使彼行善男子女人。不退初心。渐集功德。可成佛道。此称其能利他也。如是则三世佛种不断。吾深赞汝功。亦当告梵王帝释。令卫护汝。以酬汝之德也。梵王为三界主。帝释为欲界主。阎罗为释梵所统。故须告之。解脱鬼道之苦也。

庚二主命助修分二。辛初、当机白事；二、如来发本。

辛初分三。壬初、主命述意；二、世尊赞劝；三、鬼王受命。

壬初分二。癸初、陈我业缘主命；二、转释人不会意。

癸初分二。子初、经家叙名；二、鬼王陈事。今初

说是语时，会中有一鬼王，名曰主命。

世尊对恶毒鬼王。说此语时。法会之中。有一鬼王。名曰主命。前恶毒护修善人。今主命助修善人。世人只知生死有命。不知作善卫生。作恶戕生。况命由宿业而成。并非天与。既由业成。亦由业转。所以继恶毒之后。主命白己事也。

子二鬼王陈事分二。丑初、陈己所主事；二、明人不



会意。今初

白佛言，世尊，我本业缘，主阎浮人命，生时死时，我皆主之。

主命白世尊言。我由本昔业缘所使。今主阎浮人命。生时命存。死时命绝。皆我专司。不能违也。未发迹前。故云业缘。以一切众生。随自业转。若造增上慳贪。堕饿鬼身。因中兼行布施。则为鬼王。此论实业所感。下文显本。世尊云。慈悲愿故。现大鬼身。则是悲愿所牵。非关业缘也。

丑二、明人不会意

在我本愿，甚欲利益。自是众生不会我意，致令生死俱不得安。

在我本愿。有二解。若云百千生作大鬼王。于生死拥护众生。此是本昔之愿。若云我本业缘。主阎浮人命。在我本愿。于生死时。甚欲利益。自关此等众生。不能会我本意。致令生时死时。俱不得安。咎由自取。非我过也。

癸二转释人不会意分二。子初、禁生时杀害；二、劝死时修善。子初分二。丑初、修善得乐；二、作恶受殃。今初

何以故。是阎浮提人初生之时，不问男女，或欲生时，但作善事，增益舍宅，自令土地无量欢喜，拥护子母，得大安乐，利益眷属。

何以故，是征释之词。何故生时不安耶。因是阎浮提

人。初托胎时。不问是男是女。皆乘夙业。人行不纯。或善或恶。故在初受生时。但须多作善事。消其夙业。增益舍宅。令彼土地神。无量欢喜。自来拥护子母。得大安乐。且一家眷属。悉获利益。所谓积善之家。必有余庆也。

丑二作恶受殃分二。寅初、直示勿杀；二、转释其意。今初

或已生下，慎勿杀害，取诸鲜味供给产母，及广聚眷属，饮酒食肉，歌乐弦管，能令子母不得安乐。

上云初生之时。是受胎时。或欲生时。是将临产时。今云或已生下。或者，不定之词。谓幸或安全生下。而世俗往往庆已得子。多致杀害。不知人畜虽殊。爱子则同。庆我子生。令他子死。于心安乎。况婴孩始生。不为积福。而反杀生造业。亦太愚矣。慎勿二字，是切诫之词。由杀害而得之鲜味。慎勿供给产母。慎勿广聚眷属。饮酒食肉。歌乐弦管。以饮酒断智慧种。食肉断慈悲种。来种尚断。况现在善根耶。歌乐弦管。荡情逸志。皆损福慧。若欲新产之子。集福延龄。须遵主命之训。若不如是。能令子母。不得安乐。

寅二转释其意分二。卯初、产时恶鬼啖血；二、我令土地荷护。今初

何以故。是产难时，有无数恶鬼及魍魉精魅，欲食腥血。

何故生时杀害。能使子母不得安乐。因在分娩之时。实是生死难关。有无数恶鬼。及无数魍魉精魅。伺求其



便。欲食生时在地之腥血。如四交道。所堕肉段。乌鵲雕狼。各来争之。诸邪妖鬼。欲得儿便。周匝围绕。亦复如是。

卯二我令土地荷护分三。辰初、护令安乐；二、不知设福；三、结示殃损。今初

是我早令舍宅土地灵祇，荷护子母，使令安乐，而得利益。

上文云生时死时。我皆主之。既是主命职责所在。故于将生之时。早令舍宅神。土地神。在天曰灵。在地曰祇。一切诸神。负荷保护子母重任。使恶鬼精魅。不得其便。令彼子母。得大安乐。利益眷属。

辰二、不知设福

如是之人，见安乐故，便合设福，答诸土地。翻为杀害，集聚眷属。

如是之人。指产家眷属。见彼母子安乐。应知安乐之故。功由我令土地宅神荷护子母。便应设诸福德。酬谢土地。但不会我意。不知设福酬神。翻为杀害生灵。供给产母。庆已得子。集聚眷属。歌乐弦管。饮酒食肉。干神之怒。

辰三、结示殃损

以是之故，犯殃自受，子母俱损。

以是之故。善神远离。恶鬼围绕。汝既庆己子。杀他子。不知犯殃自受。亦使你子母俱损。然子生时不知。过

在父母眷属也。

子二劝死时修善分二。丑初、陈己本意；二、示人不会。

丑初分二。寅初、示善恶俱超；二、明鬼神变恶。今初

又阎浮提临命终人，不问善恶，我欲令是命终之人，不落恶道。何况自修善根，增我力故。

前述生时已竟。今再述死时。故云又也。阎浮提临命终人。以我本愿。不问善人恶人。总欲令此命终之人。不落恶道。何况本人。自己修集善根。增加我之威力。助彼善人。以是之故。不堕恶道。

寅二、明鬼神变恶

是阎浮提行善之人，临命终时，亦有百千恶道鬼神，或变作父母，乃至诸眷属，引接亡人，令落恶道，何况本造恶者。

所以主命助修善人者。以是阎浮提行善之人。临命终时。亦有百千恶道鬼神。扰乱其心。或变作彼之父母。乃至诸男女眷属。令起爱心。忘失正念。以是因缘。引接亡人。令落恶道。故虽有自善根力。仍须主命助也。何况本造恶业之人。临终自有恶鬼引接。又无自善根力。主命虽欲令其不堕恶道。岂可得耶。

丑二示人不会分二。寅初、亡者神识昏昧；二、眷属当为修福。今初



世尊，如是阎浮提男子女人临命终时，神识昏昧，不辨善恶，乃至眼耳更无见闻。

再称世尊者。以此事重要。不可轻说。阎浮提男子女人。临命终时。外境有如是恶道鬼神扰乱。内心则神识昏昧。不能分辨善恶。乃至眼识耳识。更无见闻。惟见先所修善恶报相。顿时现前。如日垂没。山陵堆阜。影现东移。理无西逝。众生业果。亦复如是。惟有业牵识走。丝毫不得自在。

寅二眷属当为修福分二。卯初、多善缘离恶道苦；二、少善缘除无间罪。今初

是诸眷属，当须设大供养，转读尊经，念佛菩萨名号。如是善缘，能令亡者离诸恶道，诸魔鬼神悉皆退散。

此时诸父母眷属等。当为亡者。必须设大供养。供言大者。约事倾己资财。竭力营办。约理能供所供。性本真空。一香一华。体是法界。普献三宝。等供十方。故云大也。转读尊经。念佛菩萨名号。《大品》云。若有一人。称南无佛。乃至毕苦。其福不尽。所以者何。是人曾闻佛功德。能度生老病死苦。若多若少供养。及称佛名字。得无量福。如是善业因缘。能令亡者。离诸恶道。诸者，不一之称。即普离三恶道也。纵有诸魔鬼神。仗此功德。悉皆退散。

卯二、少善缘除无间罪

世尊，一切众生临命终时，若得闻一佛名，一菩萨名，或大乘经典一句一偈，我观如是辈人，除五无间杀害

之罪。小小恶业，合堕恶趣者，寻即解脱。

上云设大供养。读经念佛。是多善缘。今但一佛名。一句一偈。是少善缘。事相虽有大小。法性本来平等。若知此理。一句一偈。犹为成佛之因。岂仅离恶道耶。一切众生。不问男女善恶。临命终时。若有人助念。令彼得闻一佛名。一菩萨名。或大乘经典。一句一偈。我观如是辈人。即得除灭五无间杀害重罪。何况小小恶业。虽应当堕恶道之人。仗此功德。寻即解脱。《大论》引《分别业经》云。佛告阿难。行恶人好处生。行善人恶处生。是恶人今世罪业未熟。宿世善业已熟。故今虽为恶而生好处。或临死时善心心所法生。亦生好处。行善人生恶处者。今世善未熟。过去恶已熟。故今虽为善而生恶处。或临死时不善心心所法生。亦生恶处。是以临终助念。使亡者一历耳根。善心心所法生。则生平恶业。即得消灭。自然离苦得乐。若暖气犹存。识未尽去。仍须高声念佛。使彼静卧。切莫搬动。死时痛苦。如生龟脱壳。倘触其身。因痛苦故。则动嗔心。由嗔心故。则堕恶道。

壬二、世尊赞劝

佛告主命鬼王，汝大慈故，能发如是大愿，于生死中，护诸众生。若未来世中，有男子女人，至生死时，汝莫退是愿，总令解脱，永得安乐。

此如来赞劝之文。先赞次劝。汝由于大慈悲故。能发如是大愿。一切众生于生死中。最不自在。而主命护诸众生。不落恶道。我今劝汝。若佛灭后。未来世中。有男子女人。至于生时死时。汝莫退救护之愿。不问善恶。总令



解脱。永得安乐。

壬三鬼王受命分二。癸初、明已拥护；二、愿生信受。今初

鬼王白佛言，愿不有虑，我毕是形，念念拥护阎浮众生，生时死时，俱得安乐。

世尊忧未来众生。劝主命莫退本愿。故鬼王即白佛言。唯愿世尊。不以后世为虑。我主命尽是身形。念念之间。拥护此阎浮众生。无论生时死时。俱得安乐。

癸二、愿生信受

但愿诸众生于生死时，信受我语，无不解脱，获大利益。

由于不会我意。致令生死。俱不得安。但愿一切众生。果能信受我语。于生死之时。慎勿杀害。作诸功德。不问善恶。无不解脱。得大利益也。

辛二如来发本分三。壬初、发远本；二、记劫国；三、结度人。今初

尔时佛告地藏菩萨，是大鬼王主命者，已曾经百千生作大鬼王，于生死中，拥护众生。是大士慈悲愿故，现大鬼身，实非鬼也。

尔时，即主命说竟之时。佛告地藏菩萨。此位主命鬼王。已曾百千生作大鬼王。本愿之力。在于生死之中。拥护众生。足见此大士。由慈悲愿故。化现鬼身。实非业缘。受鬼道身也。

壬二、记劫国

却后过一百七十劫，当得成佛，号曰无相如来，劫名安乐，世界名净住，其佛寿命不可计劫。

可知百千生作鬼。实为净佛国土。从此以后。过一百七十劫。因圆果满。当得成佛。号曰无相如来。凡所有相。皆是虚妄。若见诸相非相。故名无相如来。劫名安乐者。行因之时。护诸众生。生时死时。俱得安乐。故亦名安乐。世界名净住。鬼住不净处。不净即净。故云净住。寿命则不可以劫计也。

壬三、结度人

地藏，是大鬼王，其事如是不可思议，所度天人亦不可限量。

此主命鬼王。因果之事。俱不可思议。成佛之时。所度天人。亦无量无数。故云不可限量。

丙四、明成佛因分二。先品题，次品文，今先品题。

称佛名号品第九

前来诸品。或发明六道差别之相。或赞叹地藏威神之力。或广明利益存亡之辈。若不明出苦成佛之因。则地藏期与众生。同成佛果之愿不满。欲使众生成佛。必须念佛。即众生念转成佛念。经云。心想佛时。此身即是三十二相。八十种好。譬如铸像于模。即模之方圆。成像之方圆也。天台明念佛三昧。略分四种。一、观想念佛。二、观像念佛。三、称名念佛。四、实相念佛。所谓观想念佛者。即观十六种相。最初在落日处。作悬鼓想。念念在西。自然生西。乃至十六观三辈九品往生想。二、观像



者，佛灭度后，若众生欲灭罪者，系念谛观佛之形像，诸恶罪业，速得清静。三、称名者，如《弥陀经》云，闻说阿弥陀佛，执持名号，一日乃至七日，一心不乱，其人临命终时，即得往生极乐。四、实相念佛者，即观念佛之心，从因缘生，缘生无性，当体即空、即假、即中。然此四种念佛。观想则心粗境细。不易成就。观像则对像则有。离像则灭。实相更为不易。惟有称名易故。相续即生。故今用之。普被三根。佛者，俱云佛陀，此翻觉者。天台以六即显佛。初理即佛。众生本觉之理。与佛不殊。然无始觉之智。由是全此觉性。起惑造业。流转生死。名字已去。皆有始觉之智。与本觉合。虽名为合。非二物合。体不二故。良以始本觉体是一。所谓从性起修。全修在性也。若性德理显。修德功毕。名究竟佛。夫生死长夜。莫能自觉。能自觉觉彼者。其唯佛乎。召体曰名。表德曰号。则名别号通。故一切诸佛。皆具十号。今不念佛相好功德法身。但称佛名号者。盖一佛实德彰名。佛德不可思议。故名号功德亦不可思议。是以才举鸿名。万德全备。一称嘉号。众罪齐消也。

丙四次品文分二。丁初、示成佛正行；二、显成佛助道。

丁初分三。戊初、地藏为说利益；二、如来许救罪苦；三、大士正称佛名。今初

尔时地藏菩萨摩诃萨白佛言，世尊，我今为未来众生演利益事，于生死中，得大利益，唯愿世尊，听我说之。

前云临终得闻佛名。有罪无罪。悉得解脱。今略出十

名。渐至恒河沙数。然诸经皆赞阿弥陀佛。良以十方三世佛。共同一法身。一身一智慧。力无畏亦然。专念弥陀。与念诸佛。功德相等。亦随人所乐。岂可定局。我今为未来众生者，此有二意：一、体佛天宫付嘱之心。二、显己南洲救拔之念。夫过去者。已获超沦。现在者。今沾至化。唯佛灭后。未来众生。罔知出要。遍造恶缘。若不垂超脱之方。则长沦生死之苦。故我地藏。今特为未来众生。演说利益之事。若能依之修行。于生死中。自得多利益。大对小而言。世间利益。是小利益。出世是大利益。出世法中。有藏通别圆不等。亦得论利益大小。然一切法门。求其至直捷。至圆顿。莫如念佛求生净土。又于一切念佛法门中。求其至简易。至稳当。莫如信愿专持名号。故此之法门。能于生死之中。得多利益。唯愿世尊。许我说之。

戊二如来许救罪苦分二。己初、敦逼速说；二、赞慰无忧。今初

佛告地藏菩萨，汝今欲兴慈悲，救拔一切罪苦六道众生，演不思议事，今正是时，唯当速说。

当时佛告地藏。汝今欲发起无缘慈悲。为救拔六道罪苦众生。演说此不思议。修因证果之事。今日正当其时。但愿速说。吾可证明。

己二、赞慰无忧

吾即涅槃，使汝早毕是愿，吾亦无忧现在未来一切众生。

以吾即将涅槃。若得此法传世。使汝早完度生之愿。



吾虽涅槃。亦可无忧现在未来一切众生。譬如良医虽去。药留人间。病者服此。不忧不瘥。故云吾亦无忧也。

戊三大士正称佛名分二。己初、称名；二、结益。

己初分二。庚初、别出十名；二、总指诸佛。

庚初分十。辛初无边身佛乃至第十大通山王佛。今初

地藏菩萨白佛言，世尊，过去无量阿僧祇劫，有佛出世，号无边身如来。若有男子女人闻是佛名，暂生恭敬，即得超越四十劫生死重罪。何况塑画形像，供养赞叹，其人获福无量无边。

世间名物。各不相到。故云名无召物之功。物无应名之实。佛以实德立此嘉号。故称名功德。不可思议。然必须信佛有无量功德。能免生老病死之苦。愿离此苦。专持名号。如是信愿持名。所得利益。与空称佛名者。自是不同。千经万论。处处指归现在弥陀。今云过去无量阿僧祇劫。则非现在。此皆地藏发心以来。所值诸佛。自得利益。故为未来众生。演利益事。岂非假之空言。不如见之行事耶。有佛出世。是庆幸之语。如优昙华。时一现耳。佛号无边身者。三身皆有此意。法身周遍。故称无边。智冥此理。如函大盖大。此报身无边。由此随众生机。现十界身。此应身无边也。男子女人。若有善根。闻此无边身如来之名。暂时发生恭敬之心。闻名生觉。即名字佛。由此一念微解。即得超越四十劫生死重罪。何况从解起行。塑画佛之形像。以四事供养。歌呗赞叹佛德。其所获之福。自然无量无边。

辛二、宝性如来

又于过去恒河沙劫，有佛出世，号宝性如来。若有男子女人闻是佛名，一弹指顷，发心归依，是人于无上道，永不退转。

又字，承上而言。则知此宝性佛。在无边身如来之前。故云又于过去。恒河沙劫之前。有佛出现于世。号宝性如来。本性可尊可贵。喻如珍宝。若有男子女人。标能闻机。闻此佛名。知自己性宝。与佛不殊。如贫女宝藏。迷故不知。若于一弹指顷。发心皈依。如是之人。于无上道。永不退转。

辛三、波头摩胜如来

又于过去有佛出世，号波头摩胜如来。若有男子女人闻是佛名，历于耳根，是人当得千返生于六欲天中，何况志心称念。

梵云波头摩。此云红莲华。胜者，四莲之中，红色为胜。莲华根生于泥。茎著于水。华现于空。泥喻俗谛。水喻真谛。空喻中谛。如来之智。证于三谛。而非分证。故云胜也。若有男子女人。闻此佛名。一历耳根。是人当得千返生于六欲天中。得人身如爪上土。则天身难得。更可知矣。一历耳根。尚有如此功德。何况志心称念耶。

辛四、师子吼佛

又于过去不可说不可说阿僧祇劫，有佛出世，号师子吼如来。若有男子女人闻是佛名，一念归依，是人得遇无量诸佛，摩顶授记。

师子吼喻佛说法无畏。一切佛子。从佛口生。从法化



生。是以男子女人。闻此佛名。一念皈依。得遇无量诸佛。摩顶授记也。

辛五、拘留孙佛

又于过去有佛出世，号拘留孙佛。若有男子女人闻是佛名，志心瞻礼，或复赞叹，是人于贤劫千佛会中，为大梵王，得授上记。

梵云拘留孙。此云所应断。此约五住二死断处立名。或云非当今贤劫首佛。以上有过去之言。准《万佛经》。有无量七佛之名。亦可云贤劫首佛。以男子女人。闻此佛名。志心瞻礼赞叹。是人即于仁贤劫内。千佛会中。为大梵王。作请法主。得授无上菩提之记。

辛六、毗婆尸佛

又于过去有佛出世，号毗婆尸。若有男子女人闻是佛名，永不堕恶道，常生人天，受胜妙乐。

梵云毗婆尸。此云胜观。因中修一心三观。而得成佛。是庄严劫最后第三尊佛。释迦于胜观佛所。初种相好。若闻是佛名。永不堕三恶道。常生人天之中。受胜妙乐。藏教菩萨。第三僧祇。始离五障。方得不堕三恶道。常生人天。今乃不历僧祇。获此利益。名号功德。不可思议。

辛七、宝胜如来

又于过去无量无数恒河沙劫，有佛出世，号宝胜如来。若有男子女人闻是佛名，毕竟不堕恶道，常在天上，

受胜妙乐。

七宝之中。金宝居首。以金具四义。一、色无变。二、体无染。三、转作无碍。四、令人富。故为宝中最胜。以喻如来。究竟证得常乐我净四德。非相似分证可比也。显益大意如前。

辛八、宝相如来

又于过去有佛出世，号宝相如来。若有男子女人闻是佛名，生恭敬心，是人不久得阿罗汉果。

实相尊贵。故名宝相。闻此佛名。生恭敬心。不久得阿罗汉果。梵云阿罗汉。此云无生。三界见思已尽。无受生处。然闻佛名。应得佛果。今是大乘声闻。以佛道声。令一切闻。普于人天。而受供养。

辛九、袈裟幢佛

又于过去无量阿僧祇劫，有佛出世，号袈裟幢如来。若有男子女人闻是佛名者，超一百大劫生死之罪。

三衣总名袈裟。此去离垢服。远离六尘之垢。幢者高显。以表出世之相。此衣可以离怖。龙王得佛袈裟。即离金翅鸟怖。故男子女人。闻此佛名。顿超一百大劫生死之罪。

辛十、大通山王佛

又于过去有佛出世，号大通山王如来。若有男子女人闻是佛名者，是人得遇恒河沙佛广为说法，必成菩提。

山王，即须弥。高出诸山，故称大。四宝所成，内外



明彻，故称通。以喻如来三德。大，即法身。通，即般若。王者，自在之义，即解脱。此三皆具常乐我净四德。如四宝所成也。若人闻是佛名者。以此因缘。得值遇恒河沙数诸佛。一一佛皆广为说法。此人如法修行。必成菩提。

庚二、总指诸佛

又于过去，有净月佛，山王佛，智胜佛，净名王佛，智成就佛，无上佛，妙声佛，满月佛，月面佛，有如是等不可说佛。

佛面犹如净满月，则净月佛、满月佛、月面佛皆喻佛相好也。山王，喻佛金色之身。智胜者，一切种智，是三智中胜。净名，无垢之称，无五住之垢，于生死得自在也。智成就者，因修一心三观，果上成就三智也。无上者，佛称无上士。妙声者，佛以一音说法，众生随类各得解，故称妙声也。有如是等不可说佛。则知地藏发心已来。值佛甚多。

己二结益分二。庚初、生时称名益；二、临终称名益。

庚初分二。辛初、约一多况益；二、约生死得利。今初

世尊，现在未来一切众生，若天若人，若男若女，但念得一佛名号，功德无量，何况多名。

现在未来约时。天人男女约机。上云有不可说佛。岂能遍持。恐畏难而退。故云但念得一佛名号。功德无量。

何况多名耶。

辛二、约生死得利

是众生等，生时死时，自得大利，终不堕恶道。

是等现在未来一切众生。皆是生死凡夫。生时随业而来。死时随业而去。无依无靠。若平时念佛。仗诸佛接引。自得大利。终不堕恶道也。

庚二临终称名益分三。辛初、示称名灭罪；二、释灭无间疑；三、况自称福罪。今初

若有临命终人，家中眷属，乃至一人，为是病人，高声念一佛名，是命终人，除五无间罪，余业报等悉得消灭。

若有人在临命终时。家中眷属。同来助念。乃至仅有一人。为此将死病人。高声念一佛名号。使彼一历耳根。如是命终之人。由此功德。即得除灭五无间重罪。其余中下业报。自然悉得消灭。

辛二、释灭无间疑

是五无间罪，虽至极重，动经亿劫，了不得出，承斯临命终时，他人为其称念佛名，于是罪中，亦渐消灭。

如是五无间罪。虽至极重。若一入地狱。动经亿劫。了不得出。然仗此临命终时。他人助其称念佛名。于此无间罪中。亦得渐渐消灭。

辛三、况自称福罪



何況眾生自稱自念，獲福無量，滅無量罪。

何況自己稱念佛名。則獲福無量。滅罪無量矣。夫吾人一念心性。如不決定。隨迷悟因緣。而有十界差別。前地獄名號。是惡因惡果。今稱佛名號。是善因善果。故知十界因果。不離一心。若能念念彌陀。自然塵塵極樂。心尚不緣三乘賢聖。況六凡耶。即以生死凡夫。等諸佛于一朝。如是因果。非尋常教道所詮。地藏菩薩云。為未來眾生。演利益事。吾人生於此处此時。舍此法門。欲于生死中。得大利益。誠難誠難。

地藏菩萨本愿经略解卷下

天台山国清寺静权法师述

丁二、显成佛助道。初品题。

较量布施功德缘品第十

前称佛名号，是正行。今布施功德，是助道。《阿弥陀经》云。不可以少善根福德因缘。得生彼国。念佛是多善根。布施是多福德。正助合行。速疾至于涅槃彼岸。故《称佛名号》之后。而有《较量布施功德缘品》也。较者，比较也。量者，度量也。《孟子》曰。权，然后知轻重。度，然后知长短。世间万物。由权度而知长短轻重也。故权度为能较量。长短重轻为所较量。万物为受较量者。世间之法如是。出世之法亦然。佛法虽广。不出六度。举一布施。六度俱收。何者。布施有三。如遇贫穷者。普施与财物。资助其生命。如遇愚痴者。普施与佛法。开发其智慧。如遇恐怖者。普施与无畏。安乐其身心。资生施即财。法施须具三。禅定能鉴机。智慧能说法。精进则乐说不倦。无畏则具二。忍辱不报有怨。持戒不恼无怨。故今但举布施一法。较量其功德也。功者，破恶名功。德者，生善名德。即对治为人二悉檀也。缘者，因缘也。一切诸法。皆有因缘和合而成。布施亦然。内以信心为因。外以福田为缘。而布施得成。内心有净有



不净。外田有胜有劣。故同一行施。而所得功德。或大或小。是以四教行人。同修布施之行。或仅破见思之恶。生真谛之善。或兼破无明之恶。生中道之善。由于内心观慧不同也。故知因缘为能较量。功德为所较量。布施为受较量者。如是则随修一行。须量其缘起。由是比较所获功德。或重或轻。不失毫厘。所谓因赅果海。果彻因源也。

丁二次品文分二。戊初、地藏请较施福；二、如来对众较量。

戊初分二。己初、经家叙仪；二、地藏疑请。今初

尔时地藏菩萨摩诃萨承佛威神，从座而起，胡跪合掌。

前称佛名号。是了因慧性。今布施功德。是缘因善性。以缘因资助了因。始能开发正因。譬如密室中灯。方能照物也。故地藏已说称佛名号。世尊复欲假地藏之问。发明布施功德。《法华》云。定慧力庄严。以此度众生。是知非地藏有疑请问。是承佛威神令问。欲使众生。普得闻知也。

己二、地藏疑请

白佛言，世尊，我观业道众生，较量布施，有轻有重，有一生受福，有十生受福，有百生千生受大福利者，是事云何。唯愿世尊，为我说之。

通论十界。皆由业感。别论六凡众生。三善道是白业所感。三恶道是黑业所感。故云业道众生。然佛在人间示成正觉。须指人道众生。修行布施之业。以我地藏法眼观之。同一行施。较量功德。有轻有重。或仅有一生受福。

或有二生乃至十生、百生、千生受大福利者。行施是同。云何果报不同。唯愿世尊。为我说之。

戌二如来对众校量分三。己初、诚听许说；二、因疑愿闻；三、正申较量。今初

尔时佛告地藏菩萨，吾今于忉利天宫一切众会，说阎浮提布施较量功德轻重，汝当谛听，吾为汝说。

汝既代众请问。吾今普为忉利天宫。大众之前。说阎浮提行布施者。较量功德。所以有轻有重之故。汝当审谛而听。吾今为汝说之。

己二、因疑愿闻

地藏白佛言，我疑是事，愿乐欲闻。

如文。

己三正申较量分二。庚初、正较；二、结示。

庚初分二。辛初、王臣施福；二、男女施福。

辛初分二。壬初、正较多少；二、结向成佛。

壬初分四。癸初、施卑劣根阙福；乃至第四施老病产妇福。

癸初分二。子初、明施人尊；二、显施福胜。

子初分二。丑初、能施主；二、所施田。今初

佛告地藏菩萨，南阎浮提有诸国王，宰辅大臣，大长者，大刹利，大婆罗门等。

此南洲有一类国王。或宰辅大臣。乃至大婆罗门。等者，即居士一类。此皆由宿世施福。今感富贵之报。



丑二、所施田

若遇最下贫穷，乃至癰残喑哑，聋痴无目，如是种种不完具者。

此是悲田。尤宜种福。昔文王发政施仁。先施鳏寡孤独。此四者。天下之无告者也。若遇二字。正显因缘和合。最下贫穷。举人中最下劣者。此由宿世不施之报。或许施贫者。令他欢喜。后悔不与。招最下贫穷之报。高者曰癰。缺者曰残。皆身体上之病。喑哑，口不能言。聋则不闻。痴则不别。无目则不睹。乃人中最可怜者。如是或癰或残。种种不完具之人。

子二显施福胜分二。丑初、正明能施慈悲；二、转释所施卑劣。今初

是大国王等欲布施时，若能具大慈悲，下心含笑，亲手遍布施，或使人施，软言慰喻，是国王等所获福利，如布施百恒河沙佛功德之利。

是诸国王。乃至大婆罗门等。遇最下贫穷。诸根不完具之人。心欲修行布施时。以三法和合。一、内心。二、外境。三、财物也。若者，不定之词。正显或能或不能。所以功德不等。大慈与乐。大悲拔苦。二者具足。故云具大慈悲也。此慈悲心。由苦境而发。富贵之人。性多高慢。今降尊就卑。如母见子。故曰下心。含笑可知欢喜施与。而无吝惜之情。自己亲手周遍布施。此显至诚心施。令贫者实得利益。或使他人布施。并用软言安慰者。以求人者畏人。令彼莫怖。慈心晓喻者。使知今世苦报。由宿

世恶业所感。自作自受。莫怨天。莫尤人。是国王等。能如是行布施者。所获福德利益。犹如布施百恒河沙佛功德之利。《维摩经》云。若施主等心施一最下乞人。犹如如来福田之相。无所分别。等于大悲。不求果报。是则名曰。具足法施。

丑二、转释所施卑劣

何以故。缘是国王等，于是最贫贱辈及不完具者，发大慈心，是故福利有如此报。百千生中，常得七宝具足，何况衣食受用。

佛无量劫。福慧修成。贫苦者。由恶业而来。似应供佛福多。今云布施贫穷。如施百恒河沙佛功德。此何故耶。由是国王等。对于最贫贱辈及诸根不具者。能发起大悲心故也。论田固是佛胜。今取心胜。况佛不须财物。此辈贫人。正须资生之具。乃施门周急之意。《地持》云。菩萨见来求者。有二种人。一者非贫。但孤独无依。二者贫苦。孤独无所依怙。作是念言。若我财多。当令俱足。若财少者。先给贫苦无依恃者。《像法决疑经》云。有诸众生。作诸福业。但求名闻。倾家财物。以用布施。及见贫苦孤穷。呵骂驱出。不济一毫。名为颠倒作善。不正作福。如此人等。甚可怜愍。用财甚多。获福甚少。今既怜愍之心。生于悲田。报施之福。百千生中。七宝尊贵。尚得具足。况寻常衣食受用乎。

癸二施塔寺圣像福分二。子初、明能所施；二、显所施福。今初



复次地藏，若未来世，有诸国王，至婆罗门等，遇佛塔寺，或佛形像，乃至菩萨，声闻，辟支佛像，躬自营办，供养布施。

未来世时。指佛灭后。诸国王乃至婆罗门等。能施主。值遇佛塔寺之中。或见佛形像。乃至三乘圣像。所施敬田。以至诚心。亲自营办。供养之具。布施佛像。及圣众像。

子二显所施福分二。丑初、三劫受帝释乐；二、十劫为大梵王。今初

是国王等，当得三劫为帝释身，受胜妙乐。

如是国王等。自此以后。当得三劫为帝释身。受殊胜微妙之乐。

丑二、十劫为大梵王

若能以此布施福利，回向法界，是大国王等，于十劫中，常为大梵天王。

若能以此施福。不为自利。回向法界众生。运心既广。果报自胜。如是国王等。于十劫中。常为大梵天王。同修一行。由回向不回向。果报遂殊。是以凡所修功德。皆须回向。回向有三。一者回事向理。原由理具。方有事用。今回此心。向于实际。二回自向他。昔迷理遍。善严自心。今顺本性。回向众生。三回因向果。三业毫善。皆成缘了二因。因必显果。同归究竟三德。

癸三施修补经像福分二。子初、明修因；二、显施福。

子初分二。丑初、自修补经像；二、劝布施结缘。今初

复次地藏，若未来世，有诸国王，至婆罗门等，遇先佛塔庙，或至经像，毁坏破落，乃能发心修补。

未来世时。有诸国王。乃至婆罗门等。能施主。遇先佛塔庙。所施田。庙者，貌也。彷彿佛菩萨等之形貌也。造塔庙有三意。一、表人胜。二、令他信。三、为报恩。先佛者。过去之佛。年代久远。或有至于经典圣像。毁坏破落。乃能发心修补。

丑二、劝布施结缘

是国王等，或自营办，或劝他人，乃至百千人等布施结缘。

此国王及婆罗门等。或自营办修补。或劝他人共同修补。从一人乃至百千人等。布施财力。共结善缘。

子二显施福分二。丑初、自他千生为王；二、回向尽成佛道。今初

是国王等，百千生中常为转轮王身。如是他人同布施者，百千生中常为小国王身。

此国王等。能劝之人。百千生中。为转轮王。如是所劝他人。同修布施者。百千生中。常为小国王身。同修佛塔。有能劝者。有所劝者。或为轮王。或为小王。果报不同。

丑二、回向尽成佛道



更能于塔庙前，发回向心，如是国王乃及诸人，尽成佛道，以此果报无量无边。

修补塔寺。报感人天。更能于塔庙前。发回向心。开人天小善。成涅槃因。如是国王。及他人同布施者。尽成佛道。由此回向功德。所获果报。无量无边。故同修布施。不能回向。只成人天小果。若能回向。便得成佛。所得果报。不同如是。

癸四施老病产妇福分二。子初、能所施人；二、所施因果。今初

复次地藏，未来世中，有诸国王，及婆罗门等，见诸老病及生产妇女。

国王及婆罗门等，能施主。老、病、生产，所施田，此三皆是悲田。老，则根熟气喘、行步艰难、饮食须人。病，则百骸酸痛、命如悬丝、无人奉侍、待弊奚辞。故佛敕看病，为第一福田。产妇初行分娩，恶露盈身，若不时施饮食，母子相与俱亡。故此三类，尤仁人所应动心而周给者也。

子二所施因果分二。丑初、修因；二、获果。今初

若一念间，具大慈心，布施医药，饮食，卧具，使令安乐。

此一念。与前一念归依不同。前显时间短促。今显时间重要。与临终时一念相同。若此时不救。即亡身失命。故此一念之间。切莫游移。即具大慈心。立刻布施医药、饮食、卧具。使彼老者、病者、生产者。而得身安心乐。故《大论》云。若人饥渴。给足饮食。感恩则深。佛说施

远行人、远来人、病人、看病人。风寒众难时施。是为时施。病者非药饵莫疗。身命非饮食不立。卧具尤为老、病、产妇之要物。是知所施之物。不在珍贵。时节不论久长。但此时急需此物。动一念慈悲之心。并非望其果报。立即布施医药等。令彼安乐。

丑二、获果

如是福利最不思议，一百劫中常为净居天主，二百劫中常为六欲天主，毕竟成佛，永不堕恶道，乃至百千生中，耳不闻苦声。

若能如是。及时行施。所得福利。最不思议。以老、病、产妇。人所厌恶。今慈心施与。故一百大劫之中。常为净居天主。二百小劫之中。常为六欲天主。然此犹是世乐。非最不思议。由是人于一念间。具大慈心。了知心佛众生。三无差别。将来毕竟成佛。方名最不思议。在行施以后。未成佛之前。中间永不堕恶道。乃至百千生中。耳尚不闻受苦之声。何况身历耶。

壬二结向成佛分二。癸初、结回施报；二、敕普劝学。今初

复次地藏，若未来世中，有诸国王，及婆罗门等，能作如是布施，获福无量。更能回向，不问多少，毕竟成佛，何况释梵转轮之报。

文分二节。初结上施福。更能下，结前回向。有诸国王。及婆罗门等。能施主。能作如上布施。所获福报。无量无边。此总结上施福。更能将所修施福。不为自利。回



向众生。不求人天福报。回向无上菩提。了所修施福。皆缘生无性。当体即真。如是不问布施。或多或少。皆当毕竟成佛。何况释梵轮王。人天小果耶。

癸二、敕普劝学

是故地藏，普劝众生当如是学。

布施回向。有如是福利。以是之故。今告地藏。我灭度后。汝须普劝未来众生。应当如是修学布施。亦当如是修学回向。所谓三世诸佛。如是回向。我亦如是回向。正是常随佛学也。

辛二男女施福分三。壬初、标佛法中福利；二、较佛法中福利；三、结向法界功德。今初

复次地藏，未来世中，若善男子善女人，于佛法中，种少善根，毛发沙尘等许，所受福利，不可为喻。

修行布施。不但国王等。富贵之人可行。即最贫人亦可行。人虽至贫。岂无寸帛半缕。为人裹指疮耶。纵使赤贫。亦可以力施人。今示于三宝中。种少善根之相。初总标善男女等。是能施主。在于三宝之中。是所施福田。就是种少善根。如一毛、一发、一沙、一尘。果上所获福利。不可为喻。《大论》云。佛田清淨。拔爱等诸烦恼秽草。净戒为平地。大慈悲为良肥。除诸恶邪咸土。三十七品为沟塍。十力、四无所畏、四无碍智慧为垣墙。能出生三乘涅槃果报。植种于此无上无比田者。其福无尽。故云所受福利。不可为喻也。

壬二较佛法中福利分三。癸初、施供圣像福；二、施

供大乘福；三、施修经典福。

癸初分二。子初、直明施福；二、回向巨喻。今初

复次地藏，未来世中，若有善男子善女人，遇佛形像，菩萨形像，辟支佛形像，转轮王形像，布施供养，得无量福，常在人天，受胜妙乐。

若者，不定之词。过去世若无善根。则从冥入冥。永不闻佛名。若宿世有善根男子女人。于佛灭后。未来世中。得遇佛形像。或菩萨形像。此皆出世圣人。教人出苦。是众生敬田。轮王虽未出生死。其以十善化世。兼有水土。乃民之恩田。故有布施供养者。得无量福。常在天上人间。受殊胜微妙之乐。

子二、回向巨喻

若能回向法界，是人福利，不可为喻。

以少香少花。供养圣像。若能回向。其福不尽。譬如杯水投海则不涸。江河之水虽多。总有尽时。《法华》云。法住法位。世间相常。世相本是生灭无常。以由实相而为世间之相。实相常故。世间之相亦常。故福德入于实相。实相无尽。福德亦无尽也。以一切法。皆由理成事。故须回事向理。理性周遍。圆具十界。故须回自向他。具佛界故。须回因向果。是知三种回向。即一种回向。

癸二施供大乘福分二。子初、直明施福；二、回向巨喻。今初



复次地藏，未来世中，若有善男子善女人，遇大乘经典，或听闻一偈一句，发殷重心，赞叹恭敬，布施供养，是人获大果报，无量无边。

人在生死大海之中。忽遇佛法。何异盲龟值浮木孔。深可庆幸。此皆无量佛所。种诸善根。于佛灭后。未来世中。得遇大乘经典。准《起信论》，大，义有三：一者体大，谓一切法，真如平等，不增减故；二者相大，谓如来藏具足无量性功德故；三者用大，能生一切世间出世间善因果故。乘者，运载之义。一切诸佛。本所乘故。一切菩萨。皆乘此法。到如来地故。或听闻一偈一句。皆是成佛种子。《金刚般若》云。闻是章句。信心清净。即生实相。故于大乘经典。及宏法之师。必须发起殷勤尊重之心。赞叹人法而恭敬之。布施人法而供养之。是人必获大乘常乐果报。不比小乘毁断果报。故云无量无边。

子二、回向巨喻

若能回向法界，其福不可为喻。

欲度大海。必须船筏。欲出生死。必须佛法。一切众生。迷此法故。流转生死。若遇善友。听闻正法。如说修行。则离生死。证涅槃乐。是以世尊。于过去世。为半偈故。而舍全身。复欲利益当现众生。若树若石。处处流通。所以听闻一偈一句。不但自利。更能回向法界众生。同证菩提。其所获福利。不可为喻。

癸三施修经典福分二。子初、自他修福；二、自他获报。今初

复次地藏，若未来世中，有善男子善女人，遇佛塔寺，大乘经典，新者布施供养，瞻礼赞叹，恭敬合掌，若遇故者，或毁坏者，修补营理，或独发心，或劝多人同共发心。

佛灭度后。应当结集经藏。流通世间。使正法不断。末世众生。依之得度。所以若有善根男子女人。于未来世中。遇塔寺内。有大乘经典。若是新者。布施与人。令彼供养。瞻礼赞叹。恭敬合掌。是名法施。若遇故旧经典。或毁损破坏。即当修治补完。经营料理。或独自发心。或劝一人乃至多人。共同发心修补。《五百问》云：“戒律不用，流落，可烧否？答：‘不得。不知有罪，烧，舍堕。若知烧有罪，故烧，犯决断。与方便破僧同，亦如烧父母。’”是知故旧经典。只可修补。切莫烧毁。

子二、自他获报

如是等辈，三十生中常为诸小国王。檀越之人，常为轮王，还以善法教化诸小国王。

如是受劝之人同共发心。修补经典。自此以后。三十生中。常为诸小国王。檀越，即施主，是能劝之人，常为轮王。前世劝他发心修补。今世还以十善之法。教化诸小国王。梵云檀那。此云布施。越者，谓布施能越贫穷之海。乃华梵兼称也。

壬三结向法界功德分二。癸初、指修善事；二、示回向法界。今初



复次地藏，未来世中，若有善男子善女人，于佛法中所种善根，或布施供养，或修补塔寺，或装理经典，乃至一毛一尘，一沙一涕。

善根，即中道实相。为众善根本。亦名佛种。布施供养等。皆缘因功德。能起佛种。《法华》云。佛种从缘起。是故说一乘。惟此一佛乘中。显示诸法实相。故未来世中。若有善根男子女人。必须依佛法中。所显实相之理修行。布施供养。或修补塔寺。或装理经典。至少善事。乃至仅仅一毛一尘。一沙一涕。如是功德。皆为涅槃之因。

癸二示回向法界分二。子初、向理千生受乐；二、向己三生受福。今初

如是善事，但能回向法界，是人功德，百千生中受上妙乐。

如是所修善事。但能回向法界众生。同入实相之理。是人功德。百千生中。受上妙乐。

子二、向己三生受福

如但回向自家眷属，或自身利益，如是之果，即三生受乐。舍一得万报。

如不知性具性遍之理。于三宝中。所修善事。但回向自家眷属。或自身利益。如是果报。即得三生受乐。舍一而得万报者。以三宝为无上福田故也。

庚二、结示

是故地藏，布施因缘，其事如是。

前地藏问布施功德。有轻有重。所以有一生乃至千生受福。在果报差别上起疑。然果由因克。故世尊答以布施因缘不同。致使获报差别。其事如是也。

乙三、流通分。先品题。

地神护法品第十一

较量施福。助成佛道。地藏本愿。大意昭明。则一经正宗已讫。然如来说法。非仅益于现机。必须流于未来。通于十方。故有流通分也。《地神护法》。居流通之首者。比如世间以国王为大。今坚牢地神。主南洲土地。盖宏经必借地。转法须赖食。此皆地神主之。故必须地神护持正法。始得流通。《金光明经》云。说法比丘。坐法座时。我常昼夜。卫护不离。隐蔽其形。在法座下。顶戴其足。令说法之处。增长地味。五谷增盛。佛初成道。由地神证明功德。故世尊一代时教。皆由地神护持。非仅此经也。

乙三次品文分二。丙初、别流通；二、总流通。

丙初分三。丁初、地神护法流通；二、见闻利益流通；三、嘱累人天流通。

丁初分二。戊初、坚牢叹德；二、教主述成。

戊初分二。己初、通明昔遇；二、别赞今闻。今初

尔时坚牢地神白佛言，世尊，我从昔来，瞻视顶礼无量菩萨摩訶萨，皆是大不可思议神通智慧，广度众生。

佛说布施因缘已竟之时。地神名坚牢者。叹其德也。



坚能荷负万物。牢能安立群品。我从昔来者。世尊初成道时。魔来问佛。往昔有何功德。佛以手指地。坚牢地神即为证明往昔功德。若佛未成道前为往昔者。则坚牢本地久远。诚不可思议。从昔日以来。常亲近世尊。由是得瞻视顶礼无量菩萨。皆非聊尔之人。有大不可思议神通。能现十界身。大不可思议智慧。能说权实法。以此广度众生。

己二别赞今闻分二。庚初、赞地藏德；二、护供养人。

庚初分三。辛初、叹誓愿深重；二、举大士例显；三、显教化难量。今初

是地藏菩萨摩訶萨，于诸菩萨誓愿深重。世尊，是地藏菩萨于阎浮提有大因缘。

惟此地藏菩萨。于诸无量菩萨之中。誓愿最为深重。且此菩萨。偏与阎浮众生。有大因缘。

辛二、举大士例显

如文殊，普贤，观音，弥勒，亦化百千身形，度于六道，其愿尚有毕竟。

前云。昔来瞻礼菩萨。皆是大不可思议神通智慧。广度众生者。例如大智文殊菩萨。大行普贤菩萨。大悲观世音菩萨。大慈弥勒菩萨。其神通智慧。亦同地藏。能化百千身形。随机说法。度于六道众生。但其誓愿。尚有毕竟。

辛三、显教化难量

是地藏菩萨，教化六道一切众生，所发誓愿劫数，如千百亿恒河沙。

总不及是地藏菩萨。从久远来。教化六道众生。所发誓愿。所历劫数。如百千亿恒河沙数之多。迄至于今。犹未毕愿。慈愍此世罪苦众生。又发重愿。除非众生度尽。斯愿方满。

庚二护供养人分二。辛初、塑像供赞得利益；二、读经供像消横事。

辛初分三。壬初、修因；二、得益；三、结成。今初

世尊，我观未来及现在众生，于所住处，于南方清洁之地，以土石竹木作其龕室，是中能塑画，乃至金银铜铁，作地藏形像，烧香供养，瞻礼赞叹。

地藏有如是重愿。复与南洲众生。有大因缘故。有供养之者。获福无量。今由坚牢地神为作证明。故云我观未来及现在众生。于自所住之处。择南方清洁之地。所以须南方者。以菩萨常居南方。大集会中。从南方世界。现香雨华云而来。但须清洁之地。亦不定南方。准密部作坛之法。必须穿去秽土。取下净土。先用土石竹木。造成龕室。于是龕中。或泥土彩画。乃至金银铜铁。作地藏形像。于圣像前。或烧香供养。或身瞻礼。或口赞叹。

壬二得益分二。癸初、标示十利；二、征列十名。今初

是人居处，即得十种利益。

是人所居之处。以供有圣像故。即得十种利益。有佛舍利。称八吉祥地。今是尊重弟子住处。随所住地。并名



吉祥。故每萃休征。岂仅十种利益耶。

癸二、征列十名

地藏菩萨本愿经略解

何等为十。一者，土地丰壤。二者，家宅永安。三者，先亡生天。四者，现存益寿。五者，所求遂意。六者，无水火灾。七者，虚耗辟除。八者，杜绝恶梦。九者，出入神护。十者，多遇圣因。

初句征。一者下列。次第相生。则有十利。首标土地。以立其居。次明家宅。以安其身。乃至鬼神护助。此皆世间利益。终于多遇圣因。则是出世利益。柔土曰壤。全无沙石。故曰丰壤。如是则所种倍收。衣食无虞。自然家宅永安。不须外求。仗地藏威神之力。使先亡者生天。现存者益寿。凡所营求。皆得遂意。外无水火之灾。内则辟除虚耗。夜卧安稳。杜绝恶梦。日间出入。吉神护持。以供养地藏故。多遇善友。得闻正法。为成就圣道之因缘。《涅槃经》云。善知识者。令人渐远恶法。增长善法。本未有定、慧、解脱、解脱智见。即便有之。未具足者。则得增广。如是圣因。恒多值遇。若不因修供大士。曷克臻此十利乎。

壬三、结成

世尊，未来世中，及现在众生，若能于所住处方面，作如是供养，得如是利益。

此总结前修行得益二文。作如是供养。结前修因。得如是利益。结前得益。《十轮经》云。假使有人。于弥勒、妙吉祥、观自在、普贤之类。而为上首。殒伽沙等诸

大菩萨所。于百劫中。至心皈依。称名念诵。礼拜供养。求诸所愿。不如有人。于一食顷。至心皈依地藏菩萨。令诸有情。所愿满足。如如意宝。亦如伏藏。如是大士。为欲成熟诸有情故。久修坚固大愿大悲。勇猛精进。过诸菩萨。

辛二、读经供像消横事

复白佛言，世尊，未来世中，若有善男子善女人，于所住处，有此经典及菩萨像，是人更能转读经典，供养菩萨。我常日夜以本神力，卫护是人，乃至水火盗贼，大横小横，一切恶事，悉皆消灭。

前佛告普广。能于十斋日。读是经一遍。百由旬内。无诸灾难。现世令此居家。无诸横病。衣食丰溢。今地神亦白世尊。未来世中。若有善男女等。于是所住之处。供此本愿经。及菩萨圣像。即得十种利益。此人更能发心。转读经典。供养菩萨。不但地藏拥护。即我坚牢。于日夜之间。常以本有神力。卫护是人。使水灾。火灾。盗贼偷劫。大横如《药师经》九种横死。小横如《九横经》。一切恶事。总结诸不如意事。悉皆消灭无余。人能供养读经。身口意三业清净。自然灾横灭而祯祥集。况加以地藏本愿之力。坚牢本有神力。而拥护之耶。

戊二教主述成分二。己初、赞德；二、述事。

己初分二。庚初、直赞神力；二、转释主物。今初

佛告坚牢地神，汝大神力，诸神少及。

坚牢云。以本神力。卫护读诵是经典者。今世尊述



成。汝之本有神力。为诸地神所不及。如善财参安住地神时。百万地神。各放光明。则知同类地神甚多。

庚二、转释主物

何以故。阎浮土地，悉蒙汝护，乃至草木沙石，稻麻竹苇，谷米宝贝，从地而有，皆因汝力。

何故诸神不及。此南洲广七千由旬。深十六万八千由旬。此中众生。皆仗汝神力保护。盖从地而有。乃至一草一木。一沙一石。稻麻竹苇。谷米宝贝。皆因汝力。而得生长故也。准《业报差别经》云。若有众生。于十不善业。多修习故。感诸外物。悉不具足。若修十善业。于上相违。此由众生恶业炽盛。以致地神不护。减损万物。若多修德。增其威力。万物加美。故地神云。是金光明。若广说时。我及眷属。所得功德。倍过于常。增长身力。心进勇锐。

己二述事分二。庚初、述成称扬利益事；二、述成读供拥护事。今初

又当称扬地藏菩萨利益之事，汝之功德，及以神通，百千倍于常分地神。

南洲众生。悉蒙汝护。福德已不可思议。今又当众称扬地藏十种利益之事。以大士威神之力。使汝之功德。及与神通。胜于常分地神百千万倍也。

庚二述成读供拥护事分二。辛初、男女供像读经；二、拥护除灾证果。今初

若未来世中，有善男子善女人，供养菩萨，及转读是经，但依地藏本愿经一事修行者。

法虽可轨。宏之在人。未来世中。佛灭度后。正是法弱魔强之时。若有善男女等。供养地藏菩萨。及转读此经。众生力弱。不能尽依经中修行。但依本愿经中一事。专心修行者。

辛二拥护除灾证果分二。壬初、地神拥护除灾；二、诸天拥护证乐。今初

汝以本神力而拥护之，勿令一切灾害及不如意事，辄闻于耳，何况令受。

汝不忘誓愿。当尽本神之力。拥护此人。以此善信。若佛现在。足称四信。今于灭后。可当五品。最初一念随喜。二者读诵。三者解说。四兼行六度。五正行六度。以读经是第二品人。供养属兼行六度。是第四品人。当知五品观行为如佛。故须拥护也。一切灾害。无论水灾、火灾、风灾、刀兵、瘟疫、饥馑之灾。皆伤害众生。故名灾害。及不如意事。勿令辄闻于耳。何况身受耶。

壬二诸天拥护证乐分二。癸初、示拥护人；二、释拥护意。今初

非但汝独护是人故，亦有释梵眷属，诸天眷属，拥护是人。

此供像读经之人。不但汝坚牢拥护。亦有帝释眷属。梵王眷属。三界诸天。悉来拥护此人。

癸二、释拥护意



何故得如是圣贤拥护。皆由瞻礼地藏形像，及转读是本愿经故，自然毕竟出离苦海，证涅槃乐。以是之故，得大拥护。

初句征。圣，指释梵。贤，指眷属。何故得如是圣贤拥护。皆由此善男女等。瞻礼地藏形像。及转读此本愿经故也。以地藏大士累劫宏愿。必令众生成佛。故供像读经之人。即为地藏宏誓所摄。譬如万流入海。众星拱北。自然不加功力。究竟出离生死苦海。得证涅槃常乐。以是人即未来佛故。所以得大拥护也。

丁二、见闻利益流通。先品题。

见闻利益品第十二

见属于眼。闻属于耳。若有众生。或眼见地藏圣像。或耳闻地藏名号。无不获大利益。例同观音闻名及见身。心念不空过。能灭诸有苦。见身致礼。即身业机。闻名故称。即口业机。身口由心。即意业机。机感既成。菩萨即应。无空过者。由是得灭诸苦。即利益也。若天人五衰相现。见地藏像。闻地藏名。一瞻一礼。转增天福。或病人未终之时。眼耳见闻。知道眷属为其塑画地藏形像。即得病愈寿增。此由大士久远劫来。发宏誓愿。普令众生。离苦得乐。故凡见像闻名。皆入菩萨大誓海中。莫不各遂所愿。总令究竟成佛。方满菩萨本愿。如此利益。诸经所无。故必须在在处处。流通此经也。

丁二次品文分二。戊初、释迦现相叹德事；二、观音请说为流通。

戊初分二。己初、顶门放光证事；二、口轮出音叹

事。今初

尔时世尊从顶门上放百千万亿大毫相光。

本经凡三次放光。初、《忉利天宫神通品》，含笑放光。二、《如来赞叹品》，举身放光。皆各有所表。已如上述。今从顶放光。表证极果。由中道圆因而克。毫相在两眉中间。以表中道。大表法身德。毫相表解脱德。光表般若德。百千万亿表百界千如。良以吾人一念因心。圆具百界千如。三千性相。即空即假即中。始从名字。终至究竟。莫不以此为所观境。故诸佛所证。即证众生之所本具。自既从因克果。欲令众生者睹相悟心。各知本有。故从顶门放百千万亿大毫相光也。门有能通、当体二义。即而常六。因果历然。此约能通名门。六而常即。生佛不二。此约当体名门。今先总标。所谓下，别列。尔时即如来述成已竟之时。顶门者。《禅秘要经》云。人身三分。脐为中原。头为殿堂。顶为天门。世尊从无见顶相。放光对常光而言。白毫相在两眉中间。八楞中空。初生时五尺。成道后丈六。佛从因至果。所有功德。在毫相显现。百千万亿。光色不同。而毫相是一。从一为无量。以应众生之机。无量归于一。归原无二理也。

所谓白毫相光，大白毫相光，瑞毫相光，大瑞毫相光，玉毫相光，大玉毫相光，紫毫相光，大紫毫相光，青毫相光，大青毫相光，碧毫相光，大碧毫相光，红毫相光，大红毫相光，绿毫相光，大绿毫相光，金毫相光，大金毫相光，庆云毫相光，大庆云毫相光，千轮毫光，



大千轮毫光，宝轮毫光，大宝轮毫光，日轮毫光，大日轮毫光，月轮毫光，大月轮毫光，宫殿毫光，大宫殿毫光，海云毫光，大海云毫光。

上云百千万亿大毫相光。所谓下，别列三十二种。即白毫相光。大白毫相光。乃至海云毫相光。大海云毫相光。上既以百千万亿表百界千如。大毫相以表三德。故知十法界。开之皆是三德。《法华文句》。以五色譬五道。青譬地狱因果。黄譬饿鬼因果。赤譬畜生因果。白譬人天因果。则白毫是人天因。大白毫是人天果。上来开地狱惑业苦三。即成三德。地狱尚开。何况人天。六道尚开。何况三乘。故三乘普会。九界同归。方畅如来出世本怀。亦满大士度生宏愿。既开正报。亦开依报。如宫殿大宫殿。庆云大庆云等。以依报有净秽之殊。故以大小别之。如极乐为同居净土。娑婆为同居秽土。例知方便亦有净秽。二乘是方便秽土。圆十信是方便净土。以同除四住。此处为齐。若伏无明。三藏则劣。实报净秽。别教登地是实报秽。圆教登住是实报净。以别教带教道方便。圆教始终以佛知见。寂光有分证究竟不同。故三十二种毫相。不出十界依正。一一皆具三谛。故得开之以成三德。良以大毫相光。本非青黄赤白。随缘而为青黄赤白。虽为青黄赤白而体不变。如杂色裹珠。光随色变。众生迷故。逐玄黄之色。十界各各因。各各果。诸佛悟故。十界因果无非三德。如珠体不变。又放光现瑞。所以表当下云超圣因事。证十地事。若依圆释。住行向为三十。合十地为一。等觉为一。此三十二位皆证三德。与极果不二。故从顶门放

三十二种毫相光也。

己二、口轮出音叹事

于顶门上放如是等毫相光已，出微妙音，告诸大众，天龙八部，人非人等，听吾今日于忉利天宫，称扬赞叹地藏菩萨于人天中利益等事，不思議事，超圣因事，证十地事，毕竟不退阿耨多罗三藐三菩提事。

初二句结前。出微妙音者。音，即言教。出，即显示也。教显三谛为微。三一不二为妙。告诸大众是总。天龙八部是别。皆所告之机。听吾今日者。佛说此经已。不久入灭。今日为一化之终。将未来众生。付于地藏。不同寻常小事。必须专心承听。于忉利天宫大众之前。金口称扬赞叹地藏菩萨者。欲令未来众生。信心莫疑。专依地藏宏誓。而得度脱。于人天中。利益等事。此是叹名。以称名读经。人天俱得解脱。不思議事。叹经体。此体由修道所证故。超圣因事。证十地事。此二句叹宗。宗必因果同成故。不退菩提。叹经用。专成就佛道。无三乘方便故。

戊二观音请说为流通分二。己初、当机述请；二、如来赞许。

己初分二。庚初、经家提名叙仪；二、大士述叹请说。今初

说是语时，会中有一菩萨摩訶萨，名观世音，从座而起，胡跪合掌。

佛正赞扬地藏之时。会中有一菩萨。名观世音。观，即能观之智。世音，即所观之境。境智合标。故称观世



音。乘机兴问。欲令当现众生。普闻地藏利益之事。由是从本座起。往诣佛前。胡跪合掌。

庚二大士述叹请说分三。辛初、述前所叹功德；二、述今欲赞益事；三、正请为众扬德。

辛初分二。壬初、述地藏威神；二、述诸佛赞德。今初

白佛言，世尊，是地藏菩萨摩訶萨具大慈悲，怜愍罪苦众生，于千万亿世界，化千万亿身，所有功德及不思議威神之力。

今闻世尊在忉利天宫。称扬地藏利益之事。然此大士。具足大慈悲心故。能怜愍罪苦众生。不但在娑婆一处教化。亦于千万亿世界之中。一一世界。化千万亿身。一一身。化千万亿人。不只一劫二劫。从久远劫来。度脱罪苦众生。无量无边。是以此菩萨所有功德。及威神之力。俱不可思议。

壬二、述诸佛赞德

我闻世尊与十方无量诸佛，异口同音赞叹地藏菩萨云，正使过去现在未来诸佛说其功德，犹不能尽。

我闻，正显六凡众生不闻。十方诸佛赞叹地藏。以观音大士得耳根圆通。故能普闻十方诸佛赞叹之音。例如《弥陀经》中。释迦赞叹弥陀之时。六方诸佛。各于其国。出广长舌相。赞叹弥陀。若当时世尊不说。众生焉得闻知。今由观音证明。佛在忉利赞叹地藏之时。而十方无量诸佛。亦各各异口同音。赞叹地藏菩萨云。不但现在十

方诸佛。说地藏功德。叹莫能尽。正使过去、现在、未来三世十方诸佛。说地藏功德。犹不能尽。然此中文相。本经所无。或远指大集。惟忉利众集之时。佛以众数问于文殊。而文殊不知。世尊云。我以佛眼观故。犹不尽数。释迦不知。比例十方三世诸佛。亦不得知。所度众生既广。以显教主功德难思。故云说犹不尽。

辛二、述今欲赞益事

向者又蒙世尊普告大众，欲称扬地藏利益等事。

向者世尊。举身放光。普告诸佛世界。一切菩萨。天龙鬼神等。听吾今日。称赞地藏威神慈悲之力。今者又蒙世尊。于顶门放大毫相光。出微妙音。告诸大众。吾今欲称扬地藏利益等事。

辛三、正请为众扬德

唯愿世尊，为现在未来一切众生，称扬地藏不议事，令天龙八部，瞻礼获福。

此观音深会佛意。是以为众请于世尊。普为现未一切众生。称扬地藏不议利益之事。令彼天龙八部闻之。由是瞻礼地藏。获福无量也。

己二如来赞许分四。庚初、赞德；二、诚听；三、愿闻；四、正告。

庚初分二。辛初、赞娑婆有缘功德；二、赞听宣地藏功德。今初



佛告观世音菩萨，汝于娑婆世界有大因缘。若天若龙，若男若女，若神若鬼，乃至六道罪苦众生，闻汝名者，见汝形者，恋慕汝者，赞叹汝者，是诸众生于无上道，必不退转，常生人天，具受妙乐。因果将熟，遇佛授记。

前观音请佛说地藏功德。使闻者瞻礼获福。今佛于大众中赞叹观音功德者。亦欲令闻者瞻礼获福。世尊知时知机不空说法。为若此也。汝观音于娑婆世界。有大因缘。亦同地藏无二。然大士化缘。无刹不现。此就众生机感偏宜。故云于娑婆有缘。譬如一月在天。水清影现。水浊影没。月影周遍。无间清浊。浊水若清。影固现在。非适今有。以如是故。亦号普门。因缘亦名感应。若就众生。善恶二机为因。圣人灵智慈悲为缘。若就圣人。观智慈悲为因。众生机感为缘。如是因缘和合。则免七难三毒之苦。大者普义。普法界感。普法界应。故无论若天若龙。若男若女。若神若鬼。乃至六道罪苦众生。其有闻汝观音名者。见汝形者。由是生恋慕心。而赞叹汝之功德者。是诸众生。以三业为能感。菩萨观智慈悲为能应。令彼于无上道。必不退转。自闻名以后。未成佛道之前。于是中间。常在人天。具受妙乐。修集功德。因圆果熟。遇佛授记。

辛二、赞听宣地藏功德

汝今具大慈悲，怜愍众生，及天龙八部，听吾宣说地藏菩萨不思议利益之事。

观音大士。常以慈眼视诸众生。而云今具者。以慈悲由境而发。今观此诸众生。应以地藏得度。为是生怜愍心。请于世尊。故如来赞之云。汝观音今者。具大慈悲。

怜愍未来众生。及天龙八部。应听吾宣说地藏。而得不思议利益之事。

庚二、诚听

汝当谛听，吾今说之。

如文。

庚三、愿闻

观世音言，唯然，世尊，愿乐欲闻。

如文。

庚四正告分二。辛初、长行；二、重颂。

辛初分三。壬初、别示不思議事；二、总说利益无尽；三、结劝大士流布。

壬初分八。癸初、转天人衰相；乃至第八安水陆险道。

癸初分二。子初、五衰相现；二、见闻转报。今初

佛告观世音菩萨，未来现在诸世界中，有天人受天福尽，有五衰相现，或有堕于恶道之者。

未来现在约竖。诸世界约横。则横遍十方。穷未来际。不但娑婆一处一时而已。有天人受天福尽。有五种衰相发现。衰对盛而言。如世富人。一向受乐。忽然贫穷。其苦较向来贫者为甚。天人身体柔软细滑。见五相时。受极大苦。如地狱无异。准《新婆娑论》。诸天命终。先有二种五衰相现。一、小。二、大。小五衰者。一、身出恶声。二、身光微昧。三、浴水著身。四、著境不舍。五、



身虚眼瞬。大五衰者。一、衣服今秽。二、华冠光萎。三、两腋流汗。四、体生臭气。五、不乐本座。小五衰相现。若不归依求救。大五衰现。必从天死退下。或者，不定之词。若前世恶业成熟。随宿业所牵。有堕于三途恶道者。

子二见闻转报分二。丑初、示增天福；二、况施供利。今初

如是天人，若男若女，当现相时，或见地藏菩萨形像，或闻地藏菩萨名，一瞻一礼，是诸天人，转增天福，受大快乐，永不堕三恶道报。

诸天有宿命智。自知福尽。应堕恶道。如是天男天女。当现五种衰相之时。此有二世恶。或现世恶业。或前世恶业。或见地藏形像。或闻地藏菩萨名。此有二世善。或现世善根。或前世善根。故以二世善恶为因。由闻地藏大士。有不思议威神誓愿。为是在圣像之前。一瞻一礼。众生既有畏苦求脱之机。以至诚心感于地藏。而菩萨即以真应二身拔苦与乐。是诸天人。转增天福。受大快乐。此是与乐。永不堕三恶道报。此是拔苦。然诸天人。实不见地藏之身。而自获利益。此属显机冥应一句。亦是真身拔苦。

丑二、况施供利

何况见闻菩萨，以诸香，华，衣服，饮食，宝贝，璎珞，布施供养，所获功德福利，无量无边。

前见像闻名。仅一瞻一礼。尚得转增天福。不堕恶

道。何况见闻。复以香华珍宝。种种布施供养。其所获功德福利。自然无量无边。

癸二转临终恶业分二。子初、临终闻名离苦；二、眷属塑像转报。今初

复次观世音，若未来现在诸世界中，六道众生，临命终时，得闻地藏菩萨名，一声历耳根者，是诸众生，永不历三恶道苦。

未来现在约时。诸世界约处。与前文同。六道即天、人、阿修罗、地狱、饿鬼、畜生。此六善恶升沉。展转相通。故名为道。总不出胎卵湿化四生。既有生必有死。故此诸众生。皆有临命终时。是知不但人死时。须为其助念。畜生死时。亦应为其助念。在此将死未死之时。若得闻地藏菩萨名。仅仅一声经历死者耳根。是诸众生。仗此功德。自此以后。永不再历三恶道苦。

子二眷属塑像转报分二。丑初、修塑像因；二、转现未报。今初

何况临命终时，父母眷属，将是命终人舍宅财物，宝贝衣服，塑画地藏形像。

前云六道众生。临终得一闻菩萨名者。永不历三途。暂时一历耳根。尚有如此功德。何况临命终时。其父母眷属。将是命终人。尽卖所有舍宅财物宝贝衣服。为其塑画地藏形像乎。

丑二转现未报分二。寅初、病人知因；二、承功报转。今初



或使病人未终之时，眼耳见闻，知道眷属，将舍宅宝贝等，为其自身塑画地藏菩萨形像。

或者，不定之词。或有男子女人。临命终时。神识昏昧。不辩善恶。乃至眼耳更无见闻。或有病人。未终之时。神识未昏。眼亲见。耳亲闻。知道眷属。将己所有舍宅宝贝等。为其本身。广修功德。塑画地藏菩萨形像。由是心生欢喜。

寅二承功报转分二。卯初、重病寻愈增寿；二、命尽灭障生天。今初

是人若是业报合受重病者，承斯功德，寻即除愈，寿命增益。

业有二种。一者定。二者不定。定业难转。不定业可转。此病人若是不定业。应受重病之报者。今仗眷属。为其塑画地藏形像。由此功德。不但重病即愈。且使寿命增益。初由眷属造像。生一念欢喜。此是世界悉檀益。病愈是对治悉檀益。寿增是为人悉檀益。将来必定成佛。是入第一义悉檀益也。

卯二、命尽灭障生天

是人若是业报命尽，应有一切罪障业障，合堕恶趣者，承斯功德，命终之后，即生人天，受胜妙乐，一切罪障，悉皆消灭。

此病人若是定业难转。报尽命终。然现世所造。一切罪业。合堕恶趣受苦。此业犹未决定。则承斯塑像功德。一切罪障。悉皆消灭。譬如小火。能烧一切。业因既灭。

苦果自亡。命终之后。仗地藏威神之力。即生人天。受胜妙乐。此属显机。亦冥亦显应。以今世作善。来世受报也。

癸三示先亡生界分二。子初、述思忆之事；二、示修敬之功。今初

复次观世音菩萨，若未来世，有男子女人，或乳哺时，或三岁五岁十岁以下，亡失父母乃至亡失兄弟姊妹，是人年既长大，思忆父母及诸眷属，不知落在何趣，生何世界，生何天中。

未来世中。有男子女人。或在乳哺之时。亡失父母。或一岁二岁乃至十岁以下。此时亡失父母。乃至亡失兄弟姊妹。幼时知识未开。不知思忆亲属。此人年既长大。思慕自己生身父母。忆昔同胞兄弟姐妹。及诸眷属。奈幽冥途隔。不知亡者魂神。于六道中。落在何趣。若在人道。不知生何世界。若生天上。三界诸天。不知生何天中。

子二示修敬之功分三。丑初、先亡解脱；二、具告生界；三、现获妙报。

丑初分二。寅初、修胜因；二、得乐报。今初

是人若能塑画地藏菩萨形像，乃至闻名，一瞻一礼，一日至七日，莫退初心，闻名见形，瞻礼供养。

此思忆先亡之人。若遇善友指示。或曾读诵本经。即能塑画地藏形像。乃至闻菩萨名号功德。由是一心瞻礼。从一日乃至七日。切勿退堕初心。自闻名见形以来。天天瞻礼供养。而不懈怠。



寅二得乐报分二。卯初、堕恶趣者解脱；二、生人天者增因。今初

是人眷属，假因业故，堕恶趣者，计当劫数，承斯男女兄弟姊妹塑画地藏形像，瞻礼功德，寻即解脱。生人天中，受胜妙乐。

如是之人。其先亡眷属。假使因恶业故。堕于恶道者。计当劫数受苦。仗此在生男女兄弟姊妹。塑画地藏形像。一心瞻礼。以此功德。使先亡眷属。即脱恶道之苦。生于人天之中。受殊胜微妙之乐。

卯二、生人天者增因

是人眷属，如有福力，已生人天，受胜妙乐者，即承斯功德，转增圣因，受无量乐。

或此人先亡眷属。如有福德之力。已生天上。受胜妙乐者。即承此功德。展转增上出世圣因。天上虽乐。尚有尽时。若出世之乐。则无量无边。

丑二具告生界分二。寅初、念名菩萨现身；二、梦神领见眷属。今初

是人更能三七日中，一心瞻礼地藏形像，念其名字，满于万遍，当得菩萨现无边身，具告是人，眷属生界。

此人不但一七日中。瞻礼地藏。更能三七日中。一心瞻礼地藏形像。称念地藏名号。满于万遍。如是三业并运。当于此时。即得菩萨现无边身。现，即应现。随机应现。机既无量。应亦无边。故云现无边身。又化身无量。

千处虔求千处应。故称无边。此人欲知先亡父母。生何世界。故亲蒙菩萨。具告此人已亡眷属。所生世界。此显机显应。

寅二、梦神领见眷属

或于梦中，菩萨现大神力，亲领是人，于诸世界，见诸眷属。

此人或于梦中。地藏菩萨现起大神通力。亲领此人。到诸世界。见其先亡父母及诸眷属等。此冥机冥应。

丑三、现获妙报

更能每日念菩萨名千遍，至于千日，是人当得菩萨遣所在土地鬼神，终身卫护，现世衣食丰溢，无诸疾苦，乃至横事不入其门，何况及身。是人毕竟得菩萨摩顶授记。

上来述先亡利益。今述现存获报。瞻礼地藏。能使冥阳两利。此人不但三七瞻礼。若更能每日发心。念菩萨名千遍。如是日日不退。至于千日。不过三年。此人尽一生世。当得菩萨宏誓摄受。所居之处。遣使所在土地鬼神。终身卫护。令彼外缘具足。易于办道。现得三乐。后得妙记。一者现世衣食丰溢。则长幼咸安。二者无诸疾苦。则身心调适。三者横事不入。无诸扰乱。则安居静处。而菩萨本愿众生成佛。是以此人。毕竟得菩萨摩顶授记。

癸四成度生证果分二。子初、述发心度人；二、明修因成愿。今初



复次观世音菩萨，若未来世，有善男子善女人，欲发广大慈心救度一切众生者，欲修无上菩提者，欲出离三界者。

若未来世中。佛灭度后。有善根男子女人。欲发心愿。发愿有通有别。别如药师十二愿。弥陀四十八愿等。通，即四宏誓愿。而此誓愿。由慈悲心。缘四谛境而发。悲心拔苦。发二誓愿。众生无边誓愿度。烦恼无尽誓愿断。慈心与乐。发二誓愿。法门无量誓愿学。佛道无上誓愿成。广大对狭小而言。藏通二教。缘六道众生故狭。别圆缘十界众生故广。救，即救拔。度，即与乐。一切，通指十界众生。皆以无余涅槃而灭度之。此属利他。欲修无上菩提者。简非声闻缘觉有上菩提。今是无上佛道。此属自行。上求佛果。无论若自若他。具欲出离三界生死之苦。故结云。欲出离三界者。

子二、明修因成愿

是诸人等，见地藏形像，及闻名者，至心归依，或以香华衣服，宝贝饮食，供养瞻礼。是善男女等，所愿速成，永无障碍。

经云。菩萨初发心。鱼子庵罗华。三祇行因多。及其结果少。况在佛灭后未来世中。纵发大心。岂易成就。本经云。业力甚大。能障圣道。故此诸众生。见地藏形像。及闻名号功德。至诚归依地藏。或以香华等具。供养瞻礼。仗大士宏愿摄受。是善男女等。所发自行化他之愿。速得成就。永无三障阻碍。约理而言。若有二相。皆是障碍。若知诸法实相。即无障碍。此即不思議事。由此起

修。从因至果。永无委曲。正是游于四方。直至道场。即是超圣因事。证十地事。毕竟不退阿耨多罗三藐三菩提事。故云所愿速成。永无障碍。文略意周矣。

癸五成欲求愿事分二。子初、述所求愿事；二、明修因成就。今初

复次观世音，若未来世，有善男子善女人，欲求现在未来百千万亿等愿，百千万亿等事。

心愿在内。事相据外。有愿则必有事。一人心愿无量。所事亦无量。何况各人心愿不同。故有百千万亿之多。八苦之中。有求不得苦。即是事与愿违。是以未来世中。有善男女等。欲求现在世。或未来世。无论世出世间。百千万亿等愿。百千万亿等事。

子二明修因成就分二。丑初、愿求成就；二、梦感摩顶。今初

但当归依瞻礼，供养赞叹地藏菩萨形像，如是所愿所求，悉皆成就。

但当于地藏形像之前。或至诚归依。或一心瞻礼。或四事供养。或称名赞叹。如是之人。凡有所愿所求。悉皆成就。

丑二、梦感摩顶

复愿地藏菩萨具大慈悲，永拥护我，是人于睡梦中，即得菩萨摩顶授记。

再愿地藏菩萨。具大慈悲。昔有愿言。为是罪苦众



生。广设方便。尽令解脱。而我自身。方成佛道。以是因缘。我今发心归依。当蒙菩萨。永拥护我。是人于睡梦中。即得菩萨摩顶安慰。授与成佛之记。

癸六发现生智慧分二。子初、迷宿障根钝；二、示修因发慧。今初

复次观世音菩萨，若未来世，善男子善女人，于大乘经典，深生珍重，发不思議心，欲读欲诵。纵遇明师，教视令熟，旋得旋忘，动经年月，不能读诵。是善男子等，有宿业障，未得消除，故于大乘经典无读诵性。

若未来世中。有善男女等。举受法之机。大乘经典。是所受之法。大对小而言。小属自利。如羊车鹿车。此名小乘。大则自利利他。如大白牛车。能载多人。故名大乘。经能显理。如如意珠。能出众宝。故须珍之重之。若无善根之人。虽百千万劫。不易遭遇。今幸值遇。于此经典。极生珍重。不但自利。复欲利他。发如是不思議心。由是愿欲读诵经典。亲近善友。奈根钝慧浅。纵遇明师。教其阅览经典。令熟读熟诵。然此人或得前忘后。得后忘前。如此经年累月。不能读诵。所以者何。是善男子等。有宿世恶业。障彼智慧。若宿业未得消除。智慧不得开发。以是之故。于此大乘经典。无读诵性。

子二示修因发慧分二。丑初、修因；二、发慧。

丑初分二。寅初、对像陈心；二、求慧方轨。今初

如是之人，闻地藏菩萨名，见地藏菩萨像，具以本心

恭敬陈白。

如是无读诵性人。若得闻地藏菩萨名。见地藏菩萨像。备将本所发之心。三业恭敬。陈白于地藏之前。

寅二求慧方轨分三。卯初、修敬法；二、服水法；三、戒慎法。今初

更以香，华，衣服，饮食，一切玩具，供养菩萨。

更于圣像之前。用香华等具。供养菩萨。

卯二、服水法

以净水一盞，经一日一夜，安菩萨前，然后合掌请服，回首向南。临入口时，至心郑重。

用一盞净水。放地藏菩萨前。经一日夜。明晨先在地藏像前。顶礼三拜。然后两手合掌。将水请来。当服之时。回首向南。临入口时。不可当水饮。如服药然。须以至诚心。郑重发愿。请大士加被。开发智慧。净水表智。日表明。夜表无明。以智观照。无明即明。其体不二。故云经一日夜。回首向南。表背尘合觉。

卯三、戒慎法

服水既毕，慎五辛，酒，肉，邪淫，妄语，及诸杀害，一七日或三七日。

服世间药。治色身上病。有禁忌之法。今服净水。欲消障发慧。理有戒慎之法。五辛，即大蒜、茗葱、慈葱、兰葱、兴渠。此五辛生食发患。熟食发淫。饮酒断智慧种。食肉断慈悲种。邪淫杀害即摄身三业。妄语摄口四



业。慎即收摄其心。不作此诸恶业。使身心清静。如是一七日。或三七日。必获感应。但除狐疑不信。及不至诚者。此克期求感之意也。

丑二、发慧

是善男子善女人，于睡梦中，具见地藏菩萨现无边身，于是人处，授灌顶水。其人梦觉，即获聪明，应是经典，一历耳根，即当永记，更不忘失一句一偈。

是善男女等。如是如法求慧。即于睡梦之中。具见地藏菩萨。现无边身。于此求慧人处。授与净水。灌于顶上。其人从梦觉来。即获聪明。应是经典。一历耳根。即当永记。更不忘失一句一偈。《法华经》云。是人意清静。明利无浊秽。以此妙意根。知上中下法。乃至闻一偈。通达无量义。若通达义理。自不忘失一句一偈。所谓但得本不愁末也。

癸七转恶相遂求分二。子初、述其昼夜恶事；二、修善消灭安乐。今初

复次观世音菩萨，若未来世有诸人等，衣食不足，求者乖愿，或多病疾，或多凶衰，家宅不安，眷属分散，或诸横事，多来忤身，睡梦之间，多有惊怖。

未来世中。有一类人。衣不蔽形。食不充饥。以贫穷故。亲旧远离。凡有所求。事与愿违。或者身多疾病。或多遇凶衰之事。真是苦上加苦。由是一家不安。各寻生活。眷属分散。或抄劫窃盗。本不干己事。因贫为人所嫌。往往横罹其殃。即睡梦之间。亦心神不宁。多见恶

梦。常有惊怖。如是种种不如意事。皆由宿世恶业所感。

子二、修善消灭安乐

如是人等，闻地藏名，见地藏形，至心恭敬，念满万遍，是诸不如意事，渐渐消灭，即得安乐，衣食丰溢，乃至睡梦中，悉皆安乐。

如是人等。若宿植善根。或遇善友。或于经卷中。闻地藏名号功德。见地藏形像。一心恭敬。念地藏名号。可满万遍。从此消万恶。生万善。承斯功德。是诸不如意事。渐渐消灭。即得安乐。昔日衣食不足。今则衣食丰溢。乃至睡梦之中。昔多惊怖。而今身心安乐。

癸八安水陆险道分二。子初、述经历恶事；二、示称名利益。今初

复次观世音菩萨，若未来世有善男子善女人，或因治生，或因公私，或因生死，或因急事，入山林中，过渡河海，乃及大水，或经险道。

千金之子。坐不垂堂。则安居家室。犹须防患。何况出门。跋涉水陆。且此所经。乃是险道。是以世尊慈悲。复告观音菩萨。若未来世中。有善男女等。或因治理生计。或因公私事务。或因生产死亡。或因急难之事。以是之故。必须经历水陆道路。或入深山茂林之中。不免猛兽之患。过渡河海大水。不免风波之厄。或经险道。多有盗贼之难。

子二、示称名利益



是人先当念地藏菩萨名万遍，所过土地，鬼神卫护，行住坐卧，永保安乐。乃至逢于虎狼师子，一切毒害，不能损之。

此人在未出门之前。应当先念地藏菩萨名万遍。以后所过水陆道路。地藏敕诸当地土地。一切鬼神。保卫拥护此人。在路途之中。行住坐卧。四威仪中。永保安乐。乃至纵逢虎狼师子。一切毒害。不能损之。此是显机。非冥非显应。以不见不闻。不觉不知。而安然渡险。以一显机而感四应。所谓显机显应。显机冥应。显机亦冥亦显应。显机非冥非显应。例如冥机。亦冥亦显机。非冥非显机。亦具四应。以冥属过去世善。显属现在世善。亦冥亦显属过去现在二世善根。非冥非显属未来善根。有可生之机。例如佛为阐提说法。四机各具四应。四四成十六句。应亦如是。合成三十二句感应。广如《法华玄义》。感应妙中。须者往检。

壬二、总说利益无尽

佛告观世音菩萨，是地藏菩萨，于阎浮提有大因缘。若说于诸众生见闻利益等事，百千劫中，说不能尽。

若论地藏分身沙界。何啻娑婆南洲一处。今佛对南洲众生说。故云是地藏菩萨。于南阎浮提。有大因缘。以地藏大士。常在幽冥界中。救度罪苦众生。故于诸众生。宿世有大因缘。如是感应相扣。是以一切众生。见像闻名。所得利益之事。虽百千劫中。说不能尽。

壬三、结劝大士流布

是故观世音，汝以神力流布是经，令娑婆世界众生，百千万劫永受安乐。

前观音白佛。唯愿世尊。为现未众生。称扬地藏不思議事。令天龙八部。瞻礼获福。由是世尊。略说八种不思議利益之事。汝观音既为众请问。以是之故。今付嘱观音菩萨。当以神通之力。流布是经。令娑婆世界。一切众生。百千万劫。永受安乐。

辛二重颂分三。壬初、总颂神力难尽；二、别颂不思議事；三、结颂普告流布。今初

尔时世尊而说偈言：吾观地藏威神力，恒河沙劫说难尽，见闻瞻礼一念间，利益人天无量事。

根有利钝。利者不用重颂。钝者于长行未悟。须重说偈颂。亦为横来之机。正说已竟。再说重颂。吾以佛眼。观此地藏威神之力。纵经恒河沙劫。说之不尽。所以若天若人。见形闻名。暂生一念恭敬瞻礼。所得利益。无量无边。

壬二别颂不思議事分六。癸初、颂转衰相；乃至第六颂安水陆。今初

若男若女若龙神，报尽应当堕恶道，至心归依大士身，寿命转增除罪障。

长行但云人天。偈中兼收八部。报尽，即天福尽。或有堕于恶道之者。有天男天女。此指欲界天龙八部。但非非想天。八万大劫报尽。亦有当堕恶道者。故知应摄三界诸天。如是天人。或见地藏形。或闻地藏名。以至诚心。



归依大士。一瞻一礼地藏身形。是诸天。人。寿命转增。受大快乐。罪障消除。不堕三恶道报。

癸二、颂示生界

少失父母恩爱者，未知魂神在何趣，兄弟姊妹及诸亲，生长以来皆不识，或塑或画大士身，悲恋瞻礼不暂舍，三七日中念其名，菩萨当现无边体，示其眷属所生界，纵堕恶趣寻出离，若能不退是初心，即获摩顶受圣记。

幼少之时。长行在乳哺时。乃至十岁以下。亡失父母。最恩爱人。或亡失兄弟姊妹。及诸眷属。以幼时知识未开。故生长以来。于先亡眷属。皆不识面。是人年既长大。思忆父母。及诸眷属。未知魂神落在何道。欲报恩超度。是人若能塑画地藏形像。在圣像前。悲恋瞻礼。无时暂舍。从一日至七日。莫退初心。更于三七日中。念其名字。满于万遍。当得菩萨现无边身。具告是人眷属生界。是人先亡眷属。假因业故。纵堕恶趣。计当劫数。承斯在生男女兄弟姊妹。塑画地藏形像。瞻礼功德。寻即解脱。是人更能不退初心。每日念菩萨名千遍。至于千日。菩萨遣所在土地鬼神。终身卫护。现世衣食丰溢。乃至横事不入其门。是人毕竟得菩萨摩顶授记。

癸三、颂成度生

欲修无上菩提者，乃至出离三界苦，是人既发大悲心，先当瞻礼大士像，一切诸愿速成就，永无业障能遮止。

长行云发大慈心。偈云发大悲心。应知慈悲互摄。是人既发大悲心。欲救度一切众生者。欲修无上菩提者。欲

出离三界生死之苦者。如是人等。先当瞻礼地藏形像。一切诸愿。速得成就。永无业障。所能遮止。

癸四颂发现智分二。子初、颂宿障根钝；二、颂修因发慧。今初

有人发心念经典，欲度群迷超彼岸，虽立是愿不思議，旋读旋忘多废失，斯人有业障惑故，于大乘经不能记。

未来世中。有善男女等。于大乘经典。深生珍重。发心读诵。欲度众生。自生死此岸。登涅槃彼岸。虽立如是不思議宏愿。因无读诵性。纵遇明师。教视令熟。奈旋读旋忘。多所废失。此人由宿世业障迷惑。以是之故。于大乘经。不能记忆。

子二颂修因发慧分四。丑初、颂修因；乃至第四颂发慧。今初

供养地藏以香华，衣服饮食诸玩具。

是人但于地藏像前。具以本心。恭敬陈白。更以香华玩具。供养菩萨。

丑二、颂服水

以净水安大士前，一日一夜求服之。

如文。

丑三、颂戒慎

发殷重心慎五辛，酒肉邪淫及妄语，三七日内勿杀害，至心思念大士名。

至心思念大士名。于三七日内。应当称念地藏名号。



求菩薩加被。长行略去。故于颂中补之。

丑四、颂发慧

即于梦中见无边，觉来便得利根耳，应是经教历耳闻，
千万生中永不忘，以是大士不思议，能使斯人获此慧。

是人于睡梦中。具见菩萨。现无边身。授灌顶水。从梦醒来。便得耳根聪利。应是经教一历耳根。即当永记。于千万生中。更不忘失一句一偈。下结示。此由菩萨不思议神力。能使此人。得如是智慧。

癸五颂转恶相分二。子初、颂昼夜恶事；二、颂修因安乐。今初

贫穷众生及疾病，家宅凶衰眷属离，睡梦之中悉不安，
求者乖违无称遂。

未来世中。有诸人等。衣食不足。即贫穷众生。或多疾病。或多凶衰。家宅不安。眷属分散。睡梦之间。多有惊怖。求者乖愿。不得称意。

子二、颂修因安乐

至心瞻礼地藏像，一切恶事皆消灭，至于梦中尽得安，
衣食丰饶神鬼护。

如是人等。于地藏像前。至心瞻礼。念满万遍。仗此功德。鬼神卫护。由是一切恶事。皆悉消灭。衣食丰饶。乃至睡梦之中。尽得安乐。

癸六颂安水陆分二。子初、颂经历恶事；二、颂称名利益。今初

欲入山林及渡海，毒恶禽兽及恶人，恶神恶鬼并恶风，一切诸难诸苦恼。

未来世中。有善男女等。或因治生。乃至或因急事。欲入山林中。及过渡河海。此等险道。多有毒恶禽兽及诸恶人。并恶鬼恶神。或遇黑风。如是一切诸难。行路者不免种种苦恼。

子二、颂称名利益

但当瞻礼及供养，地藏菩萨大士像，如是山林大海中，应是诸恶皆消灭。

此人未出门前。但当在地藏大士像前。瞻礼供养。念菩萨名。可满万遍。所过土地。鬼神卫护。如是山林大海。一切诸恶。皆悉消灭。

壬三结颂普告流布分三。癸初、劝听地藏神力；二、总颂闻瞻利乐；三、结劝观音告布。今初

观音至心听吾说，地藏无尽不思議，百千万劫说不周，广宣大士如是力。

劝观音至心听。即寄观音以劝大众。地藏所证三谛之理无尽。故神力亦无尽。若广宣说如是神力。虽百千万劫。亦不能周。

癸二、总颂闻瞻利乐

地藏名字人若闻，乃至见像瞻礼者，香华衣服饮食奉，供养百千受妙乐，若能以此回法界，毕竟成佛超生死。

以地藏有如是神力故。若有人闻此菩萨名字。乃至见



大士形像。一心瞻礼称名。奉以香华等供养。此是修因。使百千劫。于人天中。受胜妙乐。此是得报。若能以此功德。不为自求人天福报。回向法界众生。是人毕竟成佛。永超二种生死。

癸三、结劝观音告布

是故观音汝当知，普告恒沙诸国土。

以有如是不思议利益故，结前。特告汝观音当知，起后。必须以神通之力。普告恒河沙数诸国土。言诸国则不局同居。应摄方便实报。既有依报。必具正报。故知本经应横被九界。竖穷三世。如是流布。岂仅令娑婆众生。受乐而已。

丁三、嘱累人天流通。先品题。

嘱累人天品第十三

嘱，是如来金口付嘱。累，是菩萨丹心顶荷。则如来为能付嘱者。地藏为能承任者。所付嘱所承任。即人天未度之众。世尊临入涅槃。将未度之众。不付与诸大菩萨。独付与地藏者。以地藏往昔为长者子。本有愿言。尽未来际不可计劫。为是罪苦六道众生。广设方便。尽令解脱。而我自身方成佛道。自后为婆罗门女。为国王。为光目女。屡发宏誓。度尽受苦众生。佛眼观彼地藏。有如是本愿。是以将未度之众。付嘱地藏。烦尔救拔。地藏欲满本愿。所以顶受世尊所嘱。甘而弗劳。以是因缘。则有《嘱累人天品》也。

丁三次品文分二。戊初、化主忧天人嘱累；二、空藏

问瞻礼福利。

戊初分二。己初、世尊摩顶付嘱；二、地藏胡跪承旨。

己初分二。庚初、呼名大赞功德；二、呼名载嘱人天。

庚初分二。辛初、叙举臂摩顶；二、叹众德巨思。今初

尔时世尊举金色臂，又摩地藏菩萨摩诃萨顶。

告观音《见闻利益》已竟之时。世尊举金色臂。又摩地藏菩萨顶者。此为二次摩顶。前在《分身集会》。世尊舒金色臂。摩百千万亿。无量阿僧祇世界。诸分身地藏菩萨顶。故云又也。

辛二、叹众德巨思

而作是言，地藏，地藏，汝之神力不可思议，汝之慈悲不可思议，汝之智慧不可思议，汝之辩才不可思议，正使十方诸佛赞叹宣说汝之不思議事，千万劫中不能得尽。

口作是言。连呼地藏之名。爱深而托重也。前颂云。地藏无尽不思議。百千万劫说不周。然总不出三轮不思議。故云汝之神力不可思议。赞其身轮现通。能于百千万亿世界。化百千万亿身。汝之慈悲不可思议。赞其意轮鉴机。悲拔十界苦集。慈与四种道灭。汝之智慧辩才不可思议。赞其口轮说法。教化众生。竖穷三世。横遍十方。即此四种不思議事。不但我释迦说不得尽。正使十方诸佛。



赞叹宣说汝此四不思議事。经于千万劫中。说亦不尽。前云三世。今云十方。横竖互摄。故知三世应具十方。十方应具三世。方称具足。

庚二呼名载嘱人天分二。辛初、长行；二、偈颂。

辛初分二。壬初、火宅众生勿令堕苦；二、少善众生勿令退失。

壬初分二。癸初、正以三界天人付嘱；二、复明生性无定分形。今初

地藏，地藏，记吾今日在忉利天中，于百千万亿不可说不可说一切诸佛菩萨，天龙八部大会之中，再以人天诸众生等，未出三界，在火宅中者，付嘱于汝，无令是诸众生，堕恶趣中一日一夜，何况更落五无间及阿鼻地狱，动经千万亿劫，无有出期。

前呼地藏为赞德。是爱语喜声。今呼地藏为嘱事。是苦语悲声。佛在忉利为母说法。当有十方无量世界一切诸佛及大菩萨。皆来集会。及佛放光明云。出微妙音。有娑婆世界。他方国土。天龙八部。亦集到忉利天宫。记吾今日。在大会中。欲籍众证明。显非细故。此与《法华》付业。聚会亲族。始终不同。《法华》化道之终。犹如秋收。今是化道之始。犹如春种。皆是大事。故须证明。其间虽有难易。然靡不有始鲜克有终。因果相望。难易俱有。前《地藏分身集会》。世尊以未调之众。付于地藏云。汝当忆念吾在忉利天宫。殷勤付嘱。令娑婆世界。至弥勒出世以来众生。悉使解脱。承上而言。故云再以人天诸众生等。三界犹如火宅。火，譬生死之苦。宅，譬三

界。法喻互显。故云未出三界生死之苦。而在火宅之中者。付嘱于汝。须记吾言。无令是诸众生。堕恶趣中一日一夜。何况更落五无间及阿鼻地狱。动经千万亿劫。无有出期。

癸二、复明生性无定分形

地藏，是南阎浮提众生，志性无定，习恶者多。纵发善心，须臾即退，若遇恶缘，念念增长。以是之故，吾分是形，百千亿化度，随其根性而度脱之。

此明付嘱之意。以是南洲众生。志性无定。若近恶友。便造恶业。流转生死。无有边际。若近善友。敬心听法。必离三途。受最胜乐。但修善如登山。势为难上。恶如崩堕。理实易行。所以一切众生。习恶者多。其间纵发善心。须臾即退。若遇恶缘。则念念增益。以是之故。吾分身百千万亿。随其根性教化。而度脱之。

壬二少善众生勿令退失分二。癸初、种少善拥护勿退；二、念佛经碎狱生天。今初

地藏，吾今殷勤以天人众，付嘱于汝。未来之世，若有天人，及善男子善女人，于佛法中，种少善根，一毛一尘，一沙一滸，汝以道力，拥护是人，渐修无上，勿令退失。

然吾已将涅槃。回顾未度之众。深为可忧。故不觉降尊就卑。今在忉利天宫。殷勤恳切。将天人众。付嘱于汝。下示付嘱意。因未来世中。若天若人。有善男女等。于佛法中。种少善根。乃至一毛一尘。一沙一滸。汝地藏



須以修道所得神通之力。擁護此人。漸令修習無上菩提。勿令中間退失。當如慈母之育嬰孩。小心愛護。必使成立。勿令夭亡。

癸二念佛經碎獄生天分二。子初、隨業墮落惡趣；
二、神力方便救拔。今初

復次地藏，未來世中，若天若人，隨業報應，落在惡趣。

人天皆是善類。或由宿世惡業。于今成熟。隨其所造之業。而受報應。或有落于地獄惡趣者。

子二、神力方便救拔

臨墮趣中，或至門首，是諸眾生，若能念得一佛名，一菩薩名，一句一偈大乘經典，是諸眾生，汝以神力，方便救拔，于是人所，現無邊身，為碎地獄，遣令生天，受勝妙樂。

是諸天人。報盡應墮惡道。其有將墮惡趣之際。或已至地獄門首。然此等眾生。有自善根力。在此千鈞一發之間。若能念得一佛名號。或一菩薩名。乃至一句一偈大乘經典者。汝地藏當以威神之力。方便救拔。在在處處。有是念佛人臨墮惡趣中。當現無量無邊身。為碎地獄。遣令生天。受勝妙樂。冥報記載。王生將墮地獄。忽遇一僧。云是地藏菩薩。教令熟誦。若人欲了知。三世一切佛。應觀法界性。一切惟心造。可免地獄。少頃喚至王前。王問有何功德。答云。唯持一偈。王令誦之。聲徹地獄。罪人聞聲。并蒙解脫。即令放回。勉其修善。豈非地藏現身。碎地獄生天之明驗歟。

辛二、偈颂

尔时世尊，而说偈言：现在未来天人众，吾今殷勤付嘱汝，以大神通方便度，勿令堕在诸恶趣。

总结付嘱。总而言之。现在未来一切天人。吾今在忉利大会。殷勤付嘱于汝地藏。须用大神通之力。广设方便。尽令度脱。勿使堕在诸恶趣中。

己二地藏胡跪承旨分二。庚初、经家叙仪；二、大士领命。今初

尔时地藏菩萨摩诃萨胡跪合掌。

庚二大士领命分二。辛初、安慰世尊；二、度脱众生。今初

白佛言，世尊，唯愿世尊，不以为虑。

此是三业领佛付嘱。胡跪是身业。合掌恭敬是意业。白佛言是口业。不以为虑四字。是安慰世尊。

辛二度脱众生分二。壬初、少善解脱生死；二、深修不退道果。今初

未来世中，若有善男子善女人，于佛法中，一念恭敬，我亦百千方便，度脱是人，于生死中，速得解脱。

前阎王问佛。地藏菩萨。既有如是神力。云何众生。不依止善道。永取解脱。佛告阎王。以众生刚强。难调难伏。非关菩萨神力不逮。故须众生善根。方得菩萨救度。所谓把手牵君行不得。若教自肯方相应。是以未来世中。有善男女等。于佛法中。但起一念恭敬之心。以此微细善



根。我地藏亦以百千方便。度脱是人。于无边生死之中。速得解脱。

壬二、深修不退道果

何况闻诸善事，念念修行，自然于无上道永不退转。

何况有人。闻诸善事。念念修行。前只一念。今则念念。前只起恭敬心。今则修行诸善。以少善根尚得解脱。何况多善。自然于无上道。永不退转。嘱累之文。于此已竟。

戊二空藏问瞻礼福利分二。己初、述赞问福利；二、许说示利益。

己初分二。庚初、经家提名；二、当机发问。今初

说是语时，会中有一菩萨，名虚空藏。

经初世尊。以忉利所集之众。问于文殊。汝知数否。文殊白佛。以我神力。千劫测度。犹不能知。佛告文殊。此皆地藏久远劫来。已度、当度、未度。已成就、当成就、未成就。由是文殊问佛。地藏因地。作何行、立何愿。而能成就不思议事。世尊广说地藏过去为长者子。愿度罪苦众生。尽令解脱。而我自身。方成佛道。是故于今。犹度未尽。复发广大誓愿。是以世尊唱灭。将未度之众。付于地藏。大事因缘。于兹已毕。当此之时。会中有一菩萨。名虚空藏。虚空，则一法不立。藏，则无法不具。空假不二。即是中道。所有功德。尽归三德秘藏。

庚二当机发问分二。辛初、因闻叹致请；二、愿为众略说。

辛初分二。壬初、述闻神力叵思；二、因问福利几种。今初

白佛言，世尊，我自至忉利，闻于如来赞叹地藏菩萨威神势力，不可思议。

经初光音遍及。空藏即集忉利。故始终备闻如来赞叹地藏。威神势力。不可思议。

壬二、因问福利几种

未来世中，若有善男子善女人，乃及一切天龙，闻此经典，及地藏名字，或瞻礼形像，得几种福利。

佛灭度后。未来世中。有善男女等。及一切天龙。通指六道众生。闻此经典。及地藏名字。或瞻礼形像。如是修因。得几种福利。

辛二、愿为众略说

唯愿世尊，为未来现在一切众等，略而说之。

若广说者。千万亿劫。不能得尽。唯愿世尊。为现未众生。略而说之。

己二许说示利益分二。庚初、诚听许说；二、别分利益。今初

佛告虚空藏菩萨，谛听，谛听，吾当为汝分别说之。

如文

庚二别分利益分二。辛初、见像闻经供赞利益；二、闻经礼形赞叹利益。

辛初分二。壬初、总示修因；二、别列益数。今初



若未来世，有善男子善女人，见地藏形像，及闻此经，乃至读诵，香华饮食，衣服珍宝，布施供养，赞叹瞻礼。

闻经读诵是了因。布施供养是缘因。如此福慧双修。

壬二、别列益数

得二十八种利益。一者，天龙护念。二者，善果日增。三者，集圣上因。四者，菩提不退。五者，衣食丰足。六者，疾疫不临。七者，离水火灾。八者，无盗贼厄。九者，人见钦敬。十者，神鬼助持。十一者，女转男身。十二者，为王臣女。十三者，端正相好。十四者，多生天上。十五者，或为帝王。十六者，宿智命通。十七者，有求皆从。十八者，眷属欢乐。十九者，诸横消灭。二十者，业道永除。二十一者，去处尽通。二十二者，夜梦安乐。二十三，先亡离苦。二十四者，宿福受生。二十五者，诸圣赞叹。二十六者，聪明利根。二十七者，饶慈愍心。二十八者，毕竟成佛。

众生智慧力弱。广说则不能持。今略说二十八种利益。及七种利益。即此收尽地藏不思議利益。如《法华经》云。成就四法。当得是经。故或广或略。皆悉檀赴缘。欲令闻者有所劝勉。则大法始可流通。得二十八种利益。此句总标。一者下别列。佛说一句利益。或闻者欢喜。或生善。或对治。或入第一义。或闻一句。一人竖得四益。初闻欢喜。由是生善、破恶、入第一义。今以二十八种。分对四悉檀利益。一者世界悉檀欢喜益。世界者，差别之义。有能有所。如天龙护念。天龙为能护。持经者为所护。以此比例。如人见钦敬。神鬼助持。诸圣赞

叹。皆属世界悉檀摄。二为人悉檀生善益。如善果日增。衣食丰足。为王臣女。端正相好。多生天上。或为帝王。宿智命通。有求皆从。眷属欢乐。去处尽通。夜梦安乐。宿福受生。聪明利根。饶慈愍心。三者对治悉檀破恶益。如疾疫不临。离水火灾。无盗贼厄。诸横消灭。业道永除。先亡离苦。四者第一义悉檀入理益。如集圣上因。菩提不退。毕竟成佛。如是分对。令易忆持。故作此解耳。

辛二闻经礼形赞叹利益分二。壬初、总示修因；二、别列益数。今初

复次虚空藏菩萨，若现在未来天龙鬼神，闻地藏名，礼地藏形，或闻地藏本愿事行，赞叹瞻礼。

此但闻礼赞叹。了因独进。与上小异。故分两科。

壬二、别列益数

得七种利益。一者，速超圣地。二者，恶业消灭。三者，诸佛护临。四者，菩提不退。五者，增长本力。六者，宿命皆通。七者，毕竟成佛。

初句总标。一者下别列。诸佛护临。是世界悉檀。增长本力。宿命皆通。是为人悉檀。恶业消灭。是对治悉檀。菩提不退。毕竟成佛。是第一义悉檀。无论二十八种利益。七种利益。皆云毕竟成佛。如汇江河淮济。而注之海。同成咸味。此我佛付嘱之心。地藏承命之意。所谓唯此一事实。余二则非真也。

丙二总流通分二。丁初、因果圣凡闻赞致叹；二、天主众会供养礼退。今初



尔时十方一切诸来，不可说不可说诸佛如来，及大菩萨天龙八部，闻释迦牟尼佛称扬赞叹地藏菩萨大威神力，不可思议，叹未曾有。

十方诸佛菩萨。是放光前集。天龙八部。是光音召集。皆为发起此经而来。备闻世尊。称扬地藏。不思議威神之力。各各叹未曾有。

丁二、天主众会供养礼退

是时忉利天，雨无量香，华，天衣，珠璎，供养释迦牟尼佛，及地藏菩萨已，一切众会，俱复瞻礼，合掌而退。

佛在忉利说法。帝释为天主。说法已竟。理应供养。故雨无量天香天华。天衣珠璎。供养教主释迦文佛。及地藏菩萨。以世尊灭后。则地藏为教主。如是供养已竟。一切众会。俱复瞻礼世尊。合掌而退。诸经皆有闻法欢喜。今经无者。以闻世尊不久入灭。自后再聆法音。势不可得。而未度之众。不知如何了局。为此愁忧。故无欢喜之文。





地藏菩薩本願經略解卷下終

附录

东林佛号曲谱

1 = $\flat A - \flat B \frac{5}{4} \frac{6}{4}$

♩ = 60 低沉 缓慢 深切地



○：引磬木鱼同敲； ○：木鱼； \frown ：渐强； \rightrightarrows ：渐弱；

0：四分休止符，停顿一拍； $::$ ：从头反复。



备注：

一、要求一口气唱完，每句21拍，大约21秒。每四句唱完，以不超过90秒为度。

二、在空拍休止符号中吸气，要深、细、匀、长。吸气前要把腹中的余气全部呼尽，然后再吸下一口气。深呼吸至腹部，唱念时以脐轮震动发音。

三、初学若一口气唱不下来，至少要将“南无阿弥”四字念全，在“陀”字上补点气，续念完“佛”字。这样练习一段时间后，争取做到一口气念完六字佛号。

四、佛号中的“佛”字发音要短而轻，一出即止。

五、唱念时，引磬、木鱼、佛号的音声，三者要同步发音。

念佛的心态与音声

音声乃心性的外显，南无阿弥陀佛六字洪名即为妙音，从实相中流现。念佛法门以音声作佛事，透过佛号音声开启佛性，诚为转凡成圣之妙庄严路。是故，我等念佛行人对音声之道应加以考量。

一、极乐世界的音声特质

西方极乐世界是一个音乐之都。其风声、宝网声、铃铎声、波扬的水声、鸟的偕鸣声、虚空的乐器声等，都在演畅种种法音，自然宫商五音谐和。极乐世界的音声之善美乃十方世界音声之中最为第一，极乐种种音声内具八个

特点：清、畅、哀、亮、微、妙、和、雅。此八字特质，形成西方净土特有的音声格调，即阿弥陀佛梵音的概述，亦是我等众生内具的音声功德。是故，我等宜将此八字作为念佛之纲宗。如是念佛就能够与西方净土的音声形成同构共振，开发自性。八字原则略标如下：

（一）清，即清静。离一切烦恼染习即为清静，是故念佛人得斋戒清静，远离五欲六尘，真诚发心厌离娑婆，欣求极乐。如是念佛即为清。

（二）畅，即畅达。直心是道场，音声畅达舒展，直抒胸臆，无滞涩压抑状，大念见大佛，小念见小佛。音声所及，万祸冰消；洪音发号，毁裂魔军；畅快淋漓，心声一体。

（三）哀，即悲哀。于此生死苦海灭顶之际，自力怯弱，惟哀祈阿弥陀佛大悲拯救，呼喊救命，感通阿弥陀佛的大悲心，必须蒙佛力慈祐安坐大愿船，抵达安养国。

（四）亮，即嘹亮。哀而不伤。悲哀中有亮色，以吾之悲感弥陀大悲，信知弥陀悲愿决定令我往生净土，往生即可疾速成佛，旷劫大事今生了办，踊跃欢喜，生命洋溢亮色，音声自然洪亮。

（五）微，即微细。音声细微，透入内心性海，探玄勾赜，引发内心深蕴的善根，开启如来藏性，心外无法，满目青山。

（六）妙，即奇妙，亦云不可思议。音声通实相，六字洪名澄清吾人浊染的心，以佛知见转众生知见，能令吾人从有念入无念。音声全体即阿弥陀佛法身。灵籁之音，劫外之响，妙感难思。



（七）和，即和谐。和谐是空性的表显。持念佛号时，首先是心声和谐，心身相随。身心和谐心与外境和谐，大众念佛，音声和谐，几千人众音念佛如同一人，心通法界梵音、海潮音，大和吉祥。

（八）雅，即高雅。六字洪名表诠至高的超越意向。横超五恶趣，圆成自性佛果。不求人天福报，不低俗，不媚俗，音声唤醒自己，步步回归故园。如是念佛即为雅正。

综上所述：持念六字洪名，宜渗入清、畅、哀、亮、微、妙、和、雅之特质。这样便能与名号功德相应。信愿感通弥陀悲愿，成办往生大事。

二、东林佛号的唱念要领

东林佛号以八字特质为方针，语速低沉缓慢，格调哀亮，内具深信切愿之情怀，四句形成一个结构组。

第一句的重音放在“南无”上，一心归命。要唱出在生死旷野寻求佛力救度的渴望。

第二句的重音放在“阿弥”上，在苦苦寻求中，历经难险，终于找到了南无的对象，就是阿弥陀佛。要唱出寻找到阿弥陀佛的欢欣。

第三句的重音放在“陀”上，当我们归命于阿弥陀佛时，觉了原来阿弥陀佛与我竟是同体，我在弥陀心中念佛，弥陀在我心中呼应加持。要唱出弥陀与我同体同源的欣慰。

第四句的重音又放在“阿弥”上，当觉了阿弥陀佛与我同体时，回光反照，原来我自性即是阿弥陀佛“无量光

寿”。要唱出自性弥陀的自信自肯。由归命到归元。

这样，第一句向外部的渴望寻找，到第四句向内心安稳的回归，形成东林佛号四句一组的音声结构，四句佛号不断循环。

唱念的音声抑扬结构掌握后，加之两个配合：

（一）佛号与步点的配合。一句佛号走四步，“南无”一步（迈右脚），“阿弥”一步（迈左脚），“陀”一步（迈右脚），“佛”一步（迈左脚）。随法器音声节奏，走准四个步点。

（二）佛号与呼吸的配合。中间停顿时，深吸气到腹部，脐轮发音，一口气将佛号念完，浑融一体。

如是持念，久久便能唱出东林佛号的韵味，悲欣交集，香光庄严。伏冀念佛同仁共勉。

回向偈

愿以此功德 庄严佛净土
上报四重恩 下济三涂苦
若有见闻者 悉发菩提心
尽此一报身 同生极乐国

印光法师语

一切佛经，及阐扬佛法诸书，无不令人趋吉避凶，改过迁善。明三世之因果，识本具之佛性。出生死之苦海，生极乐之莲邦。读者必须生感恩心，作难遭想。净手洁案，主敬存诚。如面佛天，如临师保。则无边利益，自可亲得。若肆无忌惮，任意褻渎。及固执管见，妄生毁谤。则罪过弥天，苦报无尽。奉劝世人，当远罪求益，离苦得乐也。



ཡི་གེ་ཉི་ཤུ་ཅུ་རྒྱལ་པ་འདི་དཔེ་ཆ་འཛིན་དུ་བཞག་ན་དཔེ་ཆ་དེ་ཅི་འདྲར་
བཞག་མས་ཀྱང་ཉེས་པ་མི་འབྱུང་བར་འཇམ་དཔལ་ཅུ་རྒྱུད་ལས་གསུངས་སོ།།

此咒置经书中 可灭误跨之罪

印造佛经佛像之十大利益

- 一、从前所作种种罪过，轻者立即消灭，重者亦得转轻。
- 二、常得吉神拥护，一切瘟疫、水火、寇盗、刀兵、牢狱之灾，悉皆不受。
- 三、夙生怨对，咸蒙法益，而得解脱，永免寻仇报复之苦。
- 四、夜叉恶鬼，不能侵犯，毒蛇饿虎，不能为害。
- 五、心得安慰，日无险事，夜无恶梦，颜色光泽，气力充盛，所作吉利。
- 六、至心奉法，虽无希求，自然衣食丰足，家庭和睦，福寿绵长。
- 七、所言所行，人天欢喜。任到何方，常为多众倾诚爱戴，恭敬礼拜。
- 八、愚者转智，病者转健，困者转亨。为妇女者，报谢之日，捷转男身。
- 九、永离恶道，受生善道。相貌端正，天资超越，福禄殊胜。
- 十、能为一切众生，种植善根。以众生心，作大福田，获无量胜果。所生之处，常得见佛闻法，直到三慧宏开，六通亲证，速得成佛。

普为助印及读诵受持 辗转流通者回向

愿以此功德 消除宿现业
增长诸福慧 圆成胜善根
所有刀兵劫 及与饥馑等
悉皆尽灭除 人各习礼让
读诵受持人 辗转流通者
现眷咸安乐 先亡获超升
风雨常调顺 人民悉康宁
法界诸含识 同证无上道



庐山东林寺官方平台

(包含：恭请法宝，故障反馈，APP 下载，及三个微信公众号)

庐山东林寺网址：<https://www.lsdls.cn>

恭请法宝，请联系：发行部 0792-8893186

助印经书，请联系：功德处 0792-8909110

印刷问题，请联系：印制部 0792-8909029

文字问题，请联系：净研所 donglinbjs@163.com
